



شكة دبوس

شكة دبوس



شكة دبوس

شكة دبوس

"نصايح وارشادات من أجل الكلبوبات"

شادي أبو شهبة

تصميم الغلاف: محمود عبد الناصر

تدقيق لغوي: محمود ربيع

رقم الإيداع: 2022/ 27887

I.S.B.N:978- 977-6854-86-4

الطبعة الأولى 2023م



للنشر والتوزيع

الإدارة: 17 ش عزت باشا المطرية، القاهرة.

المدير العام: آية سعد الدين

مدير النشر: د. رامي عبد الباقي

المدير التنفيذي: نائل عزت

هاتف: 01147633268 - 01099387500

E – mail: zeinpublish2017@gmail.com

Facebook: Zein Publish

جميع الحقوق محفوظة ©



شادي أبو شهبة

شكة دبوس

"نصائح وارشادات من أجل الكلبوبات"

مش أدب ساخر



للنشر والتوزيع



شكة دبوس



بعد النجاح الرهيب والساحق للجزء الأول من حكايتنا "أشطر كتكوت"، وبعد مبيعات خرافية تجاوزت الـ 23 جنية، وبعد ما تصدر الكتاب تريند مصر والوطن العربي والوطن الغربي والوطن الحقيقي وجريدة الوطن وبيت الوطن وحب الوطن وبلادي بلادي يا أغلى الناس يلعب الوطن الحساس..

والله مش عارف، بس الحقيقة لأنني ملتزم بعقد نشرزي ما قولتلك
قبل كدة، ولأني مُجَبَّر على تسليم هذا العمل بكامل إرادتي قررت استثمار
نجاح الجزء الأول في إعادة التجربة الرائعة العظيمة مرة أخرى
قذوة وتأثراً بالجميل العزيز الغالي جورج أرار أرار أرار أرار.

وَرَيَّ مَا نَتْفَلِكُسْ بِتَعْمَلْ فِي كُلِّ أَعْمَالِهَا النَّاجِحَةِ، وَعِشَانِ أَحْنَا لِسَةِ قَائِلِينَ إِنْ الْكِتَابُ دَهْ هُوَ أَنْجَحُ حَاجَةٍ حَصَلَتْ فِي تَارِيخِ الْكُوكِبِ "وَعِشَانِ كُلِّ وَاحِدٍ دِمَاغُهُ تَفَضَّى وَمَا يَلْقِشُ أَفْكَارًا، هُوَا.. يِلَا جِزْءٍ ثَانِي".

يا ابني الأبطال ماتت أصلاً! عادي هنصحيحهم.

يا ابني الحبيكة خلصت! هنعمل واحدة ثانية بالكريمة.

يا حبيبي القصة خلصت خلاص! هندخل شخصيات جديدة ونقول إن البطل أصلاً كان كُوري وإن اللي مات ده كان أخوه التوأم في خطة عبقرية من الجنرال "أوكا ريميكس" ونرجعه بصحّي تاني عادي!



وبما إن الحل دة في غاية السهولة واليسر يبقى احنا بس محتاجين
حِجّة قوية تغطي على السبب الحقيقي لرجوعنا، يعني ممكن مثلاً في
مانشيت عريض كدة نقول:

"بعد زيادة نسب الزواج وزيادة دخل مأذون القرية الأوحده... تابع
المزيد"

تمّ عمل اجتماع عرفي صبيحة يوم الخميس مع شيخ البلد، المأذون،
2 شهود، فيش وكعب عمل، استثمارة 3 ونموذج التحاق، وأخيراً حكيم
القرية اللي أول ما دخل المجلس قال إس.. إس.. السلام عليكم، وتمت
مطالبة الكاتب الرائع الجامد زوحليقة وعم مهندسين مصر "شادي أبو
شبهة" بإنتاج الجزء الثاني من كتابه الرائع سعيًا في تطوير مستقبل
مدينة الفراخ والأحلام، وزيادة نسب تزواج الكتاكيت، وفيه كلام على
جزء تالت بطولة كريم عبد العزيز وإخراج مروان حامد.

وقد أوضح الكاتب من جانبه إنه فدا مصر وفدا القرية وتحت أمر
شيخ القرية، وإنه مستعد يعمل أي حاجة في سبيل تحقيق الرجاء
الاقتصادي واعتدال المناخ وقوة الحكام!

وبالشكل ده يبقى عملنا الحبكة المحكمة واللي هتدخلنا بكل سهولة
في الجزء الثاني من العمل الأدبي الرائع "أشطر كتكوت".



كلاكيت ملحوظات

الملحوظة الأولى:

في طريق السعي من أجل الوصول إلى علاقات أسرية متزنة، ومن أجل حقوق المرأة المقهورة الأمورة اللي مفيش في حياتها خطورة، قررنا أن يكون الجزء الثاني كاملاً مُكمِّلاً من أجل الحديث عن المرأة، ثم قتل المرأة "بصوت سعيد صالح".

والحقيقة يعني إن الموضوع جه غصب واقتدار، وروح العزيمة والإصرار طلعت علينا من الستات اللي بتدور على المساواة والعدل بين الرجل والست "تم البناء التخيلي لهذا الحوار الدرامي"..

- يا ست الناس أنا بشتم في الرجالة، قصدي الكتاكيت.

- ماليش فيه.. اشتمني زيم.

- طب أقسم بالله الكتاب بيتكلم عن عيوب الرجل في العلاقة.

- مش العيوب دي اتحطت في كتاب؟ حطني في كتاب زيم.

- يا ولية بلاش غباء بقى، بقولك دي شلفطة.

- شلفطني براحتك ولا يهملك.

ولذلك بعد انتهاء هذا الحديث المجازي، وبناء عليه فإن هذا الجزء خالصاً مخلصاً من أجل الكلام عن النسوان أو الكتكوتات.



الملحوظة الثانية:

الحقيقة إن الواحد منا مهما حاول يَبْقَى حيادي في الموضوع مايبْقَاش بمزاجه قوي، والأمر مايسلَمُش برضه من حبة إنصاف وتميَّز للعرق الذكوري اللي أنا بنتَميِّلُه، وعشان كده الفرق واضح جدًّا في اختيار أسامي الكتب؛ يعني في الجزئين أنا بتكلم عن عيوب كل طرف في العلاقة، وبالرغم من كده فالجزء الأول كان اسمه "أشطر كتكوت"، والجزء الثاني "شكة دبوس"؛ عشان الرجالة شاطرين بالفطرة، والدبوس ده يرمُز للفرخة اللي هي الست وطالعة بتشك وتعوّر، طبعًا الحيادية واضحة أهي!

أومّال بتقولوا عليّا ظالم ليه يا كفرة؟! يّلا حسبي الله في الستات عموماً، وبالمناسبة بقى الاسم ده كان أصلاً حاجة تانية خالص، فِضِل يتطور من مكان لمكان ومن عمل لعمل، قولنا نسمية "نمبر وان" محمد رمضان هيرفع علينا قضية، "آفة حارتنا النسوان" نجيب محفوظ هيرفع علينا قضية! نسميه "الطيبون للطيبات" مطايع الأفراح هترفع علينا قضية؛ فالهمم إنه بعد استشارة وألف استخارة، وبعد السؤال ع الجمال جوّه حارة، قررنا تسميه الاسم الرائع اللي فوق ده، واللي بقى على الكتاب حالياً، وهو.. "شكة دبوس"، مش عشان هو بيتكلم عن الجواز والحاجات الأبيحة اللي في دماغكم، لا.. عشان زي ما قولنا بيتكلم عن الدبوس، اللي هي الست، اللي هي زي ما قولنا في الجزء الأول "الفرخة الشامورت"، وأبقى أسمع حد بقى بيقول عليّا متحرّش عشان برمز لست بدبوس، عشان كل محلات الأكل بتحط الدبوس شعار ليها، بس هي لازم تيجي عند ممّس وتقف، عموماً حتى لو الناس كلها حاربتني أنا عندي الطريق والحل اللي هعرف آخذ بيه حقي، طريقة مبتكرة وصحيحة جديدة في عالم الفن يمكن تلخيصها في كلمتين: (أنتِش وأجري).



الملحوظة الثالثة والأخيرة:

هذا الكتاب لا ينتمي للأدب بصلّة، وهو ليس كوميدي ولا يعتبر ساخر، لا هدف للريح بل للريح الكثير قوي، أي أنه .. وزى ما قولنا في الجزء الأول "مجرد عبث فارغ من أي حكمة"، وحبّة فلوس ضايعين على الأرض وخلص، وعشان كدة حبّيت أفهمك الملحوظة دي، واللي بتقول إن القواعد اللي عدّينا عليها في الجزء الأول لسه ماشيين عليها في الجزء ده، يعني من الآخر ومن غير صدام "هما 30 حكمة ونصيحة يا بنت الناس هنقولهم لك في 30 مشهد و10 فصول، ولسته عندنا تمهيد وحكمة وأحداث ونفس الكلام عشان بس الدنيا تمشي"، واللي مش عاجبها الكلام تسبب الكتاب عشان هما نفس كل حاجة بالظبط، وبالتالي هنقول نفس البداية اللي قولناها المرة اللي فاتت عن إن ده مش كتاب شقّط، يعني حضرتك تروحي ترتبطي وتجيلى بقى زي الشاطرة وأنا أحاول أنقذك من المصايب اللي هتعملها.

أما بقى اللي هسمعها بتقول إني ماكنتش عصبي الجزء اللي فات فأحب أقول لحضرتك إن بقالي 3 ساعات بعدّل اللي بكتبه عشان يليق مع شكل الخط اللي أقرّرت بيه منظمات حقوق المرأة اللي اتبعثلي بخط رقعة، عشان الستات أصلي ومالهش في النسخ "حتى لو الكلام ده هيطلع مطبوع في الآخر" بس أهى تلاكيك بقى.

و أخيرًا بقى - هذا إهداء مني إلى طحالب بشكل عام، وحنجرة البخاري بشكل خاص، وإلى صناع ومؤسّسي "بيس كيك" وكل محبي الألبس واللعبة الحلوة، وتحديدًا برنامج "رومانسية منسية" اللي كان السبب إني أكتب العمل ده بأجزائه المختلفة؛ لأنهم أحسن حد بيقدم محتوى كوميدي في الفترة الأخيرة، ولأنه برنامج بيرز قيمة التعاون بين الراجل والست في كل مشاريع حياتهم "ديمقراطي أهو".



ولذلك أتوجه بالشكر إلي صنّاع هذا المحتوى الرايق، وعلى رأسهم
"يايا، برعي، مروان، حازم، مجدي، كريم، صافي والكتكوت حدوقة".

ثواني كدة!

كتكوت.. عندنا!

إيه يا صافي ده؟!



التمهيد من جديد

في الجزء الي فات عرفنا أكثر عن حياة الديوك بشكل عام والكتكايت بشكل خاص، عرفنا كتكوت وكتكوتة والحج أحما، وحضرنا قصة الحب الكبيرة الي نشأت بين صغار الكتكايت، إلى أن انتهى الجزء الأول باعتراف كتكوت لكتكوتة إنه بيحبها وطلب إيديها للجواز، وعشان الي مش هيشترى الجزء الأول "وهو منهُ لله عمومًا" حببت بس أعرف القارئ المحترم الأول احنا واقفين فين في القصة دي.

دلوقتي بعد ما كتكوت أصبح مبرمج محترم في إحدى الشركات المالتي ناشونال الي بيروحوا يشتغلوا في ستاركس دول، وكتكوتة خلاص بقى عندها الكارير بتاعها الي نجحت فيه، وبعد ما استعرضنا عليكم الأحداث دي، واللي لأن كتكوت لسه غي زي ما هو وراح الصيدلية بعد ما كان فاكرا إن شريط النوستالجيا ده بيعالج البواسير، حايين نبدأ بقى معاكم على نضيف في قريتنا البعيدة عن الحداثة واللا حداثة، وفي منى عن الإنسانية الدقيقة والكون بشكل عام "زودنا كلمة عن مقدمة طحالب أهو عشان ماتقولوش سرقة"، اسمها اقتباس يا جهلة.. اقتباس.. اقتباس حراري ☺

آسف والله خلاص مش هألش ثاني.

بس خلاص بقى المفروض إن الي متابع من الجزء الأول، عارف إن الموضوع ساعات بيخرج عن السيطرة في محاولة صنع هذا الهجين ومعاملته كمحتوى كوميدي بالعافية.

بالمناسبة... فيه هجين سادة وفيه هجين بالسكر ☺

يا سكر!



خلاص والله خلاص، دلوقتي احنا أحداثنا في العالم بتاعنا العادي، وعشان نبقى على بياض كده من أولها.. لو الستات مفكره إني جاي عليها وإنكوا مظلومين والحاجات دي؛ فالرجالة يا حبايبي طلع عين أبوهم في الجزء اللي فات ومحدث اشتكى، محدش اهتم أصلاً يشتري الكتاب "يمكن عشان كده فشل وقررنا نغير الكلام على الستات؟"

مابنقولش كده، مابنقولش كدا |||||

حابب أفهمكم إن الحياة بقت "ويرد" بعد اللي عملته أمبرهيد، واحنا يا حبيبي ناس غلبة والله، وانت غالباً عزيزي القارئ سارق الكتب ده من واحد صاحبك تحت بند السلف الغير قابل للعودة.. زي فلوس دروس الثانوي اللي بتقلّهم من عيلتك كده بالظبط كل أول شهر، أو إنك دورت عليه "بي دي إف" الأول حتى لومش هتقراه، بس انت ضغطت على لينك تحميل كتاب "نامبروان" فقط وحصرنا على جروب إمّح الدولي قبل ما أنا أكتب الكتاب نفسه أصلاً، وبالتالي يا حبيبي محدش فينا معاه كام مليون يعوّض الثاني بعد ما نفصح بعض في المحاكم، عشان كدة بحدّر أي واحدة هترفع عليا قضية لأنني هكسيها زي جوني، بس الفرق بقى إن مفيش ولا واحدة فيكم تعرف "إيلون ماسك" ولا "جيف بيسوس" عشان يدفعها الشرط الجزائي؛ فيايرت نتلم بقى.

بالمناسبة "إيلون ماسك" ده صاحب شركة تيسلا"، أيوة تيسلا بتاعة مروان موسى اللي أنا هفكركم باللي قاله في الفيديو بتاعه عشان على تيك توك "عشان انت ماعندكش بارشفش كوستشافيشفاش عشان ماعيشتش اللي هما عاشوه"؛ ولذلك وعشان أنا قلبي طيب ومايهونش علياً أمرمط كتاكت الناس معايا "هعديها لك المرادي".

مروان موسى – شبرا الخيمة – 2022



الفصل الأول

في مكان صغير في آخر الأرض، متقاطعًا مع 3 خطوط طول ودوائر عرض، وتحديدًا على آخر الشارع اللي بكتبلكم منه دلوقتي كانت المفاوضات تجري بين كتكوتة وعريسها للاتفاق على تفاصيل خطوبتهم استعدادًا للمرحلة القادمة، وذلك بعد يومين من تصريح كتكوت لحبيبته بمدى حبه لها داخل حوش المدرسة اللي ياما جمعهم سويًا من قبل.

وعشان المنحوس هيفضل منحوس، وعشان العيال مابتتعلمش من الدروس، ونظرًا لأن الكون الفسيح متأمرضد جواز الكتاكيت وتكاثر تلك الفصيلة المخملية، قرر العالم الدخول إلى ليفل الوحش ومقابلة النووي في نهائي القرن "حرفيًا" وتكسير كل الحواجز والتوقعات، والوصول بكوكب الأرض إلى حافة الشمس، وذلك بعد إعلان حدوث كارثة عالمية جديدة ورفيعة المستوى، وإعلان حالة الاستعداد القصوى لمواجهة الفيروس اللعين "كوفيد ناينتين"، وهو الفيروس الجديد المتفشي في كافة أقطار البقية، أو كما يسمى أيضًا "فايروس كورونا المستجد".

طبعًا هو مش مستجد دلوقتي ولا حاجة، وأكيد قديم بالنسبالكم، بس هو لسه جديد في الحدوتة هنا في الفترة الزمنية دي يعني، وياريت محدش يعترض.

بلاد قفلت وبلاد فلست، ناس ماتت وناس عاشت، دُول اتشقلبت واقتصادات انهارت، ومدينة الفراخ صامدة ضد الوباء وبتحارب بكل الوسائل الممكنة زي رش الديتول.. لبس كمامات "جمع كُم مش كمامة"، أو القعاد في أرض واسعة مليانة "لُص تنجستين" من اللي بتسخن



الحرارة دي، أو عن طريق عمل مسحات متتالية للفراخ بين كل مسحة ومسحة بيدخل واحد يكنس.

طبعاً الأحداث دي لخبطت صفو كتكوت وعكّرت مزاج كتكوتة؛ لأن خطتهم في عمل خطوبة كبيرة كده في قاعة "عش الزوجية" ذات الوسائد الريشية ووجبات العليقة الساخنة باءت بالفشل، وبعد خناقات ومحاولات وويك وويك انتهى بحسم الجدل واستحالة عمل خطوبة في اللبش ده، واجه كتكوت حبيبته بالوضع الحالي؛ مما أدى إلى صراخ كتكوتة، بكاء عمرو أديب وجنون الشوالي!



مشهد 1

في أحد الكافيات المشهورة بالبلدة بعد جلسة ودية لم تتجاوز الخمس حضور من أهل العريسين؛ نظرًا للإجراءات الاحترازية، قام كتكوت بتليبس الشبكة لعروسته اللي صاحت فيه عشان جاب شبكة مش مخزمة كويس، وده كان هيخلي كتكوتة تتخفق بالرغم إنها قالت إنها مش عاوزة غير خاتم قصّ، وسط نظرات كتكوت البلهاء بعد ما صرح إن ده مش موسم التّوم، وبالتالي مفيش فصوص موجودة دلوقتي؛ ليظهر على وجه كتكوتة بوز طولّه شبرين يكفي لإقامة 3 مدن جديدة، 4 كباري وبزينة "شيل أوت"، بجانب عدد من المحلات زي "ماكدونالدز" و"سيركل ك" اللي ناقص الأقيم في دولاي.

وبعد محاولات عديدة للصالح من الجانبين، وبعد الهئ والهي من قبل كتكوتة، واللي قابلهم وعود من كتكوت بشراء كل احتياجات وطلبات ست الكل، ويا سلام على آخر العنقود أما بيبقى جميل وموجود.

وعشان كتكوتة هيلة فكرت إن كتكوت كان بيلمح لها بأخر العنقود لأنها أصغر اخواتها، إلا إنه كان قاصد محلات 2 ونص عشان يشتريها الخاتم من هناك، ومع ذلك فضلت كتكوتة محافظة على بوزها اللي أصلًا مش بتاعها ده بتاع البط، بالرغم من الأجواء الرومانسية الجميلة اللي أحاطت بالجومع إنهم مابياخدوش سيلفي ولا حاجة.

- مالك يا كتكوتة؟! حد ببقى متضايق كده يوم خطوبته.

- والنني بقى لا خطوبته ولا اللي هياخد في دماغه بطوبته، سيبي في حالي والنني.

- مالك بس يا كتكوتة؟! انتي عارفة احنا بقالنا قدّ إيه بنحلم باليوم

ده!



- خليك انت في أحلامك كده، عمرك ما هتبقي واقعي أبدًا.
- مالك بس يا ست الناس؟
- يعني عملت خطوبة أورد يحي قولت ماشي، مفيش معازيم ولا زفة
- قولت ممكن قولت معلى حذر وكورونا وقلق، مفيش فقرات ولا زفت
- على دماغك قولت طيب.
- والمطلوب يعني؟
- رضا.
- ياستي ربنا يكملك بعقلك، طب ما هي محلولة أي، عاوزه إيه بقى؟
- رضا، ما أنا بقولك أهورضا.
- يا ست كخة الحمد لله، انتي عاوزه إيه ماتقرفيناش؟
- انت غبي يلا؟! رضا.. عاوزه فرقة رضا.
- فرقة رضا؟!!
- أيوة، ويغنولي كمان (البت بيضة بيضة البت بيضة وأنا
- أعمل إيه)!
- طب دول الله يرحمهم أجيئوملك منين؟! وبعدين إيه بقى فقرة
- الحنين للذكريات دي؟!!
- ذكريات إيه!
- ذكريات طفولتك، مش بتقولي البت بيضة يعني أكيد كانوا بيغنولك
- واتي صغيرة.
- يا ربي ع الغباء! كتكوت بيضة دي لون، يعني بيضة وحلوة كده.
- بس انتي صفرا!!
- أنا صفرا يا أبو لسان عاوز يتقطع، حوش أمك الحرياية ولا أختك
- قليلة الرباية.
- كتكوتة بلاش هبل احنا كلنا صفر، احنا كتاكيت يا متخلفة.



- مممممممم ماشي.
- طب والله انتي عبيطة و أنا كنت محضرك مفاجأة.
- خير؟!
- جاييلك مطربك المفضل.. عمرو دياب.
- بجد؟! عمرو هيجي دلوقتي ع المسرح؟
- لا على فلاشة عادي.
- "تبدأ الأغاني"
- بس بس اطفى القرف ده.
- مالك يا كتكوتة؟
- مش عاوزة حاجة، انت شكلك عاوز تبوظ الجوازة من الأول.
- أنا؟!
- طبعاً، ما هو لما تشغل أغنية واحد بيقول فيها "أنا ديك تعالى" يبقي انت عنصري وبتكره الستات.
- ؟!
- أنا غلطانة أصلاً إني وافقت عليك م الأول.
- كتكوتة أنا..
- الحمد لله إننا لسه ع البر.
- وقف كتكوت مش مصدق اللي بيحصل ولا فاهم المفروض إيه اللي يعمله عشان يرضي كتكوتة اللي مفيش حاجة عاجباها.
- النصيحة الأولى بتقول:
- "النكد يرتبط ارتباطاً طردياً بقلّة المزاج، وعكسياً بنجاح العلاقة".



لما نتكلم عن الستات ماينفَعش ننسى نتكلم عن أصعب وأرخم وأكثر وأهم حاجة بيعملوها في حياتهم.. وهي النكد، وعشان الست المصرية الأصبيلة اللي بتتولد بكر وموسومات النكد وراثيًا، وبتبقى متخصصة فيه بشكل ممكن يدمر أي لحظة حلوة في حياة الإنسان، هتكون نصيحتنا الأولى هي معاملة النكد زي ما بنعامل الفحم القايِد.

اعتبري إن النكد ده هو النار اللي بتحرق أساسيات العلاقة، وبتدمر أي نسيج حيوي إيجابي بين أي اتنين؛ لأن الراجل بشكل عام بيدور على حياة هادية ومستقرة، ونادرًا ما بيكون هو السبب في النكد أصلًا إن لم يكن مستحيل، عشان كده لو قابلتي حاجة مش عاجباكي ممكن تعترضني عليها بكل هدوء، وهيبقى حقك ومحدث هيلومك في حاجة، بالعكس هتتحول الاتهامات للراجل لو لم يستجيب ليكي، عشان تعرفوا توصلوا لنقطة خلاف عقلانية زي ما قولنا والأمور تمشي.



مشهد 2

بعد الخطوبة ما خلصت بسلام، وبعد ما الدنيا بقت كله تمام، وبعد فقرات الغناء والرقص وصور الأفيش، ومع الكثير من "مالك؟ - مفيش" تم إنهاء مراسم الخطوبة على خير، وقام كتكوت بتعديل حالته على الفيس بوك إلى خاطب بعد ما نزل صورته هو وكتكوتة، وطبعًا مانسش إنه يلغوش على صورة كتكوتة بتاعة الخطوبة إثباتًا منه إنه راجل جامد وحمش بيغير على حريمه، ثم قام بعمل مشاركة للفيديو اللي بيرقصوا فيه هو وكتكوتة عقباوي على مهرجان مسلم الجديد معلنًا كتكوت ذلك "إن مسلم ده أكيد راجل مسلم يعني، وكلنا إخوات في الإسلام طبعًا؛ فمفيش مشكلة إنه ينزل الفيديو والناس كلها تشوفها عادي" في حالة غريبة من الازدواجية مختلة المعايير والآداء!

في الفترة التالية للخطوبة بقى اعتاد كتكوت على النزول بالتاكسي اللي كان شغال عليه زمان عشان يحسن دخله، وبالرغم من إنه أصبح مبرمج محترم في شركة كبيرة بقاله كام سنة "صحيح هو بيشتغل عشرين ساعة في اليوم وما بينزلش أجازات ولا أعياد وما بياخدش جنيه مكافئة، وساعات ما بيَقْبَضْش عشان هو ابن الشركة" إلا إن الشغل مش عيب ومفيش مشكلة من مبلغ إضافي عشان يعرف يتنيل يجيز نفسه بسرعة ويتجاوز كتكوتة.

لذلك، وفي أحد الأيام الغبرة اللي كان كتكوت يحاول يخلص مصالحه ومشاوره عشان يروح إذ يتفاجئ بواحدة ست كسرت عليه فجأة من غير إشارات، وجابتله وش رجله ووش العربية وفانوس ورفرفين وإكصدام خلفي، وبعد ما ركنت ونزلت مسكت فيه عشان يصلحها الخربوش اللي في الجنب؛ لأنها مش غلطانة ومش من حق حد يتحكّم فيها



ولا يعرف هي رائحة فين أو إشارتها أزاى! وطبعًا مع الخناق والصوت العالي، وبعد تدخل سواقين النقل العام في الموضوع عشان يتحل بالتراضي من قبل كتكوت تحت تهديد السلاح، ولأن كتكوت طبعًا كان خايف يتضرب لسببين..

أولًا: إن الرجالة في مصر بيحبوا يجاملوا الستات قوي، حتى لو مايعرفوش إيه سبب الخناقة أو إيه الموضوع تلاقهم راشقين في الحوار وخلص.

ثانياً بقى: لأن السواقين أقويا جدًا، السواقين.. أقويا.. جدًا.

ماكانش فيه حل ممكن يرضي الطرفين غير إنهم يروحوا القسم، وهناك اكتشف كتكوت بالصدفة إن رخصه منتهية، وبكده مفيش قدامه حل غير إنه يكلم كتكوتة تكلّم ابن عمها اللي شغال في المرور عشان يجي يلحق كتكوت من حظّاط "فرج"، وما أدراك ما فرج في الأدب العربي عامة والمصري خاصة!

- مش عاوز أسمع صوتك تاني، مكاملة وعمّلت.. صلح مارضتش.. أظن كده مالکش حجج تانية وهتتحبس يعني هتتحبس.
- يا جماعة والله أنا مظلوم ومخبوط، الست دي هي اللي غلطانة، امسكوها هي.

- بس الست معاها رخص عربية سارية.

- ما أنا كمان معايا رخص عربية.

- سارية؟

- نعم؟

- الرخص سارية؟

- هو فيه رخص بتسير لوحدها يا باشا، ولّا احنا عشان كتاكيت

هتفكرنا في ديزني لاند؟!



- تصدق أنا هحبسك عشان طولة لسانك، انت عارف رخصك منتهية من امتي؟

- والله العظيم ظلم، أنا آخر مرة مجدّدها لما الزمالك خد الدوري.

- أيوه الكلام ده من سبع سنين.

- !!!!! طب سامحني بالله عليك، والنبي سيبيني أعمل مكالمة ثانية.

وبعد مكالمة كمان لكتكوتة اللي كانت نسيته، وعدى ساعتين ثلاثة لحد ما جات هي وابن عمها وخرجوه بمعجزة، فضلت كتكوتة طبعاً تزغده بكلام يحرق الدم عن استهتاره وعدم تركيزه وإحراجه ليها كل شوية، بالرغم إنها عارفة إنه كان نازل يجيب فلوس زياده عشان يكفي طلباتها ويقدر يحقق أحلام أبوها المبالغ فيها.

"الدعم النفسي فرضاً في الأوقات العصيبة"

النصيحة الثانية بتقول إن الدعم النفسي واجب لا بد منه، ويمكن احنا قولنا النصيحة دي في الجزء الأول قبل كده، وجاين دلوقتي نكررها ثاني..

الدعم النفسي هو واحد من أهم الحاجات الملزمة للطرفين بدون عقود مكتوبة، وزى ما قولنا إن دعم الست واجب، حالياً بنقول إن دعم الرجل فرض، لزام على كل ست بتدور في بيتها على حياة هادية وعلاقة متزنة، الرجل مش كورة حديدية خالية من المشاعر والعواطف، ولا هو ماكينة إنتاج خماسية شغالة بالكهربا، وحتى لو مشينا ورا النظرية دي وأمنّا بها؛ يبقى لازم نفهم إن كل راجل فيه طاقة لازم تتشحن كل فترة، وإن الدعم ده بيكون هو الأحنّ ومصدر الطاقة اللازمة لإعادة ملء بطاريات الرجل، خصوصاً لو كانت طاقته مستهلكة في أمور خاصة بتحسين وضعكم أو تحسين العلاقة بشكل عام في وضعها المادي أو النفسي.



مشهد 3

الصين حلوة، لا مش حلوة.. بقولك حلوة؟! يابن ال!#@%٨

وسط أجواء نقاشية لطيفة وفي غاية الهدوء داخل إحدى قنوات التليفزيون اليومي المحلي في واحد من أشهر برامج التوك شو، دار الحديث حول مصير مصر والعالم من الفيروس الأخطر والأسرع من شبشب الأم المصرية لوجه أحد أبنائها المذنبين، صرح الخبير الإستراتيجي "خالد إستريس" إن الفايروس ما هو إلا مؤامرة روسيصرية للسيطرة على العالم، لكنها باءت بالفشل بعد نزولها مصر، بعد ما اتلخبطت الأجسام الناقلة للعدوى بين ذرات الفيرس وذرات الشيكولاته المحلية من اللي بتحمل اللقب نفسه.

وبالرغم من إن خالد إستريس نفسه ماعهوش أصلا غير معهد في لاسلي، وساقط إعدادية مرتين، إلا إنه فجأة بقى صاحب رأي واستشارة وطالع يهيص مع الناس اللي كلها بقت خبراء ومحللين دي، كده مش ناقص غير إن عم حمدي البقال يعلن نفسه رئيسًا لرابطة الخبراء الاستراتيجيين إيمانًا منه بأن محل البقالة بتاعته في أهم موقع استراتيجي في البلد، وهو أولى من العالم الزياطة دي كلها، والموضوع كله مش هيجتاج غير بدلة وكرافتة وقصة عند هشام ربيع، وبعد كده يطلع على قناة الصحة والجمال 8 أيام في الأسبوع!

وبالعودة إلى سياق الحديث مع خبيرنا العظيم دكتور خالد "الحاصل على الدكتوراة الفخرية من جروب استراتيجيون لكن ظرفاء"، واللي كان شايف إن حل الأزمة وعلاج المشكلة في الكتاكيت نفسها؛ لأنه بالمقارنة بين الكتكوت العادي "اللي عايش بقائه جزئين وعمال يحب ويخطب وساحلنا معاه ده بالرغم من صغر عمر الكتاكيت"، وبين أخوه الكتكوت



أبو جنية اللي بيتباع في كرتونة على باب المدارس الابتدائي في باب اللوق "واللي لا يتجاوز عمره بضعة أيام" وبترجع ثاني يوم تشتري من نفس الرجل زي العبيط بعد ما يحلفلك إنهم كتاكت فرز أول ومايموتوش حتى لو شويتهم في الفرن طمعاً منك في الحصول على مشروع مريح جداً في وقت قياسي للغاية، هيتضح لنا إن السر في الوحلة والكنز في الرحلة، وإن الكتاكت عشان تقدر تعيش وتتجاوز المرض لا بُدّ وحتماً من تنفيذ الخطة الجهنمية والمتلخصة في التلقيح الدوري لجميع السكان أملاً في العلاج السريع.

وبالفعل استجابت الكتاكت لكلام الخير، وبقوا كل يوم الصبح يصحوا يلقحوا على بعض بالكلام، ودي تشتم دي ودي تعيب في دي ويعايروا بعض في الراححة والجاية، لحد ما الأزمة أوشكت فعلاً على الانتهاء، مش عشان كلام الخير طلع صح، إنما عشان احنا شعب مُرزق بطبعه، وأساساً الخير دي شغلانة العواطلية والفاضيين وأي حد مش لاقى أي حاجة يعملها.

وطبعاً عشان الفقري فقري والمنحوس منحوس، تم إلقاء القبض على المدعو كتكوت قبل ليلة واحدة من إعلان نهاية الحظر بتهمة كسر مواعيد العمل الرسمية والسهري محل البلايستيشن الخاص بصاحبه "ثمثم"، ولكن المرادي العلقة ماطولتش بالرغم من إنه قابل نفس الظابط بتاع المرور اللي عكشه المرة اللي فاتت، إلا إن ربنا ستر في آخر لحظة وعدت على خير المرادي بإعلان انتهاء الحظر رسمياً.

- حمد لله ع السلامة يا كتكوت.
- الله يسلمك يا كتكوتة.
- الحمد لله عدت على خير.
- الحمد لله، تعالي أروحك وأرجع البيت قبل الحظر.



- لا ما خلاص مفيش مرواح، الحظر اتفك.
- آه، عشان كده خرجونا.
- أيوة، أنا مش قولتلك تخلي بالك من نفسك يا كتكوت وتروح بدري؟
- يالا اللي حصل بقى الحمد لله، تقدري تنزلي احنا خلاص وصلنا.
- طيب مش هتطلع معايا تطمنهم عليك؟
- لا مش عاوز، أنا هروح الف شوية لوحدي.
- طب أنا هاجي معاك.
- معلىش يا كتكوتة خلمها مرة ثانية، أنا فعلاً محتاج أبقى لوحدي.
- هو إيه اللي لوحذك؟ لا طبعاً مش هينفع.
- كتكوتة لوسمحتي، محتاج.. أبقى.. لوحدي.
- طيب لما انت عاوز تبقى لوحذك خطبتني ليه؟ طالما مش محتاجني في حياتك يبقى أنا قاعدة ليه؟ طالما ماليش أي تلاتين لازمة في حياتك يبقى أنا موجودة ليه؟
- الي كتكوته عملته ده هو مصيبة في حد ذاته؛ لأن النصيحة الثالثة بتقول:

"احترم المساحة الشخصية لشريكك ولا تخترقها".

الرجالة بشكل عام كائنات صامتة أكثر من الستات، هو ربنا خلقنا كده، عشان كده دايمًا بنشير للشخص اللي بيتكلم كتير بوصفه "يرغي زي الستات"، يمكن لأن دي الطريقة الوحيدة لتفريغ طاقة الست وأفكارها، إنما الراجل بقى عكس كده تمامًا..

احنا بنلجأ للصمت والعزلة في لحظات حياتنا السوداء، المساحة الشخصية أو الفقاعة اللي بيخلقها الراجل بتكون هي المحرك الوحيد اللي بيساعده على متابعة الأحداث من خلال الفراغ لاني هو صانعه



لنفس؛ ه عشان يقدر يقيّم المشكلة أو المشاكل اللي عنده لحد ما يلاقي ليها حل، عشان كده مش من الصبح إن الست تحاول إجباره على الخروج من دايرة الصمت، أو حتى تحاول تخشّلُه هي جوّه المساحة دي؛ عشان ده بيعمل خلل في شكل العلاقة المبنية بين الرجل و أفكاره بشكل عام، زي بالظبط الطالب اللي بيبقى موزع ورق مذاكرته ليلة الامتحان بطريقة – قد تبدو فوضاوية– إلا إنه بيكون عارف هو مرتبها ازاى، وأي محاولة للتدخل بتبوّظ ترتيباته ونظامه الخاص.

الرجل بيعجب يبقى لوحده في مواجهة مشكلاته، حتى لو الست بتحتاج في وقت زعلها إنها تعبّر عن اللي جواها في وجود شريك حمل، إلا إن الرجل بيفضّل العكس، وبيختار يكون الشريك الوحيد لنفسه والمسؤول الأول عن معالجة أموره، والله العظيم مجهودات الست تقدّر وهي في غاية الاحترام وواجب علينا شكرها على محاولة تقديم الدعم، بس فعلا الرجالة مش كده! يمكن لأنها محاولة مننا لإثبات قدرتنا على تحمل الصعاب، يمكن لاقتناع الرجل عمومًا إنه العنصر اللي شايل الدنيا طول الوقت عشان يحسّن العلاقة ويحسّس الطرف الثاني بالأمان؟

جايز، بس الأكيد إن الرجالة بتحترم مساحتها الشخصية وبتحجها، وبتحب الست اللي تفهم وتقدرده.





الفصل الثاني

دلوقتي خلاص الغُمة انتهت، الأزمة خلصت، وانقشع الظلام أخيرًا من على مدينة الفراخ بعد انتهاء فيروس كورونا وتبعياته.

أسمع واحد محترم بيقولي فايروس إيه ده اللي خلص في ١٠ صفحات؟! يا راجل ده دوري المدارس بيقعد ٤ شهور! انت جاي تشتغلنا ولا انت كاتب على الله وجاي تضبّش ولا إيه؟! انت جاية معاك بايه أولًا؟ جاية معاك بايه؟ يعني بعيدًا عن إنهم فراخ وماجالهومش انفلوانزا الطيور حتى، وبعيدًا عن كل الأخطاء العلمية اللي انت عمال تهيد فيها من أول الرواية واحنا سايبينك، إنما تجيب فيروس قضى على نص العالم وتخلصهولي في شوية الهمبكة ولعب العيال ده، مش هسمحلك يا حبيبي.. مش هسمحلك يا بابا!

طبعًا عشان أنا كاتب مخضرم وعارف انتوا بتفكروا ازاي؛ فاللي مش مقتنع إني صح أقولُه لا يا حبيبي، ارجع يا بابا للجزء الأول هتعرف إني كنت بقفل كل فصل بطريقة هرمية منظمة، يعني مش لازم تبقى حنبلي قوي كده وحاول تستمتع باللي مكتوب وخلص، أصل يعني انت مش جايب كتاب لداروين عن أصل الأشياء، ده كتاب لداروين عن النكد والابتلاء في شكل فرفشة خفيف متضاف لها شوية واقعية عشان تفصل بيه من حياتك البائسة يا وحيد يا فاقد الشغف بدل ما انت مصدّع اللي جابونا بوستات كثيفة وصورع السوشال ميديا تسد النفس.

المهم يعني عشان ما أطوّلش عليك أكثر من كده، وتوفيرًا للوقت الضايع في التمهيد اللي بقى أبوخ من إفهات مسرح مصر (كعادة أي شيء بيتقدّمه جزء ثاني يعني)، وعشان التجربة دي لو نجحت هتبقوا مضطرين تستحملوني أكثر من كده كمان، وده طبعًا مش هيحصل لأنني



كاتب شاب لا يدعم النسوية، إنما لو كانت واحدة هي اللي كاتبة الكتاب ده كنتوا دخلتوا واتباد تقرأولها خمستلاف صفحة، ولو كان بس مجرد تجمع نسوي بين أي اتنين ستات كان الحديث ممكن يستمر سنوات بلا نهاية، أو حتى تكتشف كل واحدة في آخر القعدة إنها اتجوزت وخلفت وعيالها اتجوزوا، والكلام لسه ماخلىش؛ لينتهي الحوار على وعد باستكمال الحديث في مكالمة تليفونية عمرها أطول من اكتشاف مقبرة توت عنخ آمون.

بالمناسبة.. في معلومة مغلوبة عن هذا الملك الشاب، هو أصلاً كان اسمه كتكوت عنخ آمون، وكان زعيم قبيلة الفراخ الضالة، واللي بعد وفاته اتكتب اسمه بـ "نعكشة فراخ"؛ فأخطأ المكتشفين في قراءة الاسم الصحيح ليصبح توت بدلاً من كتكوت، واللي يثبت النظرية زي هو وجود بعد الآثار الخالدة في مقبرته، واللي كانت عبارة حرفياً عن الفرخة اللي بتبيض بيضة ذهب.



مشهد 1

بعد انتهاء فترة الخطوبة اللطيفة الحلوة في البدايات؛ لأن كلها حكايات، وبعد الخروجات والاستوريز وحفلات السينما ال midnight، وفي فترة المكالمات المسائية الطويلة ومشاركة الأحلام والطموحات، ببداً كتكوت يكتشف المشاكل الكثير اللي هو واقع فيها ومالهش أي حل، خصوصاً لو كان شغال في مصر الحديدية ومضطر يقف ٣ ساعات كل يوم الصبح على كوبري الحلمية، ويتأمل في جمال القاهرة من فوق الكوبري وكأن البشر اختفوا فجأة من كل العالم، وجاء سكان الكون والأكوان الموازية، والحاج فتحي وأم جمعة وعم عبده وابنه سمعه عشان يتجمّعوا في ميدان الحلمية يومياً في تمام الساعة الثامنة صباحاً، وترك باقي العالم خاوياً من أي بشروكأننا في فيلم نهاية العالم ٢٠١٢، والسفينة المنقذة هتعدّي على ميدان الحلمية تلمّ الناس وتحملّ بيهم "الأخريا حضرات!".

لذلك، وبعد الإفاقة بقي من الغيبوبة الجميلة دي وانتهاء الأحلام الوردية بجملّة "بينك يا مئى؟!" يكتشف كتكوت فجأة وبدون سابق إنذار إنه بقي مطالب بالاستمرار يومياً في تلبية مكالمات هاتفية دورية بمعدل ١٠ دقائق للمكالمة كل ربع ساعة لاختيار لون الطقم اللي هتلبسه كتكوتة حتى يصلح متماشياً مع لون الطرحة ولون الجزمة اللي لا بدّ تبقى متماشية مع لون عربية أوبر، لون الأكل يتماشى مع لون ياسمين صاحبها، قصدي لون الفلتر اللي هتتصور بيه صاحبها، ولون الجراب زي لون الدولاب مع لون بدلة السجن للحرامي اللي تاب، ولون الباديكير مع لون المانيكير شبه لون المبرد اللي بيخلها تغيّر وهكذا.

ويفضل كتكوت الغلبان مسحول طول اليوم في مشاحنات وخلافات على أسباب ومشاكل أبسط من البساطة، وتبدأ رحلة متواصلة من الزن



لا تنتهي إلا بحساب بنكي، hr letter، وشهادة ٢ موظفين من البنك بحسن السير والسلوك، وتكون مختومة من عند مدام عفاف اللي في الدور الثاني بختم النسر.

- صباح الخير يا كتكوت.
- صباح الخير يا حبيبي، مالك زعلانة ليه؟
- مفيش.. مخنوقة شوية بس، ماتنساش تعدي تجيب الفستان الأزرق اللي قولتلك عليه.
- حاضر والله مش ناسي يا حبيبتي، هخلص شغل بس وأروح.
- كل مرة بتقول مش ناسي، يا رب ماتنساش فعلاً.
- أنا عمري نسيت حاجة تخص القمر بتاعي قبل كده؟!
- يوووه، ما علينا بقي.. انت فين كده صحيح؟
- أكيد في الشغل.
- غريبة! ماقولتليش يعني!
- لسه واصل من شوية صغيرين.
- آه، هي سارة عندك؟
- في مكتبها قريباً، اشمعني؟
- مفيش، ابقى بس قولها تفكرك بالفستان الأزرق اللي هتنساه.
- ياستي والله العظيم ما هنسى، بس ثواني كده! اشمعني سارة؟!
- عشان بتتمرقع عليك، قصدي يعني مهتمة ببك زيادة قوي قوي قوي.

- يا ستي لا مهتمة ولا حاجة عادي يعني، وعموماً أنا طلبت أتنقل من القسم مخصوص عشان أبقى لوحدي وما أحتاجش لحد يفكرني بالفستان.

- مش فارقة، أروح أنا أشوف اللي ورايا.



- ماشي يا كتكوتة، أنا هخلص وأكلمك.
- ياريت ماتنساش بس، مش هيبقى المكاملة والفستان.
- يا فتاح يا عليم ع الصبح، حاضريا ستي مش هنسى.. يلا بقى عشان مديري جه.
- ماشي يا سيدي، محمد رسول الله، كتكوت يا كتكوت...
- خير؟
- ماتنساش الفستان.
- @٧٣٦(٣)&\$٨٤٤((٣))٣
- الأزرق.
- ٨٢٧٢٦٢٦١٩:;\$٣&:!
- قول لسارة تفكرك بقى.

"الزن ع الودان أمر من السحر"

النصيحة الرابعة الي أحب أقدمها لكل ست أعرفها، ولو أطول أصحّي الأموات أعرفهم النصيحة دي كمان هعمل كده، النصيحة بتقول إن الزن ع الودان عمره ما كان حل، أمر من السحر صحيح زي ما قالوا؛ لأن فيه تأثير السحر الأسود على العلاقة؛ عشان كده هو مش بس أمر من السحر.. ده أمر من العلقم نفسه.

الراجل بشكل عام مابيجبش الزن خالص، مابيجبش المشاحنات في الكلام وبيتجنها قدر الإمكان، ده لأنه بنسبة كبيرة بيكون راصص الأفكار جوة دماغه بطريقة هرمية معينة، وفي اللحظة الي الست بتزن فيها على حاجة ما بيكون بالظبط كأنتك بتحطّ جبل كبير على سنّ الهرم ده من فوق، ودرجة بعد درجة الهرم ده بينهار تمامًا، ومابيسيش فرصة تانية للسيطرة على الوضع المأساوي.



وفي محاولة الرحا لضبط لجام لسانه وتقويم نفسه ضد مصاعب الحياة بشكل عام، بتيجي لحظة الزن أشبه بالرصاصة اللي بتخليه يفليت من أعصابه وتهرب منه بعض الترتيبات والأفكار المرتبة في سياق حياته، وعشان يتجنّب المشاحنات والجدل اللي لا هيودي ولا هيوجب مابيكُونش قُدّامه حل غير السكوت أحيانًا، أو اللجوء لشخص تاني بطريقة غير صحيحة هربًا من الشخص أو العلاقة المؤذية لوجوده وإنسانيته!



مشهد 2

بعد خناقة طويلة عريضة دارت كالعادة بين كتكوت وكتكوتة انتهى اللقاء واتحسّمت النتيجة في الجولة دي بـ ٣ أهداف رئيسية:

الأول: إن كتكوت طبعًا طلع هو الغلطان في الموضوع.

الثاني: إن كتكوتة غلبانة ماكانتش تقصد تزن عليه.. والثالث سجّله صلاح 😊

وطبعًا عشان كتكوت ينبي المهزلة دي بأسرع ما يمكن وبأقل عدد من الخسائر، قرر يرزّح يصالح كتكوتة في بيتها زي ما كانت بتعمل في الجزء الأول "عجّلة ودوّارة يا صاحبي والله"، وأهو بالمرة يطمّن على حماته اللي أصيبت بالزكام الشديد بعد جلستها المسائية مع مجموعة من الفراخ المجمدة في جروبي لبحث أيّدولوجيّات النظام الكوكبي في عالم الرجال الغبي.

وفي رحله طويلة جدّا أطول من رحلة أنيس منصور حول العالم من أجل الوصول إلى منزل كتكوتة القابع في أطراف المعادي، أصلها معروفة.. "الأرض - المريخ - المعادي"، قرر كتكوت يجيب بلوّزة يصالح بيها كتكوتة من أحد البراندات المعروفة، واللي مش هنقول اسمه عشان الضرايب، إذ به يتفاجئ إن التيشرت في فيليب بلين عامل ٣٦ ألف ٢٣٤ جنيه، مشي كتكوت وهو بيكُجّ بعد ما كان هيشرق وهو بيسمع البيع بيقول إن الرقم ده من العملات الرسميّة للبنك المركزي مش فلوس في كاندي كراش ولا حاجة، وبالرغم من إنه رقم مبالغ فيه خصوصًا من توكيل رجالي في الأساس، حلف كتكوت طلاق ثلاثة ماهو جايب غير ٣ كيلو برتقان بحجّة إن البرتقان حلو وماليان فيتامين "سي"، وهينفع لعلاج البرد وعلاج الجيب على حد السواء.



- أهلاً بالبيه، عم الكتاكيت اللي مابيعلَطُش أبداً.
- خلاص بقى يا كتكوتة، مش صالحتك والموضوع خلص؟
- لا يا حبيبي ماخليصُش، لولا إنيك جاي عشان مامي أنا كنت لا يمكن أو افق أقابلك أو أدخلك البيت.
- مامي! الله يرحم أبوكي اللي كان عاوز يعمل عمليّة ويقلب فرخة لما عرف إن كرتونة البيض سعرها زاد.
- بتقول حاجة؟!
- لا يا حبيبي بكجّ بس.
- هاتشووووو، ازيك يا كاتشوووو؟
- ازنيك يا مامي، قصدي ازنيك يا طنط؟
- مالك مزعل كتكوتة لي لي هاتشوووو؟
- والله أبداً، ده كان مجرد سوء تفاهم بس.
- لا يا مامي مش سوء تفاهم، كتكوت مابقاش بيجبني خلاص، أنا مش عاوزة الجوازة دي.
- يا بنت الناس ما أنا جبنت الفستان وماتسُش أهو.
- لا يا حبيبي مش بتكلم ع الفستان، أنا بتكلم على الست سارة.
- مالها ست زفتة؟
- انت لازم تسيب الشغل ده خالص.
- يا سلام! وأقعد جنبك نشحت ع الرصيف صح؟ يا كتكوتة الدنيا واقفة ومفيش شغل في البلد.
- يا بنتي ما هو عنده حق، يعملك إيه يعني؟
- والله بقى دي مش مشكلتي، يدور على شغل في أي حاجة تانية.
- يا كتكوتة مش هينفع، والله ما هينفع، أعمل إيه يعني عشان أفهمك؟!



- ماليش دعوة.. ماليش دعوة.. ماليش دعوة، يا أنا يا الشغل يا كنتكوت بقى.

- ده آخر كلام عندك؟

- آه وما عنديش بعده.

- طيب يا كنتكوتة براحتك، بس افتكري إن انتي اللي اختارتى.

"الأدب يا حبيبي فضّلوه عن العند"

النصيحة الخامسة بتقول إن الست العنيدة ماتعرفش تفتح بيت، الست اللي مش باصّه غير لمصلحتها الشخصية ماتنفعش خالص، مش عيب إن الست تبدي اعتراض على حاجة معيّنة أو على غلط هي شايفاه، ده حقّها ومحدثش أبداً هيقدر يلومها.

إنما الموضوع يتحوّل لطلب الشيء من باب العند ده بيخرّب أي علاقة، خصوصاً لو الست وصلّت الراجل لزاوية واحدة مقفولة للنقاش ومفيش منها أي مهرب أو وسيلة للخروج ، هيلاقى نفسه تلقائي بيُصَاب بالعمى ويبدأ يلوّش في أي حد قدامه عشان يهرب؛ لأنّه بقى عارف إن الحاجة اللي هيجي على نفسه مرّة عشان يعملها هتبقى حق مكتسب بعد كده، خصوصاً وإن العند في التفاصيل الصغيرة بيؤدّي في الآخر لخراب البيوت؛ لأنّ التفاصيل الصغيرة دي هي الفسيفساء اللي بتعمل اللوحة الكبيرة وبترسم الحياة.

عشان كده من الصح جدّا إن آداب الحديث بين الطرفين تكون بالتفاهم، دي الحياة أصلاً قايمة على المودة واللين في الحديث، عشان ماترجعش الدنيا تبُوظ بعد كده ونلاقى ما لا يحمد عقباه.



مشهد 3

كأي شاب كتكوتي جميل يفكر في إنهاء حياة العزوبية وبدء حياة جديدة كان لا بُد من وجود شقة يبدووا فيها حياتهم.

هو معروف إن الشاب بعد ما بيتخرج ويشغل لازم يبدأ يدور على سكن، خصوصاً لو كان شاطرزي كتكوت وأنهى الخدمة العسكرية على أكمل وجه، متحدياً الصعاب ومانعاً أي خطر عن كوكب الفراخ.

و بالرغم من إن كتكوت كان من عيلة ميسورة الحال، وأبوه الحج أحما راجل مقتدر كان شاريلهُ شقة بالتقسيط في حي الفروج الجديد، واللي بيقع بالضبط بين مدينتي "بدر والبروج"، واللي قرّر بعد تفكير طويل إنه يستثمر الشقة في عمل الخير عن طريق كفالة طفل يتيم مات أبوه على إيد أحد العناصر الإرهابية من غزاة البط، ولتكريم هذا اليتيم قرّر الحج أحما إنه يتجوّز من أم اليتيم في الشقة الجديدة عشان يرّي الولد ويرّي كتكوت بالمرّة بعد ما هيكون ضيّع عليه فرصة الجواز في الشقة بسبب اليتيم، وأم اليتيم، وأهل اليتيم نفرنفر.

و في إحدى المرات الكثير اللي كانت كتكوتة بتقلّب فيها على الفيس بوك وبتقابل إعلانات شقق، نظراً للذكاء الاصطناعي ولوغاريطمات الدعم الجديدة اللي بقت تجيبك الحاجة بمجرد ما تفكر فيها، يعني مش بس لازم تنطق اسم الحاجة عشان تجيلك، لا ده كمان بقى مجرد التفكير في الحاجة كافي لأن الحاجة تظهرلك في محركات البحث زي ما بتفكر انت فيها، إيه ده؟! صور صوفيا لورين!

امسح امسح بسرعة، اعمل scroll بسرعة يا بارلو، خلاص تمام كده! وقفّلي بقى يا ابني البتاع ده عشان ما تنفضحش، تمام تمام.



المهم بقى نرجع ونقول إنه في أحد تلك الإعلانات عشوائية الترتيب ظهر لكتكوتة إعلان شقة في مدينة نوربتاعة طُلّعت مصطفى الجديدة قرب العاصمة، وبسؤال المختصّين عن أسعار شقق الشباب على حد قول الإعلان، اكتشف كتكوت إن قسط الشقة لا يتناسب إلا مع تاجر سلاح أبيض أو مستورد ديناميت، فمش عارف يعني هو قصده الشباب اللي هو احنا يعني ولا شباب المهرّبين اللي بيستعينوا بتمائيل أجدادنا الفراعنة!

- مش أنا شوفت النهاردة ع النت شقة حلوة قوي.
- إيه نظامها طيب؟ فين مكانها؟ كاش ولا تقسيط؟
- مش عارفة، ممكن تسال في راية ستور.
- لا يا حبيبتي، احنا بنقسّط شقة مش سماعات بلوتوث.
- على فكرة بقى أنا شوفت بوست بيقول إن واحدة ست قسّطت شقتها مع راية على ١٠ سنين.
- قصدك رفعت الراية بعد ١٠ سنين، مفيش الكلام ده طبعًا.
- طب ٧ سنين في حدايق أكتوبر، ٣٠ ألف في الشهر.
- هي حدايق فعلاً ولا حرايق؟! أصل دي أسعار نار.
- جروب العقارات بيقول ادفع ٥٠ جنيه مقدّم وقسّط مدى الحياة.
- طب بدمتك انتي مصدقة؟ دي أكيد شقة بطيخ.
- على بيدج خلعون، فيلا دورين ب ١٢٠ ألف جنيه في المعادي.
- خلعون في المعادي؟! طب ما عادي.
- ليا واحدة صاحبي ع الفيس ممكن تساعدنا في الرماية.
- ميدان الرماية؟
- لا الرماية نفسها، هتساعدنا نرمي المشاكل ورا ظهرنا.
- كتكوتة.



- النجف ببلاش من على بيدج نوّرها.
- يا حاجة!
- السريركادوه من على منندی سهرها.
- ممممممم.
- آه وبص.. دلوقتي على انستجرام لو ضغطنا ع اللينك ده هناخد بطاطين هدية.
- قسماً بالله مفيش الكلام ده، ارحميني.
- يا ابني انت رجعي، العالم كله بيتعامل دلوقتي من ع السوشال ميديا، ولأ انت بقى غيّران عشان أنا بقيت بلو جر مشهورة يا أبو ٣٠٠٠ متابع انت.
- رَجِّعي كمان؟! عندك حق.
- ما هو كل الناس منزلة صور الحاجات اللي كسبوها أهو، دول في المالديف، ودول في الساحل، أما دول بقى في الجونة، مش انت اللي حتى مش عاوز تودّيني ألبانيا زي الناس اللي راحت دي!
- "السوشال ميديا هي فقاعة كبيرة تحتاج إلى التوقف".

خَلّيني في النصيحة السادسة أتكلم عن مشكلة بتقابل كل الناس دلوقتي بشكل يومي، هو صحيح المشكلة المرادي مش مقتصره ع الستات بس، إلا إن بسبب شبكاتهم المعقّدة واهتمامهم الزايد بالسوشيال ميديا عكس الرجالة، بيكونوا همّا الأكثر عرضة للاحتكاك مع المجتمع الخيالي ده بشكل أكبر.

عشان كده حابب المرادي أنصح الستات بعدم الانسياق ورا كلام وإشاعات السوشيال ميديا، الناس اللي بتضحك طول الوقت دي عندهم مشاكل، الناس الفرحانة ودايمًا بتصدّر صور متماسكة همّا



الأكثر صدامًا في حياتهم الخاصة، وللأسف دلوقتي بقى فيه ظاهرة جديدة معرفش مين السبب في انتشارها؛ وهي تشجيع الستات لبعضهم على خراب البيوت بكل سهولة، بيَشجَعُوا بعض على الطلاق وإفساد العلاقات والحيوات السليمة، وبالبحث ورا الستات دي نفسها بنكتشف إن حياتهم أصعب من العذاب السرمدى الأسود، يمكن اللي بيتعرضوه شجاعتهم على أنت هي محاولة لتعويض النقص الواضح في شخصياتهم، ومحاولة للظهور بصورة أقوى منهم حتى لو كانت مجرد شخصية وهمية وغير حقيقية!

مش فارقة بقى في النص بيوت تخرب، أسرتتهدل، عيال تتشرد في النص، المهم نعلي سقف طموحات الست الغلبانة لمستوى أعلى بكتير من إمكانياتها أيًا كانت، وفي النهاية بتبقى النتيجة واحدة وكارثية!

عشان كده نصيحتي لكل ست عاقلة وفاهمة هو الالتزام بالضوابط العقلانية في اتخاذ القرار، عدم الانسياق وراء مجموعة من الأشخاص الوهميين اللي أغلهم أصلاً بيكونوا مرضى نفسيين أو ضحايا للأسر بايظة وعلاقات معقدة.

● و للتوضيح أكثر ممكن ترجع للحلقة ١٤ من الموسم الثاني لبرنامج طحالب اللي أنا ناجت منه الفكرة دي، بس عمري ما أروح أقول، وتشوف حلقة عليا الطلاق!

لا مش عليا أنا الطلاق تروح تشوفها، هي الحلقة اسمها عليا الطلاق.. روح شوفها بقى وليلتكم فل.



شكة دبوس



الفصل الثالث

الرجالة مظلومة قوي، أقسم بالله ما شُوفت ظلم كده، المجتمع طول الوقت بيصدرلنا إن الست هي الكائن الضعيف المقهور المغلوب على أمره، بس الحقيقة غير كده خالص.. الحقيقة إن الستات كائن مفترى، كائن شرّس صعب إرضأؤه، واخدين حقهم تالت ومثلّت في الشغل والبيت والمجتمع والكوكب، ويرجعوا بعد كده يقولك مساواة مساواة!

عاوزين تشوفوا المساواة؟ تعالوا وأنا أوريكوأ..

عندنا بيقولوا الست بميت راجل، ولا مرّة قالوا الراجل ب ١٠٠ ست!

ن النسوة، اليوم العالمي للمرأة، حتى في الأكل يا سيدي تلاقى أم علي، رموش الست، صوابع زينب.. وهكذا!

يا راجل ده من جبروتهم جابوا إله في الحضارة المصرية القديمة وسَمُّوه إله "سِت"، تخيل!

راجل وقور محترم يبقى اسمه ست! صحيح هو كان إله الصحراء والعواصف و"ده شيء منطقي"، إلا إن برضه احنا كرجالة ما عندناش إله باسمنا، ومن هنا أنا بطالب منظمات حقوق الرجل بالبحث في الميثيولوجية الإغريقية عن أي إله نسميه راجل، ياكش حتى يكون إله الحزنكش المقطوف، مش هتفرق يعني، المهم إننا ناخذ شوية حقوق من اللي يا عيني المرأة المظلومة واخداهم، يا راجل ده من كتر الافترا والضغط على العالم لإيهامهم وإقناعهم إن الستات مظلومة، بقوا هما الكثرة واحنا الأقلية، هما القوة واحنا الضعف، لا وما اكتفوش بعمل منظمات لدعم حقوق النسوة وبس، وأطلقوا عليها النسوية، لا ده كمان خطأ هبة طوجي الداعم الرسمي لهم، وبقي كل ما تسال أي ست على طلباتها بتخلص امّنى ترد تقولك (لا بداية ولا نهاية)!



من الآخر.. المجتمع ده عمره ما كان ذكوري بخت زي ما بيقولونا
يومياً، الست واحدة حقها ٢٤ قيراط، يمكن المكان الوحيد اللي لسه
مناصر للرجال شوية هو اللغة العربية الجميلة؛ عشان كده دي الحاجة
الوحيدة اللي مش عارفين يسيطروا عليها؛ لأنهم لما بيحاولوا يأنثوا
الحاجات دي بتحصل كوارث؛ يعني لو الراجل حي، الست حية، الراجل
لو مصيب فالست مصيبة، لو الراجل هاوي الست هاوية.

وأخيراً بقى لو الراجل طلب إنه يحقق العدل في يوم من الأيام وكانت
ست؛ لكانت الست دي قاضية عليه وعلى بيته وطلباته وعلى أم اللغة
العربية كلها.



مشهد 1

في إحدى الزيارات الصيفية المسائية لأهل كتكوتة في بيتهم الجديد، كان الحديث بيدور على خطة الأولاد في التجهيزات للفرح والإستعدادات الخاصة بتنفيذه..

وبالرغم من إن كتكوت وصل في اللحظة اللي كانوا بيتغدّوا فيها بالضبط، إلا إن حماته ماكانتش بتحبه إطلاقاً ولا بتطبق اللي جابوه ظناً منها إن الواد ابن أختها اللي كان جاي من الخليج أوّل بالبت من كتكوت المعفن ده، وأهو الثاني كان طول بعرض وحاجة كده هيبة ما شاء الله، مش العرة الثاني اللي لا منظر ولا قيمة، العرة ابن المتصايي اللي راح اتجوّز في السن ده، وبالرغم من صف الأسنان البياض اللي كان موجود طول القعدة والابتسامة الكدّابة اللي على وش الحضور، إلا إن كتكوت كان قادر يسمع الحديث اللي داير في مخرماته عن طريق المكنة اللي كان عاملها في مشروع التخرج بعد ما الجهاز فشل في وظيفته الأساسية، وفضل كتكوت يفكر في طريقة عمل نيزك في ٣ دقائق بدون روت أحبابي في الله، أو إن مثلاً كان ثانوس جه وعمل "snap" وخلى حماته اختفت للأبد من قدامه، وأهو يبقى كسب نفسه وكسب حماه وكسب الجواز ببلالاش، بس للأسف كان لازم يستحمل الواقع المرير، وفضل أنه يقوم يقعد في آخر كرسي في الصالة ويبدأ في غناء مقطوعة عذبة للفنان عصام صاصا.

وبسؤال كتكوتة لحبيبها عن سبب جلوسه في آخر الدنيا على بعد ١٨٠ درجة من حماته؛ ليفجر كتكوت عباراته قائلاً:

- ببعد عن الشر وبغنيّله.



ليضحك حماه وتضحك كتكوتة ويضحك الحضور كلهم في قهقهة عالية جدًا، عدا حماته اللي بصّتلّه بصّات غضب شيطانية مهجورة بشعاع ليزر خفي طالع من عنما زي بتاع سوبرمان كده؛ فيفهم كتكوت على طول ليه ثانوس ماقضاش على حماته؛ لأنها في الآخر طلعت من جيش Dc

- خير يا كتكوت؟ قولنا بقى كنت بتقول إيه؟
- والله يا كتكوتة أنا بحلم أفتح مشروع الهدوم الأولين اللي كنت بقول عليه، ولما ربنا يكرم أفتح محل، ويا عالم يمكن تصيب.
- لا يا كتكوت، هي ممكن تصيب مع أي حد إلا انت، يا حبيبي المنحوس منحوس.

- ليه كده بس يا كتكوتة؟ ده بدل ما تشجّعيني؟!
- ما هو انت لو بتلعب سباحة زي ميدو ابن خالتي كنت شجعتك، لو كنت سمعت كلامي واشتريت جوز تكاتك أجرتهم كنت شجعتك، لو كنت جبت جهازين بلاستيشن واڊيتهم لسمسم صاحبك يشغلهم معاه كنت شجعتك، إنما انت رايح تتاجرلي في الهدوم، يا أخويا ما البلد كلها دلوقتي بتتاجر في الهدوم.
- على أساس مش البلد كلها بقت بلوجرز؟ عمومًا عندك حق، أنا أصلاً هصرف نظرعن الحوار ده.

من أخطر عيوب الستات هي..

"عدم تقدير ألام الرجل وطموحاته".

النصيحة السابعة بتقول إنه ماينفعش الست تتقّه من أحلام الرجل اللي معاها ومشاريعه؛ لأن الرجل طول الوقت بيضغط نفسه



ويستحمل الدنيا عشان خاطر الست اللي معاه، احنا كرجالة عادي جدًا
بنتراضى بلقمة جبنة وكوبايه شاي، إنما بقى عشان يوفّر لك سكن
مناسب وهدوم تليق ببيكي، وعشان يقدر يواكب طموحك الإنفاقي
وتطلّعاتك المادية لازم يحوّل نفسه لمادة صلصالية تتحطّ جوّه فورمة
الطحن وتدوس ع الزرار، عشان كده مش من الجدعنة ولا نُبل الأخلاق
إنّك تترقي أبدًا على طموحه أو تتفهي من احلامه، بالعكس.. حسّسيه
دايمًا طول الوقت إنك جنبه وإنك داعماه، وتعرّفيه إنه حتى لو
مانجحش المرادي هينجح بعد كده وشوفي رد فعله هيبقى ازاى، هتلاقي
الراجل ده اتحوّل فجأة جريندايزروبقى مستعد يبلع الزلط وياكل التراب
حرفيًا عشانك.

משלב 2

في العادي أول ما الدنيا بتبدأ تقف على رجليها بين أي اتنين بيبدووا يكتشفوا حاجات في بعض ماكانوش يعرفوها، عشان كده في أي مناسبة أو أي حدث بيجمع الاتنين في مكان عام لازم الطرفين يساعدوا بعض شوية عن طريق نصايح في التعامل، عشان مايحصلش أي خطأ غير مقصود ويتكرر الحادث المأساوي اللي حصل من سنة، تحديدًا في اليوم اللي جه لكتكوت مكاملة من صديق العمر "فرخ" يبلّغه فيها إن جده في المستشفى متكهّرب بعد ما دماغه لمست سلك اللمبة التنجستين وجاله حالة من الهسّيس والرّثينة.

وعشان فرخ نفسه كان عنده مشاكل في السَّمْع بسبب حادث أليم بعد ما حاول يشدّ ودانه وهو صغير استجابة لطلب أمه اللي قالتله إنه لا يمكن يسافر غير لو شاف حلقة ودنه، وهو حاول ينفذ الكلام حرفياً؛ لأن مخ الكتكوت بشكل عام أصغر من مخ البني آدم بكتير جدًّا يعني، فينأى عليه أصبح عنده مشكله في التواصل السمعي مع الناس بشكل عام ومع جده بشكل خاص، عشان كده ماسمِعش جده وهو على فراش الموت وعمال يقولُه "حُطّ الفيشة" مشيرًا إلى جهاز التنفس الصناعي اللي بيعوّض بيه نقص الأوكسجين في الجسم، بل إنه سمع الكلام وترجمُه على إنه "عايز شيشة" خصوصًا بعد ما قرأ حركة الشفايف بتاعة كلمة "هقوم" وترجمها "سَلُوم"؛ ففهم سريعًا إن جده عاوز يظبط مزاجُه؛ مما أدى لوفاة جده مُصابًا بذبحة صدرية، مش بسبب الشيشة إنما بسبب غياب حفيده العبقري "فرخ".

وعشان كنتكوت يوم العزا بالليل مافيرش يمسك نفسه وهو بيتخيل الموقف كل ما حد يحكيه، وده الى أدَّى لتحويل العزا إلى صالة ضحك



كبيرة تمامًا كما هو الحال في فيلم الكيف، وبمجرد ما تم طرد كنتكوت وفرخ م العزا بسبب ضحكهم على كل حاجة بسبب أو بدون، إيمانًا بالمقولة اللي بتقول إن مستوى الضحك يتناسب عكسيًا مع حالات الحزن، ويصل إلى أقصى احتمالاته في حالات العزاء، صرخ فرخ في لحظات ما بعد الطرد قائلاً:

- واضح إن مش يحى الفخراني بس هو اللي في غاية السعادة والجو فعلاً منعش وسعادة.

ليختتم حديثه بالتصريح الأشهر بمعانيه الخفية قائلاً:

- صحيح.. الكيف ببذل.

و عليها بقى لحد النهاردة كل ما كنتكوتة وكنتكوت يتقابلوا تفضل تفكره طول الوقت بالموقف ده.

- مساء الورد والجمدان، الحلورايق ولا زهقان؟

- مساء الخير يا كنتكوت، اتأخرت ليه؟

- معلىش والله، أصل تسيباس كان زحمة قوي.

- طيب حصل خير، يلا عشان مانتأخرش أكثر من كده.

- ماشي ماشي حاضر، قوليلي بس تاني كده بنت خال أبوكي دي

اسمها إيه؟

- أبوكي! بنت خالة بابي يا كنتكوت، واسمها كشك هانم المنيستري.

- هانم! على كده بقى هندي المغات ده للست اللي بتمسح؟

- انت جايب مغات ليه أصلاً، وهنديه لطنط دي بتاع إيه؟!

- هو مش اللي خدته الهانم تاخده مسّاحة السلالم "هيء هيء هيء"،

وبعدين المغات ده عشان طنط كشك.

- وحضرتك جايب مغات لطنط كشك ليه؟!



- عشان السُّبوع.

- سبوع إيه؟!

- سبوع عيالها، انتي مش بعْتيلي ع الواتس امبارح وقولتيلي إن طنط كشك هتبيّض بكرة ولازم نروحلها!

- هتبيّض يا كتكوت، هتبيّض يا حبيبي، هتغيّر لون دهان الشقة يا بابا الله يكسفك، اسكت.. اسكت عشان هتفتح أهي.

"طنط كشك، ازيك يا حبيبتي عاملة إيه؟"

- انتي بتسلي على راجل غريب قدامي كده ازاي؟! مين النقاش ده يا كتكوتة؟

- كتكوت حبيبي دي طنط كشك، مش أنا قولتلك إننا هنيجي ندهن الشقه معاها؟

- إيه؟! قولتي ده امتي؟!

- يا كتكوت يا غبي ساعة ما قولتلك إنها مسافرة واحنا هنيجي نشتغل معاها ونساعدوها، ركز يا كتكوت.

- يا ستي ماحصلش الكلام ده.

- يا هباب البرك يلعن أبو غبائك في الأرض، مش احنا قولنا امبارح على جروب العيلة إن أنا وانت هنيجي النهاردة نساعد طنط كشك؟

- جروب إيه وعيلة إيه؟! أنا آخر حاجة حضرتها معاكوا كانت مذبحة العيلة، دي أما كنتوا هتموتوا بعض عشان تجهزوا زيارة لطنط حليلة اللئيمة.

- كتكووووووووووووووووووووووووووووووو.

"الراجل مايحبّش المفاجآت في الخطط".



احنا كرجالة عمومًا مابنحبّش المفاجآت في الخطط، ده لأن حياتنا بتبقى منظّمة ومرتّبة بطريقة معينة تناسب الوضع اللي احنا فيه زي ما قولنا قبل كده، عشان كده النصيحة التامنة بتقول إنك ماينفعش تفاجئي شريكك بتغيير في الخطة، بلاش تشركيه في أي حوار أو أي قصّة انتي اللي حاصّاها بدون ما يكون على دراية كاملة بكل تفاصيلها؛ لأن أوّلًا الرجالة استقباليها بطيء جدًّا جدًّا، وغالبًا لا يفهموها وهي طيارة ولا وهي على الأرض ولا حتى بعد ما اصطدناها وماتت، ثانيًا عشان التكوين الفطري للراجل بيميل للروقان وتكبير الدماغ دايمًا كحلّ سهل يقدر يواجه بيه كل اللي بيقابلّه، وماعندوش الملكة بتاعة الست في القدرة على نسج عوالم خيالية من تفاصيل هي بس اللي تعرفها، عشان كده نحاول قدر المستطاع مانغيّرش أي حاجة في الترتيب بدون أي سبب، ونحاول نلتزم بالخطة المتفق عليها ضمنيًا بدون أي تجويد، ولو فيه نية مسبقة بتغيير أي حاجة في الكلام المحطوط، ياريت تبّلغي بيه الراجل بتاعك عشان مايتفاجئش ويخلى شكله وشكلك في أعبط ما يمكن، عشان ببساطة احنا خاييين مابنحبّش كده!



مشهد 3

دلوقتي الوضع اتغير خالص يا برايز، كنتكوت هو الي زعلان ومش طابق نفسه، وكنتكوتة غلطانة ومش لاقية ولا طريقة تعتذر بيها، وعشان ماتقولوش عليا إني كاتب ذكوري وجاي ع الستات، وعشان برضه احنا من غيركم مانسواش أي حاجة "واخد بالك يا عمر؟" قررت أخلي كنتكوت يسامح كنتكوتة سريعاً وينزلوا يروحوا ikea عشان يبصّوا ع العفش، وأهو بالمرة ياخذ كنتكوتة ويأكلو أيس كريم من سلطانة، والحمد لله إنه لغى الفكرة دي سريعاً بعد ما اكتشف إنه هيضبّع تحويشة العفش في شوية جيلاتي؛ لأن بولة الأيس كريم بقت ب ٥٠ جنيه!

المهم يعني وهما في أحد السكاشن الخاصة بأدوات الإضاءة.. كنتكوت لقي طفل صغير بيعيط لمامته عشان تجيبه سكينتيدي كيندل كيندل كيندل وشوية، والولد بدأ صوته يعلى ويهددها إنها لو ماجابتش البتاعة دي الي كنتكوت مش عارف ينطق اسمها هيطلبها الشرطة زي ما حصل في روما مع الراحل الي اتطرد من بلده عشان كان يبيوس مراته قدام بنته، واللي اتسبب لصدمة عصبية عنيفة للبنت على حد قولها، واللي خلّت الشرطة تتعاطف معاها، فما بالك بقى لو الولد اتصل بالبوليس وبلغ إن مامته مش عاوزه تجيبه السمس فلفل الي هو محتاجه ده!

وبعد ما كنتكوت لفّ نص الكرة الأرضية جوّه إيكيا ومالقاش نهاية الطلعة دي، وبعد لفّ كثير وبعد السين والجيم وبعد ما هرب من صورة القط الي بيتعمل ميم، قدر كنتكوت إنه يوصل للشخص المسؤول عن قسم متاهة علي بابا في المكان ويسأله عن ماهية المنتج الغريب الي الولد عاوزه وهيموت نفسه من العياط بسببه عشان يحاول يشتريه بدلاً من الست المفترية الي مش عاوزه تجيب سمسم وبتليّم عيالها من غير عشا،



يكتشف كتكوت إن البناعة أم رقم خزعبلي أكبر من خانات الأرقام الحسابية في مخّه ما هي إلا شمعة مستوردة بتطلّع ريحة وهي منورة؛ فافتكر أبوه لما رنّه علقه محترمة عشان كان عاوز يجيب توينكز ولوليتا في يوم واحد، وجري وراه قدام أهل البلد وقتله مرتين ونتف ريشه ومدّه من رجليه عشان يبقى عبرة لكل طفل آثم سولت ليه نفسه إنه يطلب الحاجات الحرام من بتاعة الخواجة، ومن ساعتها وكتكوت أطلق عليه في البلد لقب "أبو فلكة"، وذلك بعد ما الفلكة علمت على جسمه علامات أكثر من علامات التاتوالي على جسم أحمد الفيشاوي.

- كتكوتة قلبي الغالية، انتي مش شايقة إن الحاجات دي مش مناسبة؟

- مش مناسبة ازاي بس يا حبيبي؟ ده هنا في كل حاجة يا كتكوتي.. من الإبرة للصاروخ.

- أيوة بس ليه الغلب ووجع الدماغ ده؟ وأقعد أجيب في حاجات وأركنها، نبقى ننزل دمياط ونشحن عربية نابوليا وخلص.

- نابوليا، اسمها نابوليا؟! يا حبيبي افهم، الحاجات دي تركيبها سهل خالص وأنا اللي هرگمها بنفسي، يعني هنوفر فلوس الشحن والعمالة.

- طب ليه نجيب دولاب طويل طوله ٢ متر كده؟ بالله عليك ما تنسي إننا كتاكيت يا حاجة، يعني أطول واحد فينا طوله ١٠ سنتي، والدوايب دي معمولة للبشر مش لينا.

- وإيه يعني؟ ما أنا هشب شوية لحد ما أطول وأحط الحاجة بنفسي.

- كتكوتة ماتمئليش بالله عليك، انتي أصلاً بتفرهدي لما بتفردي رجلك.



ط ر ا خ

"الى قدرة ع التحدي والمواجهة".

سؤالي هنا للأستاذة آمال بقی (بما إني مش هقدر على عمو نادر بابا المجال)، قادرة على إيه وتحدي إيه ومواجهة إيه عليكي وعلى دماغك يا آمال واني معمول منك ومن تاريخك بطاطس محمرة؟! اوعي تفكری إن عشان طلعتی فیدبوهین وعملتی حفلة فی العلمین خلاص كده احنا



نسينا، طبعًا أنا لو كتبت الهاشاج بتاعك هنا دلوقتي ممكن أتحبس والدار تنقفل وعمو المدخن¹ يتقمص ثاني ويسحب استثماراته من مصر، وانتوا كللكوا فاهمين قصدي بس عمرنا ما نروح نقول ها!

والله العظيم الدنيا كانت ماشية زي الفل لحد ما الأغنية دي نزلت هي وأغنية سَقَف بتاعة رامي جمال، اللي من ساعتها وكلنا بنسَقَف على وشنا.

النصيحة التاسعة بتقول إن أصعب أنواع الستات هي الست اللي طول الوقت ماشيه بمبدأ اللي قادرة ع التحدي وع المواجهة، يا ستي هو حد طلب منك تحدي؟ حد قَالِك واجهي حاجة؟! ده انتي مواجهة الصرصار بالنسبالك أصعب من الحرب العالمية الأولى!

بالله عليكي عمرك شوفتي راجل طالع يشكر في نفسه ويقول قدّ إيه هو عظيم عشان ركن العربية لوحده! شوفتي بوست لواحد بيقول إنه قدر يفتح علبة الصلصة بعد مجهود خرافي؟!

فمين بقى اللي طلب من الست إنها تقدر ع التحدي، مين اللي قال إن ده دورها ومهمتها أصلًا؟!

والله أنا أعرف دايمًا إن رَحِمَ الله امرئًا عرف قدر نفسه، يعني اللي يعرف يعمل حاجة يعملها، اللي مايعرفش يسكت!

أصل محدش طلب منكم تعملوا حاجة والله، محدش اشتكى من الستات ولا ألزَمَهم جبريًا بعمل الحاجات اللي بيعملوها تحت شعار القوة والسيطرة.

1. ملحوظة: التركي المدخن هو أحد الأكلات الشعبية المشهورة للفئة فوق المتوسطة من رواد

سينس وهابر وان وكشك عم حمادة.



زمان كانت الست بتعمل دورها الرئيسي بدون صياح، سواء التساوي ده كان بشغل أولا، هتعمله أولا، فهي بتعمل المطلوب منها وخلص بدون ما تفرض على نفسها أي التزام أو تحط نفسها في أي ضغط تحت عباية القدرة والتحدي.

عشان كده مفيش ست مطلوب منها تبقى قادرة على أي حاجة، والتحدي الحقيقي اللي لازم تفهمه وتعرف إنه مطلوب منها هو حاجة واحدة بس.. إنها تبقى ست.



الفصل الرابع

معروفة دايماً.. في اللحظة اللي بيقرر فيها الإنسان إنه يتجوز تبدأ مصايب الكون ومؤمراته في التقدم تبعاً..

تلاقي جدك اللي عايش بقالة ٣ قرون قرر يموت فجأة، خالك اللي عايش في سويسرا ومانزلش مصر من سبوعك يقرر إنه يجي مصر عشان فريقها الطبي العالمي ويعمل عملية فخد مفتوح، ابن أختك يجيله حى النيل، أما بقى اللي حصل مع كتكوت في الفترة دي كان ولا على بال ولا ع خاطر.

الحكاية بدأت أما حرامي ابن حلال بعث لأم كتكوتة على إنه موظف في بنك ادخار الكتاكيت وطلب منها تجديد حسابها البنكي، تقريباً كده حد بلغه إن الست شايلة قرشين على جنب لجواز بنتها؛ فقرر ينصب عليها والاستيلاء على أموالها.

وعشان ست الكل تطيق العى ولا تطيقش خطيب بنتها، مارضيتش في الأول تقوله على اللي حصل في حوار البنك ده، ولأنها طول الوقت راسمة دور إنها ست ناصحة وواعية ومستحيل حد يضحك عليها في جنبه قررت إنها ماتيش الأمان الكامل لموظف البنك، وعشان كده اديتله بيانات الحساب والرقم السري واسمها واسم أبوها واسم جدها، لكنها رفضت تديله اسم العيلة من باب الأمان يعني، وطبعاً بعد ما اكتشفت عملية السرقة اللي اتعرضت ليها ماكانش قدامها حل غير إنها تبلغ كتكوت.. اللي بسرعة جداً قدر يوصل للنصاب ده ويسيطر على حساباته بالكامل، واللي اكتشف إنها كانت متشفرة ب (فاير وولز) على أعلى مستوى، لكنه قدر يرجع الحساب تاني لحماته اللي بدورها راحت شكرت ابن أختها اللي جاي من الخليج عشان اذأها دقيقة الموبايل اللي كلمت



منه كتكوت! وقررت إنها مش هتسيب الفلوس غير في إيد أمينة؛ عشان تتفاجئ إن جالها رسالة من حساب اسمه (أمينة اللي مالهاش علاقة بموظف البنك) لتعطيها حماته كل الفلوس اللي معاها وهي مطمّنة إن الفلوس بقت في الحفظ والصون!



مشهد 1

من إحدى المزايا التي تبدأ في المراحل الأخيرة من الاستعدادات للجوازي المفاجآت زي ما قولنا، لكن الغرب في الأمر إن كتكوت المرادي في قعدة صفا مع أمه ومناقشة بعض الخطط الضرورية في حياتهم الجاية بعد ما كتكوت الحمد لله هيمشي ويسيمهم.

قررت مرات الحاج أحما تفجير المفاجأة اللي كانت مخبياها عنه من زمان، في ليلة مظلمة ممطرة شديدة البرودة، البرق بيبرق والرعد بيرعد، القهوة بتفور والشباك بيتفتح، الدنيا ظلام والناس نيام إلا أنا مش هبقى جبان، والأجبان عند اللبان واللبان عاوز دكان والناس الحلوة ديا، حلوين قوي مش أشقيا، اكتشفت الحاجة أم كتكوت هذا الاكتشاف العجيب الغرب اللي غير مجرى التاريخ في أسرة الحج أحمد.. "كتكوت مش ابننا".

فجّرت أم كتكوت المفاجأة المدوية دي في القعدة وسط صمت مطبق وسكون رهيب من الجميع، بدأت عيون كتكوت في الاغروراق بالدموع، عدت عليه لحظات قديمة جدّا في حياته (تحديدًا يعني من شهرين فاتوا) وهو صغير في اللقّة، وبدأ يسمع كلام أمه -أو اللي كان فاكرها أمه- عن أصل الحكاية اللي حصلت معاها، وإن كتكوت ماتلاقاش على باب المعبد اليهودي زيّه زي كل أطفال الحي الطبيعيين وإنه لا، كتكوت ده كان البيضة الوحيدة السليمة في قفص الستّ اللي قاعده بتشحت بفرشة بيض ممشش كل يوم على باب محطة القطر، ويوم بعد يوم البيضة كانت بتكبر وعين مرات الحاج أحما كانت بتراقبها، كل يوم تحطّ فلوس للست الغلبانة اللي بتحلف إن بيتها هيتخرب من صاحب البضاعة اللي باظت مع إن مكسبها في اليوم الواحد من الشحاتة يشتري بلدهم "حرفيًا" لحد ما البيضة فقسّت وكتكوت ظهر، وقرّرت مرات الحاج أحما إنها تاخذه وتتبناه.



بدأ كتكوت يعيِّط في صمت بدون ما يبان عليه التأثر من اللي سَمِعُه، وبالرغم من الجراح والخراب الداخلي اللي كان بيَشعر بيه وقتها إلا إنه بدأ يبص لأُمه نظرة عطف كده، وهي كمان بصَّتْه نفس البصَّة؛ فبدأ يقرب ليها ظنًّا منه إنها عاوزة تحضُّنه، لكنها صاحت في وشه بمجرد ما فتح دراعاته، وبدأت تقول:

- لا يا روح أمك أنا مش عاوزة حضن، أنا عاوزة الفلوس اللي كنت بديها لست كل يوم الصبح.

لتنقلب القعدة ضحك في ثواني، وتطلع أم كتكوت كل ده بتحوّر والقصة دي وليدة اللحظة اختَرعتها أم كتكوت عشان تقلِّب ابنها في قرشين؛ مما دفع كتكوت إلى المغادرة والاتصال بكتكوتة عشان يروح يشوفها بدل ما ينفجر.

- مالك يا ابني؟ بقالنا ساعتين بنلف وانت ساكت.

- مش عاوز أتكلم يا كتكوتة.

- مالك؟

- مفيش، مخنوق بس شوية.

- طيب يا حبيبي، ممكن نروح نجيب الهدية وتروِّج على طول.

- هدية إيه؟

- عيد ميلاد مسكوفي صاحبتني بكرّة وهنجيبها هدية.

- انتي قولتي لي إن عيد ميلادها بكرّة؟

- لا بس عادي يعني، إيه المشكلة؟

- لا لا مفيش مشكلة ولا حاجة، بكام بقى الهدية دي؟

- مممممم يعني ألف جنيه مثلاً.

- لا كده فيه مشكلة، فيه مشكلة كبيرة طبعاً.



- إيه المشكلة يا كتكوت؟ عامل حوارليه؟!
- مش عامل حوارومش عامل حسابي.
- أيوة يعني مش هنروح عيد الميلاد؟
- نروح من غيرهدية، أو نجيب هدية أقل.
- مش هينفع، هي محتاجة الهدية دي.
- خلاص مانرُوحش.
- أووف، أنا زهقت من بخلك قوي، ده إيه القرف ده؟!

" المفاجآت في المواعيد هي السكينة القاتلة لقلب الرجل "

الراجل بشكل عام مابيحَبِّش إيه قولنا؟ بالظبط.. المفاجآت، نزود بقى عليهم كمان الزنقة في المواعيد والالتزامات المادية؛ لأن ببساطة هو فاكِر دلوقتي مواعيد الأقساط، فاكِر فلوس الجواز، فاكِر بالعافية الالتزامات اللي وراه، فلما تيجي تزنقيه في أي التزام مادي وبشكل مفاجئ وهو يرفض، ده مش بخل ولا معناه إنه مش عاوز يعمل، هو ببساطة ماعهوش؛ لأنه لو معاه مش هيتأخر، مفيش راجل بيتأخر بمزاجه عن راحة وإسعاد الست اللي معاه، بس زي ما قولنا بقى هو حاليًا مستني يدفع قسط التلاجة.. مقدم الشقة.. فلوس العيال ولبس المدارس بعد كده، فمش منطقي خالص إنك تفاجئيه بالحاجة اللي انتي عاوزاها وتطلبي منه إنه ينفذها دلوقتي!

بس ممكن مع شوية اتفاق وإنك تعرفيه ميعاد الحاجة ومتوسط تكلفتها بشكل مسبق هتلاقيه هو اللي بيسعى طول الوقت إنه ينقذها لك وقبل ميعادها كمان؛ لأنه حاطك أنتي نفسك وطلباتك طول الوقت على قائمة أولوياته قبل نفسه حتى.



عشان كده بالله عليكم ماتزنقوش الراجل بدون علمه، ولو نقدر
نختصر الكلام ده في النصيحة العاشرة فمممكن نقول: إن الاتفاق المسبق
على الحاجة يمنع عننا شرأي أزمة ممكن تحصل لينا في يوم.



مشهد 2

في أحد كافهات كفروراك التابعة لمدينة الفراه كان كتكوت وكتكوتة قاعدين بيتناقشوا في أهم التفاصيل الجاية في مستقبلهم، ومع الخلافات الطبيعية العادية خالص واحتداد الموقف بصورة دورية.. كاد الموضوع أن يصل إلى رُمي الدبلة ومنتف الريش وفركشة الجوازة كلها من الأساس، وذلك بسبب الاختلاف حول عدد المعازيم وأسمائهم المطبوعة على دعاوي الفرح، واشتد النقاش تحديداً حول احتمالية توجيه دعوة إلى ابن عم كتكوت المدعو "زنجر".

بدأ الحديث حول زنجر في اللحظة اللي كتكوتة رفضت فيها إن زنجر يحضر الفرح؛ لأنه سوابق وشمام وبيزل كل يوم تحت كوبري تحيا مصر ويضرب حقن زيت باكم، وفي الناحية الثانية بدأ كتكوت يدافع عن ابن عمه اللي العيلة بتعتبره فنان مشهور بعد ما طلع على "ناشيونال جيوغرافيك" في سابقة لم تحدث مطلقاً في العيلة؛ مما دفع كتكوتة إلى استغلال كلام كتكوت "مزودج المعنى" مشيرة إلى إنها كانت "سابقة" فعلاً؛ لأن زنجر كان ممسوك بحشيش وطالع في برنامج خلف الأقفاص.

وبسؤال أهالي المنطقة عن زنجراكتشفوا إنه واد فاقد، تلفان وغاوي مشاكل من وهو صغير، يعني مرة كلِّبش بيت مدرس العربي يوم الامتحان عشان ينجِّح صحابه، مرة ثبَّت العيال اللي ساكنة في الرحاب عشان يجيب زينة رمضان، أما أغرب حاجة بقى لما كان بيسرق التموين من عندهم من البيت وبفلوسه يروح يجيب ساقع لأهل المنطقة كلها، وبالرغم من إن كل التصرفات دي تخلينا نعتبره أدهم شرقاوي مدينة الفراه، إلا إن كل ده لم يكن شفيح له عند كتكوتة عشان تعزُّمه على فرحها.



- مش هنعزّمه يعني مش هنعزّمه، كلامي واضح.
- يا بنت الناس.. يا حبيبي ماينفعش، عمتي هتزعل جدًّا والله،
وبعدين زنجرده طيب جدًّا.
- آه يا حبيبي، عشان كده كان ممسوك في قضية حشيش.
- ظلم، والله العظيم ظلم.
- يا ابني ده ممسوك متلبس، ظلم إيه بس؟!
- ما أنا هفهمك، عم محمد العلاف اللي تحتنا كان تعبان شوية، وطلب
من زنجريقف مكانه في المحل لحد ما يقدر يتزل تاني، حلو؟
- حلو.
- المهم زنجرعشان طيب ومجدع ورजूلة ومفيش في شهادته ولا فيه
منه اتنين ماكدبش خبر وراح وقف في المحل، مع إنه مايعرفش العنب من
كوز الدرة.
- الألف قصدك؟
- لا العنب، احنا كتاكيت حضرتك مش في حصّة نحو! المهم يعني إن
وهو واقف جالّه زيون سُقّع وطلب منه حشيش عشان يروّق على حاله،
وعشان زنجر مايقفّش سمعة المحل ومايخسرش زيون مهم زي ده راح
زنجر لأحسن ديلر في المنطقة وجاب من عنده حشيش أفغاني معتبر.
- طيب ما هو مجرم أهو!
- اصبري بس، زنجراول ما رجع للراجل وادّأله الحشيش الراجل قاله
يا نهيار أسود! أنا عاوز حشيش من بتاع الأرض، حشيش من اللي بتاكله
الهيام يا بهيمة.
- طب طالما كده مارجّعش الحشيش ليه طالما مظلوم؟
- ما هو كان رايح يرجّعه فعلاً.
- طب وإيه اللي حصل؟



- سمع العيال الصغيرة بتقول كبسااااا، راح واقف مكانه.
- ده عبيط قوي ده، وماجريش ليه؟
- أصله كان اتعلمّ الدرس وافتكر العيال عاوزين يعملوا كبسة للأكل، راح راجع ثاني المحل لحد ما انعكش، شوفتي بقى طلع مظلوم ازاي؟
- كتكوت أنا ماليش دعوة بكل ده، مش هيحضر يعني مش هيحضر.
- ولو حضر؟
- يبقى اعتبرني أنا اللي مش محضريا كتكوت، واعتبر كل شيء قسمة ونصيب.

النصيحة ١١ بتقول إن:

"خطوة لورا في الخلاف لا تُفسد للود قضية".

الاختلافات هي سُنّة الحياة، وزى ما قولنا في الجزء الأول إن كل واحد بيبقى جاي من بيئة مختلفة ونشأه مختلفة، وبالتالي ده ممكن يولد الخلافات، المختلف بقى المرادي في اللي هقولُه إن الستات بشكل عام بتحجّر دماغها على حاجات كتير قوي، الراجل في أغلب الوقت بيبقى عايز المركب تمشي، أغلبية حياته بيختار الحل الأريح عشان الدنيا ماتتَعَقَّدْش، فمش طبيعي نلاقي جوازك تبوظ على لون السيراميك، خناقة الصبح مثلاً على قناة التليفزيون اللي شغالة؛ لذلك بنقول إن خطوة واحدة لورا مع شوية دلع من الست هتعرف أولاً تَمَسِّي المركب وثانياً هتاخذ من الراجل نفسه عنيّه لو تحب، إنما مش صح خالص إن مع كل خلاف على حاجة صغيرة أو كبيرة مطلوب من الراجل الاستجابة لمطالب الست بلا أي اعتراضات، الانسحاب من الهجوم المستمر بلا أي دفاع، الموافقة على كل المطالب بلا أي مبررات، ده كده بيبقى تحكّم في



السلطه وأوامر استعباديّة مش علاقة أسريّة مبنية على التفاهم والمودة
بين ٢ بيجبوا بعض!

عشان كده الصح بيقول إن خطوة واحدة لورا بتمنعنا من الوصول
لمرحلة شرسة في الاختلاف، وإن كلمة واحدة بسيطة من الست ممكن
توقّف حرب!



مشهد 3

جاني بهداوة داوى جرح قديم وجدّد، روجي راحت مّي، نّن عينّه خَدني
غصب عني هُوبًا..

المهم إنه قبل ما يجي بقى وتفرجي قوي كده تبقي تسألني عليه كويس،
أصل لو جالنا عريس اليومين دول معاه شقة وشبكة وعربية، وهيعرف
ياكّك ويشركّك ويعيشك في مستوى عالي يبقى أكيد تاجر مخدرات، هو
حد معاه فلوس يا بنتي عشان يتجوز دلوقتي؟! والأهم من كده.. هو فيه
حد عاقل بيتجوز أصلًا؟!

اللي حصل إنه في أحد النهارات الصيفية الجميلة اللي كان كنتكوت
فيها مركّز في شغل.. جاله مكاملة تليفونية من صديق العمر "فرخ" ببيلّغه
فيها إنه لازم يتحرك حالًا وبسرعة على مدينة الإنتاج الإعلامي عشان فيه
ليلة كبيرة وحوار هيدور دلوقتي مع الشيف الشربيني وجدّه، في الأول
كنتكوت كان فاكّر إن اللي اتخطف هو "جدو" بتاع الكورة اللي جاب ه
أجوان لوحده في أمم افريقيا ٢٠١٠ ده، وكان فاكّر إن الحركة دي
مقصودة من الشربيني عشان يقنع اللاعب إنه يتخلّى عن قرار الاعتزال
ويرجع الملاعب تاني، أو على أضعف الإيمان يمضّيه على برنامج أسبوعي
عنده في القناة ويختاروله اسم كرييتف ماطرش على بال حد زي اسم
"جدو والشربيني"، والغريب إن كنتكوت كان عمّال يقنع نفسه بالحبكة
اللي عمال يرسمها لنفسه طول الطريق، وعمال يبني في هرم توقعات
انهار كله على دماغه بمجرد ما اكتشف إن فرخ كان يقصد جدّه
الحقيقي.. جدّه الحاج "الفرخ الكبير خالص"، واللي حوّل الشيف
الشربيني إلى ديك روستو وقدمّه مع الفريق في المطعم الجديد بتاعه اللي
في الشيخ زايد، وماكتفّاش بكده بس لا.. ده كمان قام مصوّر الفقرة دي



وهو بيخَرْج الديك من غطا الملح اللي كان عاملهُوْه ومنزّل الفيديو في ريلز على انستجرام.

بالرغم من استهجان كتكوت لَلّي حصل في بادئ الأمر؛ لأنّ لوجده ده هو اللي اتعمل فيه كده، أومال هما كانوا في عزا مين من يومين؟ ليقطع فرخ أفكار كتكوت سريعاً ويشير إلى الجد المخطوف بأبو أبوه، والجد الثاني أبو أمه، وبعدين ما هي الديوك كلها شبه بعض قوي، وأي ديك كبير رشوية احنا عشان متربّين بنقولُه يا جدومعروفة يعني.

المهم بعد خناقة كبيرة وقف فيها كتكوت في ضهر صاحبه فرخ، افتكّر كتكوت إن آخر واحد وقف في ضهره كان واحد مستني دوره في الجمعية التعاونية، وده اللي دمر نفسية كتكوت تماماً وخلاه مايكملش الخناقة للآخر وعشان كده راح قايل استوب عركة، وغادر المكان سريعاً بدموعه البريئة تاركاً فرخ والخناقة واللييلة دي كلها وقرر يروح لحبيبة قلبه كتكوتة.

- آه، الواحد متدغدغ خالص يا كتكوتة.. خناقات وحرّ وشغل وقرف، كان يوم صعب حقيقي.

- سامع الصوت ده؟

- صوت إيه؟ مش سامع حاجة.

- ممممممم، ولا حاجة، هو انت أصلاً سامعني؟!

- آه سامعك، هو انتي كويسة؟

- أيوة.

- حابّة نروّج يعني؟

- انت وراحتك.

- انتي زعلانة من حاجة يعني؟



- عادي، هزعل من إيه؟!
- اسكتي، مش احنا اتخانقنا النهاردة في الشركة بسبب مشروع "ميغا بروجيكت".
- ميغا بروجيكت قصداك؟
- لا ميغا، مردغانة يعني والشركة خربانة والضرب هيبقى للركب.
- آه تمام، كنتكوت هو أنا أحلى ولا هيفاء وهي؟
- إيه؟! انتي طبعًا.
- هو أنا تخينة؟
- لا لا لا طبعًا.
- كنتكوت يلا نمشي من هنا؟
- ليه فيه حاجة حصلت؟
- بس بس، انت غبي أصلاً ولا فاهم حاجة.

آه، هنا سأسكُت قليلاً.. النصيحة ال ١٢ واللي مستنمها من أول الكتاب عشان أتكلم عنها بتقول:

"كلام الستات دايماً يكون عكس اللي تقصده"

الست دايماً لهما قاموسها الخاص اللي محدش فاهمه غيرها، وعشان تتعلم لغة الحوار مع أي أنثى على وجه الأرض يبقى لازم تروح لساحر بنغالي مُقيم في الهندوراس عشان يربطلك العلام على ضُفُر سن تعبان أجرب، أو الأسهل إنك تجيلي هنا وأنا أعلمك الموضوع.

لما الست تقولك على حاجة لا يبقى لا، ولو قالتلك آه يبقى لا برضه.



لما تقولك ده قرارك يبقى كلامها هو اللي هيمشي، أما لو قالتلك يلا نمشي ده معناه إن ليلة أهلك سودا.

لما تقولك لازم تتعلم لغة الحوار يبقى قصدها إن لازم تقتنع برأيي، وأما تقولك بتحبي قد إيه اعرف إن فيه مصيبة جيا لك في الطريق، أما تقولك مين أحلى؟ يبقى لازم هي، مين أحسن؟ يبقى هي، مين بيها @:(\$: (هي برضه، أي سؤال بيدأ بمين إجابته هي، وخذ بالك بقى إن أي سؤال بيدأ بمين بس وهي متعصبة يبقى إجابته انتي، على طول ماتفكرش، وبما إن كتالوج الستات مالهوش حل حتى عند الساحر إياه، وبما إن الموضوع بقى محتاج زيارة للسرايا الصفرا؛ فبالله عليكم يا ستات.. ممكن تعرفونا القاموس بيمشي ازاي؟



الفصل الخامس

كتكوت زعلان، دمه محروق، وكتكوتة ولا هي سائلة في اللي جابوه.

هو شايف إن عنده حق، وهي شايفة إنها مش غلطانة وقامت مشوِّحة بإيديها وقائلة اللي مش عاجبُه طبعي يطبع في مطبعة تانية.

"بالمناسبة وبما إني مدير سابق للدار" أحب أنوّه إن الدار فتحت مطبعة قريب، يعني لو حد عاوز يطبع يقول بس إنه من طرفي وهما هيّطبعولُه أو هيّطروده مش متأكد، وده إعلان غير مدفوع الأجر.

المهم نرجع لموضوعنا ونقول إن كتكوت المرادي خد القرار إنه مش هيسأل في كتكوتة ومش هياخد خطوة الصلح، مع إنها كانت مستنياه يقولها ده كله كله كوم وزعلك انتَ كوم زي ما قال بوحة الصباح، "بالمناسبة فيلم بوحة متاح حاليًا على منصبه واتش ات"، وده بقى إعلان مدفوع الأجر.

وأمام صمود كتكوت الرهيب المرادي، ماكانش فيه أي حل قدام كتكوتة غير إنها هي اللي تصالحه، وخصوصًا بعد ما أمها نصحتها وعقّلتها تكمل الموضوع للآخر، مش حُبًّا في كتكوت لا سمح الله أبدًا، إنما عشان - مانشمِتَش فينا هالك وعيالها-؛ فماكانش قدام كتكوتة حل غير إنها تعمل جلسة تخاطر روحاني عشان تجيب كتكوت على بوز أمه، والجلسة دي بتتعمل عن طريق إنها تجيب صورة كتكوت مع عودين بخور وتفضل تقولُه عشان خاطري ٤٨ مرة مع القليل من الشحتفة، وده لأن مصطلح تخاطر متاخذ أصلًا من كلمة خاطري كما قالت اللغة السومرية الريشية في كتب الأجداد قديمًا، وفعلًا كتكوت يتصل فجأة، وبدون أي مقدمات بكتكوتة اللي كانت عاملة مقموصة ومتقمّصة دوريسرا في "لا تسألني من أنا؟" وقعدت تصرخ شوية لحد ما كتكوت قالها تقفل الاليف المفتوح



بالغلط ده؛ لأن البلد كلها عرفت إنها عبيطة خلاص، وإن مفيش حاجة أصلاً اسمها تخاطر.

ورجع كتكوت وكتكوتة لبعض مرة ثانية، ورجعت المياه لمجاريها، ورجعنا احنا كمان عشان نكمل القصة للجمهور اللي مستنينا، ولّا فاكرين يعني إنهم هيفضلوا متخانقين ونكمل الكتاب احنا بحواديت ميكي؟ بمناسبة ميكي بقى عاوز أقولكم ان ميكي جيب رجع تاني بقصص جديدة للسوق، وده برضه إعلان مدفوع الأجر، معلى أصل الدنيا بقت صعبة قوي والعيشة غالية، وبعدين هي جت عليّا يعني! ما الإعلانات مالية الشوارع أكثر من الهوا اللي بنتنقّسه، ولّا إنا عشان غلبان يعني هتعملوا معايا كده؟ ولّا هوال

كااااات / كفاية أبوس إيدك لو اتفتحت مش هنخلص، خرينا نشوف اللي حصل مع الكتاكيت.



مشهد 1

عارفين مشكلة الستات إيه؟ إنهم فاكرين اننا عشان بنسامحهم نبقى غلابة.. لا فوقني يا حبيبتي كده، فوقني يا ماما، احنا جامدين قوي قوي يعني خدي بالك، عشان كده كتكوت قرر بعد المرة ال ٢٥٥ إنه مش هيصالح كتكوتة تاني أبداً، أصل معلش كله إلا الكرامة يعني، مفيش أغلى ع الإنسان من نفسه الحقيقة، كان بيقول كده لنفسه في الأول، لكنه وبعد تفكير سريع جداً قرّر إنه يخليهم ٢٥٦ مرة عادي؛ لأن دي مساحة الأيفون ١٤ الجديد اللي نفسه يشتريه، قال إيه بحجه إنه بيستبشر خير بالرقم ده!

المهم عشان ما أطولش عليكم أكثر من كده، كتكوت كالعاده جاب ورا وصالح كتكوتة، حد هيقولي إنهم أصلاً متصالحين من أول الفصل، ولّا انت ككاتب بتنسى بقى وترجع تقول أي كلام وخلص؟ أقولُه يا حبيب قلبي عيب تقول كده لكاتب مخضرم زي، وإني ممكن أقل إدبي عليك، بس للأسف محتاج تمن النسخة اللي انت شاربها، ما انت واخد بالك بقى انت عمّال أعمل إعلانات مدفوعة وبتاع خليك حسيس يا أخي، الفكرة بس إنهم اتخانقوا خناقة صغيرة بين التمهيد والمشهد ما حبتش أصدعك بيها، بس لو انت مصمم تعالَى أحكيالك.

كتكوت عدّى على كتكوتة وخدها عشان يروحوا لمقاول التشطيبات اللي شغال في شقتهم حسب الاتفاق المسبق، وطبعاً لأن كل الصناعات اللي في مصر دكاترة "بقولك كده بالأمانة يعني من واقع خبرتي كمهندس مدني"، وعشان الشغلانة اللي بتخلص في شهر بيخلصوها في سنة، اتفاجئ الكتاكيت إن شقتهم اتقلبت قهوة بلدي نظراً لعدد الكوابيات المهول واللي يكفي لفرش سوق كوابيات كامل في الموسكي، عدد شكاير



الفحم الكافي جدًّا لتوليد طاقة حركة سفينة بحجم تيتانك أثناء رحلتها عبر نص القارة الأرضية، وعدد من أعقاب السجائر اللي تمثل شحنة جات من إنتاج مصانع في كوبا في ٣ سنوات وضلّت طريقها لتصل إلى مكان إقامة الصناعية في الشكة!

وطبعًا عشان كل الصناعية والمقاولين اسمهم عم محمد، ما عدا المقاولين بتاعة عثمان اسمها المقاولين العرب "هه هه" آسف.

اتعصّب كنتكوت جدًّا وقرر ينهي المهزلة دي ويحط للناس ديدلاين يمشوا عليه لحد ما الشكة تخلص..

- إيه ده يا عم محمد؟! إيه اللي بيحصل ده؟!

- إيه اللي أنا شايفه ده!

- انت هتزمعيا؟!

- فيه إيه يا عمنا؟! ما صباح الخير عليك اهندزة.. الشغل آخر نعنشة أهوزي ما انت شايف كراع.

"ملحوظة: كراع دي يعني كده، ودي أنا سارقها من بودي الدمياطي".

- شغل إيه ونعنشة إيه الله يخربيتك، ده انتوا قلبتوا الشكة غرزة!

- عيب عليك يا مولانا، معاك العفريت.. اللي يخلص أي شغلانة بنت

تبيت.

- طيب يا عم محمد جيبتي اللون الليلاه اللي كنت عاوزاه؟

- لا يوممكن يا ست هانم، مش هنتكلم في أي حاجه قبل ما نفطر

وناغود الحاي الأول، ولا يا فليكس.. هات ياض المعمول اللي جوه للأزادزة

عشان يفطروا، حاكمين دول كتاكيت.

- يا عم محمد لا معمول ولا غيره، كفاية المعمول فينا بسببك لحد

دلوقتي، عرفني هتخلص امتي أبوس إيدك؟



- شوف عدم اللامؤاخذة.. أصل اللون الليلا اللي طالباه المدام ده ناقص من السوق حبتين، ومش موجود غير عند واحد معرفة مغلواني شوية، ودي هيبقى فيها بتاع ٥٠ ألف جنيه فرق، الله يخربيت الدولار وقفل الاستيراد اللي بوظ علينا الدنيا دي، والله أهندزه وحياة من جمعنا من غير ميعاد، البلد بقى حالها مش ولا بُدّ وأنا بفكر أسيب الدنيا هنا وأطفش.

- وناوي تروح على فين يا عم محمد؟

- أي حنة برة مصر مش هتفرق، بفكر أروح عزبة النخل، آه.

- عزبة النخل برة مصر! ماشي، أهو بالمرة تجيبنا حبة خشب من النخل اللي هناك نلم بهم القفصين اللي هنتجوز فيهم.

- هرهر كع كع، عفارم عليك أهندزه، والله دماغك دي عاوزه تتباس.

- طيب يا كتكوت خيلنا بس اللي احنا جايئله، ماشي يا عم محمد هات

الليلاه الغالي، طيب والباركيه؟

- والله أمدام الباركيه مش أوكيه، المترطلع عامل شيء وشويات، وأنا

خايف على فلوسكم الحقيقة يعني، منهُ لله اللي واكل السوق ومغلي البوضاعة.

- لا يا عم محمد مايمكش حاجة، شوف الصح إيه واعمله.

- صح إيه يا كتكوتة؟! احنا كده عدينا الميزانية بكتير قوي، وكده مش

هنعرف نكمل الشقة.

- بقولك إيه.. دي شقة العمر وعاوزاها تطلع زي ما بحلم بيها، مش

مهم خالص هنصرف عليها كام!

- طبعاً، هوانتي دافعة حاجة من جيب إيوكي؟

- بتقول حاجة يا كتكوت؟

- لا بكح بس.



- عفارم عليكي أمدام، عين العقل والله عين العقل، حيث كده بس
هنحتاج عربون أباچمهندز عشان نحجز الحاجات دي؛ لأنها غليت هي
کمان.

- وهنحتاج أنا والرجالة شوية مصاريف عشان نمشي الدنيا.

- وفيه شوية رفايع لزوم الاكسسوارات.

- هی مش الحاجة دی بتیجی مع البضاعة؟

- ده كان زمان يا بيه، منه لله الى كان السبب.

- ماشي خلّصني، حاجة تانية؟

- ألف جنيه رمل، ألفين أسمنت، وخمس آلاف جنيه العربية اللي هتجيب البوضاعة.

- العربية كمان تمنها زاد؟!

- شوفت الجشع؟ الله يخربيت الاستيراد.. منه لله الى كان السبب.

"الراجل مش شوال فلوس، ولا ماكينة إنتاج عملة صعبة".

من أهم وأكبر وأخطر المشاكل اللي بتقابل الرجالة في حياتهم هي الست المُسْرِفة، الست اللي بتتعامل مع الرجل على إنه ممكنه atm متحركة أو شوال فلوس زي ما الناس بتسميها، عشان كده نصيحتي ال ١٣ بتقول اوعي تعاملني الرجل بتاعك على إنه واحد من الاشولة دي، أصل الواحد فينا لا مولود في بنك، ولا خاله أمير كويتي، ولا حتى صحي من النوم لقي نفسه عايم على بيريترول!



الراجل في مصر بيتمرمط كل ثانية عشان يعرف يجيب الجنيه،
بيطلع عين أهله حرفيًا عشان يقدر يوقرلك احتياجاتك وطلباتك، وفي
مقابل ده بيدفع التمن جهده ووقته وصحته، بيدفع التمن من سنين
روحه وسلامه النفسي، الراجل مننا بيدفع تمن كل لحظة رفاهية عن
الست اللي معاه من عمره، ممكن يموت نفسه لو يطول بس يخلي اللي
معاه ملكة متوجة، عشان كده بالله عليك بلاش تتعامل مع شريك
حياتك على إنه قاعد على بحر دهب مش عارف يوديه فين، بلاش تتصرف في
من منطلق إنه بيضغط على الحاجة في زرار موبايله تبقى عندك ببلاش،
اوعي تفكري إنك لما بتتنكي قوي وتطلعي الفيزا اللي فيها ال nfc وتقفي
قدام الكاشير تحركها من بعيد كده إن الفلوس دي جياله من منحة
سنوية، أو إن بيتعملها refill بشكل تلقائي، أصل محدش فينا عنده
مطبعة وبيضغط بس ع الزرار يلاقي ورق الفلوس خرج أكوام أكوام!



مشهد 2

مع اقتراب موعد الزواج وتراكم المسؤوليات على كتكوت، لم يشعر كتكوت بظهور صديق اسطواني الشكل حول وسطه يسمى الكرش، وعشان الكرش ماينفesh في الجواز تحديداً، ماكانش فيه قدام كتكوت أي حل غير أنه يلتزم بحمية غذائية صحية.

وبعد مشاورة طبيب التخسيس الي نصحه بتناول الكركمين والابتعاد عن الدهون والحلويات، والقرار ده كان بالنسبأله شيء في منتهى الصعوبة؛ لأنه يقدر يبعد عن الدهون بس مايقدرش يبعد عن كتكوتة، وعشان الواحد مننا رمرام ولا يقع تحت تأثير الدايت لأكثر من ٣ دقائق، قرر كتكوت إنه يمتنع عن أي أكل من بره ويلتزم بأكل الصدور فقط مع إن الوراق حلوة، وطلب من أمه إنها تعمله أكل صحي في البيت زي الشاورما الدايت، البيبسي الدايت، والرنجة الدايت، ولو حد قالك مفيش رنجة دايت هقولُه ارجع لفيلم إكس لاج يا حبيبي قبل ما تعمل فيها فزلوكة، قرر الابتعاد عن أي حاجة فيها مواد حافظة زي الدوريتوس كده؛ لأنه مصنع من دقيق الدرة والكتاكييت صحيح تحب الدرة، بس كتكوت عزيزته لا تقهر.

وبالفعل بدأ كتكوت الاستجابة للنظام، وطلب من أمه إنها تعمله الوجبات الصحية وتسويه بحبة البركة الطالعين من أيديها، وبعد ما فرحت أم كتكوت وعنيها اتملت دموع ولسه هترد على كتكوت وتقوله إن هو الخير والبركة الي في حياتها، صعبها كتكوت بالرد الي قاله كالعادة وإنه يقصد حبة البركة الي هي السودا الي شبه السمسم دي الي بيحطوها السوريين على المناقيش بتاعتهم، وده لأن طعمها بيبقى حلو جداً جداً مع الطعمية، وأه طبعا فيه طعمية دايت.



وبالفعل قدر كتكوت ينزل الكرش اللي كان موجود ورجع ثاني شاب
رشيق واسمارت بسبب حب كتكوتة اللي كانت بتحبّه وتشجّعّه.

النصيحة ال ١٤ بتقول "أقصر طريق لقلب الراجل فعلاً معدته".

الأول بس حابب أنوّه على حاجة مهمة جداً، وهي إن النصيحة لما
بتيجي قبل المشهد يبقى الموقف اللي حصل كويس، أما لو النصيحة
جات بعد المشهد يبقى فيه مصيبة هتحصل، ما انت لو قارئ الجزء الأول
يا بيه كنت عرفت لوحذك، هو انت لسه ماقريتوش؟ ماقريتوش ليه يا
بيه؟! عينك واجعالك ولا حاجة؟ اقفل حالاً وروح اقرأ يلاً.. حالاً.

نرجع بقى للنصيحة اللي بتقول إن أقصر طريق لقلب الراجل هو
معدته، مش عشان هو جعان ولا ده معناه إن دي نصيحة تسيء للراجل
بتاتاً وبأي شكل، النصيحة دي للي يفهمها تبين قد إيه فعلاً احنا
شخصيات بسيطة وغير معقدة بالمرة، وإن أقل حاجة بتعرف تبسطنا،
وموضوع الأكل ده كمان حقيقي جداً، مش بس عشان الأكل نفسه بكل
حلاوته وجماله، إنما عشان الحالة الحلوة اللي بتيجي من وراه.

يعني الراجل اللي واقف طول اليوم على رجله في الشغل، وتحديداً
يعني الأعمال اليدوية الصعبة، الراجل اللي مسافر أو مغترب لفترة زمنية
طويلة ومش عارف يحصل على وجبة منزلية الصنع، الشخص اللي بيمنع
نفسه من ملاذ الدنيا ومن الحاجات اللي في نفسه عشان يوفر الفلوس
دي لأفراد أسرته، كل الناس دي بتبقى مستنيّة فعلاً أكلة حلوة من إيد
الست اللي في حياتهم؛ لأن الأكلة دي بيبقى مقصود بيها كثير قوي من
الرسايل المبطّنة، الأكلة دي يعني حب، دفا، مكافئة مستحقة لتقدير
تعب الراجل لفترات طويلة، عشان كده من فترة للتانية تعملي للراجل



- کتکوت، انت خست قوی إیه الحلاوة دی؟!

- یا عینی یا ابنی! ده انت حالتک صعبة قوى، طب تعالى نتمشی.

- لا ناكل إيه بقي؟! احنا هنروح مكاننا المفضل عشان عملاك

- حتى إن أعادوا لنا الأماكن؛ فمن يعيد لنا الرقاق؟

- لا الرقاق، الفطير الخفيف الى محشى لحمه مفرومة ده.

- قصدك يعنى زى ده؟

- إيه ده؟! رقااااق.. حبيبي كنت فين من زمان يا حبيبي!

- بس خد بالك وکل بشویش، مش عاوزین الدنيا تبوظ تانی.

- حاضر حاضر، انتی بس عرفتی منین اِن نفسی فیہ؟

- عشان دی أكثر أكلة انت بتحبيها، ولأنك فعلاً تعبت وتستهال، مفيش

مشكلة من مكافأة صغيرة في نص الطريق عشان تعرف تكمل.

- تعرفي؟ أنا أكثر طريق نفسي أكمله هو طريقى معاكى، طريقنا سوا يا

كتكوتة.



مشهد 3

مين قال الحلو مايكملش؟! ما الحلو طلع بيكمل أهو عادي، خلاص عرايسنا الحمد لله أخيراً حدّدوا ميعاد الفرح وخلصوا كل الخطوات والتجهيزات، وماكانش فاضل قدامهم غير الفستان والبدلة اللي قرروا ينزلوا يجيبوهم سوا وبعدين بيقوا يتفاجؤوا ساعة الفرح ب ال first look، قال يعني حد ثاني اللي كان بيشتري الهدوم!

المهم إن الحال اتدحدر خالص بكتكوت في الفترة الأخيرة بسبب الالزامات، لدرجة إن يوم الفستان لما كتكوتة طلبت منه إنهم يروحوا مكان يرتاحوا، دخلوا كافيه فعلاً وطلب كوباية تلج واستناها تسيح "عارف إنك عارف إني هقول وشرها"، بس لا للأسف هوراح مطلع كيس فروتي أناناس وساحب كيسين سكر من الفنجان اللي قدامه وراح عامل لكتكوتة أحسن كوباية عصير في الدنيا، ولما مالقاش مهرب من دفع الحساب برضه نزل إعلان على فيس بوك يعرض فيه الخاتم السحري اللي بيعجب الحظ والأموال نظراً لأنه مزنوق في قرشين، وبعد بيع الخاتم وتسديد الحساب بالفعل دخلوا بعدها محل البديل عشان يجيبوا كل لوازم الفرح، وبالفعل قدر كتكوت في ٣ دقائق يختار البدلة والقميص والجزمة والكرافطة والمنديل والساعة وهدوم السنتين ثلاثة اللي جابين، بينما كتكوتة فضلت تلف ٥ ساعات عشان تختار لون الاسكرانشي بتاعها، واللي كان كتكوت في الأول فاكُرُه أحد منتجات الشيبسي، ليكتشف مؤخراً إنه حاجة في إكسسوارات الستات شبه التوكة كده بتلبس في الإيد، وأخيراً وبعد اللف قدروا يوصلوا لمحل كبير بيبيع كل الحاجات اللي تقدر كتكوتة تلاقي فيهم كل اللي هي محتاجاه.

- كتكوت، إيه رأيك في ده؟



- جميل قوي الفستان ده.
- فستان إيه؟! ده روب.
- أيوة حلو فعلاً الروب ده.
- طب وده؟
- أيوة دي عارفها بقى، دي العروسة اللي بتتلبس في الإيد ويتعمل بيها مسرح عرايس.
- مسرح عرايس إيه بس يا كتكوت؟! ده لكلوك عادي "حاجة زي السليبر يعني".
- سليبر؟! إيه اللي جابنا قوطونيل بس؟ وبعدين مش السليبر ده اللي هو ٧ مش الشورت؟!
- كتكوت انت بتهيد صح؟ سليبر يا كتكوت.. حاجة زي شبشب الرجل يعني.
- طب ما تقولي شبشب ياختي، وده بقى عشان تعملي مسرح عرايس برجليكي يعني؟
- يا ربي! آه هعمل مسرح عرايس.. حلوي يعني المهم؟
- آه تمام حلو.
- إيه ده إيه ده إيه ده؟! إيه اللي على كتفك ده؟! وريني كده يا حبيبتي.
- فيه إيه يا كتكوتة مالك؟
- البننت اللي وراك دي كانت بتبص علينا جامد.
- أيوة يعني أنا مالي بقى؟
- ماتشغلش بالك انت بس.
- ماشي.
- كتكوت حبيبي يا جوزي أنا، مش مصدقة إن فرحنا قرب خلاص.



- بتزعقي ليه طيب؟ أنا سامعك والله وبيتا نص متر.
- عشان البنت اللي شغالة دي كانت بتعاكسك.
- برضه! طيب ماشي.
- أه، أه، آآآآآه الدبلة قفلت على صباي أه.
- فيه إيه؟! فيه إيه؟!
- مفيش يا حبيبي خلاص، البنت اللي واقفه ع الكاشير كانت بتغمزلك.
- تغمزلي أنا؟! هو فيه إيه النهاردة؟! أنا بقيت براد بيت وأنا معرفش ولا إيه!

"الراجل كائن بسيط مايعرفش حاجة عن كيد النساء".

النصيحة ال ١٥ مأتعتبرش نصيحة قوي بمعناها الحرفي، ممكن نعتبرها إشارة لشيء ما أو تسليط الضوء على ظاهرة معينة؛ ألا وهي إن الراجل كائن من أبسط ما يكون، لو دخلنا جوّه دماغ أي راجل هتلاقي أسرة - بيت - مسؤوليات، ولو فيه رفاهية زيادة ممكن تلاقي أحلام وطموحات، ولذلك الراجل ماعندوش القدرة الرهيب اللي عند الست في التخطيط وملاحظة التفاصيل، ووعي تصدق أي ست تقولك أنا ماخدتش بالي من كذا، يا ابن عبي ده الواحد شاكك إن الستات أصلاً بتنزّل في شريحة في دماغهم شبه الملقاط كده، بيلقظوا إشارات من بعض ويفضلوا يخططوا ويوصلوا لاستنتاجات، ويحطوا قواعد ويرسموا طرق لحاجات من الوارد إنها ماحصلتُش، أو للدقة يعني هي بتكون فعلاً حصلت لكن في دماغهم هما وبس، والراجل يا حبة عيني ضعيف.. مسكين، ومغلوب على أمره، ويا عيني مايعرفش أي حاجة عن غرفة العمليات اللي ماشية جنبه مخبئاله إيه في كل خطوة، ويا سلام بقى لو قفّشت حاجة مفيدة لنسج الخيط الدرامي جوّه عقلها، يبقى يا ويلك يا



سواد ليلك ع اللي هتشوفه! هتفضل مش فاهم فيه إيه بيحصل زي الأهبل كده، ومن الناحية الثانية سامع تلقيح واتهامات لحاجة انت أصلاً مش عارف إنها موجودة، عشان كده بنصح أي ست إنها لما تيجي تتعامل مع الرجل اللي معاها تعامله كأنه طفل في تانية ابتدائي، يا ستي مش انتوا مبسوطين وحابين تكونوا الطرف الأذكي؟!

أديني بقولكم أهو من دلوقتي.. اعتبروا نفسكم الطرف الأذكي، بس خلونا معاكم في الصورة، وأبوس إيديكم حد يفهمنا بس.. بتعملوها ازاي بالله عليكم؟



الفصل السادس

حان الوقت أخيرًا ودقت ساعة العمل، كتكوت وكتكوتة أخيرًا وبعد طول انتظار، وبعد صبر ومعاناة لا تنتهي، وبعد سنوات من الخناق و١٥ فصل في رواية ونص طَلَعُوا فيها عين اللي جابونا، حانت الآن اللحظة الحاسمة..

كتكوت خلاص جهّز نفسه وأعدَّ العُدَّة عشان يوم الفرح، وبالرغم من إدراك كتكوت إن مصطلح ارتباط جاي من الربط، ومفيش حاجة بتتربط غير الهيام لامؤاخذة، قرّر إنه يكمل المسيرة للأخرويلتزم بكلامه، ويطلع راجل ويحقق حلم حياته المتلخص في لعب دور البطولة بمسلسل نصيبي وقسمتك؛ لأنه كان top-fan لهاني سلامة وواحد الكريستالة على ال official page بتاعته.

وخلاص كتكوتة بقت بتاعته، وقسمته ونصيبه يعني، وزى ما قالوها الناس زمان: اللي من نصيبك هيصيبك هيصيبك، ومحدث يا ابني كبير ع الدنيا، وأشهد أن لا إله إلا الله وأن محمدًا رسول الله.

آه آه قبل ما أقفل صحيح.. تفتكروا الفرح هيعيّ كده من غير أي مشاكل فعلاً؟

والله هو عن نفسي أتمنى، مع إني أشك.





مشهد 1

في صباح يوم الفرح استيقظ كتكوت في وقت متأخر جداً عشان كان سهران طول الليل مع صحابه اللي جابولُه ريدبول وسمان في حفلة توديع العزوبية، وبسرعة جداً قام غسل وشه وساب مدرستُه ورمى كراسته وراح جرّ شكلها.. قصدي يعني جهّز نفسه بالعافية في بيته اللي اتقلب فجأة مولد سيدي العريان بالظبط.

أهل بتلبس، صحاب بتقطع، ناس بتصوّر الأجواء، وناس تانية بتعمل أكل للموجودين وحاجة في منتهى الدوشة والإزعاج؛ مما دفع كتكوت للهروب والانعزال صوب صديقة الحلاق عشان يظبط شعره، ينتف ريشه ويستئتي عنده لحد ميعاد الفرح.

وفعلاً عدّى الوقت بسرعة وسط مكالمات كتكوتة اللي باينة عند الميكب ارتيست بقالها ٥ أيام، وكل شوية تبعث لكتكوت تقوله إنها قربت تخلص.

وفعلاً في الميعاد المحدد كان كل شيء خلصان، العريس وأصحابه جاهزين.. أهله في القاعة وزفة الموتسيكلات جاهزة وكله مستعد للذهاب إلى الكوافير في إجراء روتيني عشان يروحوا للاستوديو يتصوروا، وفعلاً وصل كتكوت في ميعاده ولقى اليوم زحمة عند الكوافير وكله بيتجوز! مش عشان احنا في أجازة الصيف مثلاً وهرمون التستفرخون عالي مثلاً، إنما عشان قاعة اللؤلؤة عاملة خصم ٤٠٪^[ALM] على حجز أي فرح وبعدها تدفع ٢٠٪^[ALM] تأمين زيادة.

٢٠٪^[ALM] ضريبة ملاهي

٢٠٪^[ALM] بدل ثراء فاحش "عشان محدش معاه فلوس يتجوز دلوقتي، واللي بيتجوز بنشيله من التموين"



۲۰٪ ALM دمغات

۲۰٪ ALM اكراميات

٢٠٪ [ALM] بَدَل طَبِيعَة عَمَل

و ٢٠٪ ^[ALM] بدل ما أعورك!

المهم يعني كنتكوت وصل فعلاً لقي صف عرايس واقف مستتي؛
فدخل وخد كنتكوته من النّص ، شويّة وسمع ناس بتهيّص وتغني وبدأت
المزيكا تعلّى مع صوت ضرب الننا؛ رليكتشف بعد كده إن اللي في إيده دي
مش كنتكوته بعد ما سمع كنتكوته نفسها بتنادي عليه من بعيد؛ ليدرك
كنتكوت إنه اتلخبط في عروسته وخد واحدة تانية بدالها، مش عشان هما
فراخ ونفس الشكل والسّحنة بس، لا عشان معروف في مصر إن كل
العر ايس يتخرج من الكو افر شبه بعض بالظبط!

- إيه اللى انتى لابساه ده يا كتكوتة؟!

- شوفت المفاحاة؟! روحت غيّرت الفستان وحيث أفاجئك.

- تفاجئني إيه بس وزفت إيه؟! الفستان ده عريان قوي وجناحاتك كلها بابتة.

- مشيها بقي يا كتكوت وخلي اليوم يعدى.. بُص صور التحيزات.

- إيه ده، إيه ده، إيه ده؟! مين الواد الملزق اللى و اقف جنبك ده؟!

- ملزق إيه بس يا كتكوت؟ ده الفتوجر افر و كان بيعمل سيشن الحنة.

- یعنی ده کان معاکی جوّه و انتی بتلیسی ده؟

- آه.

- أح

اارب وحدي يا دنيا، يا بنت الجزم ده أنا الى اسمي جوزك اتحايلت



عليكي تبعتيلي صورة أشوفك قولتي لا.. وألاقيكي رايحة تقعدي عريانة
مع واحد غريب يا بنت ال *&^%\$#@

- واحد غريب مين بس يا كتكوت؟! انت فاهم غلط أكيد، ده شادي.

- شادي ده زي هاني يعني ولا إيه؟

- ده شادي الفوتوجرافر، بقولك إيه.. هو انت من أولها هتتلكلي
بقي على كل حاجة؟! ده أنا مامي قايلالي ومفهماني كل حاجة يا بابا، من
هنا ورايح أنا اللي كلامي هيمشي والبيت ده مالوش غير رأي واحد وهو
رأي أنا.

طبعا عارفين الغلطة فين وهي لسة طازة أهى.

النصيحة 16 بتقول:

"المسيطرة مش اللي تمشي الرجل مسطرة، المسيطرة
هي اللي تعرف بدل ما تخرب على نفسها تعتذر وتجيب ورا".

مش عارف ليه الستات خابت قوي قوي الفترة دي، بقت موضه
غريبه طالعه كده بتقول للستات حاجات تخليهم مقتنعين إنهم لازم
يتولوا الدفة في قيادة العلاقة، لا وللأسف بقي مزروع في دماغ كل ست
إن الكتكوتة الجدعة هي اللي تمشي جوزها على عجين مايخبطوش.

يا جماعة الكلام ده مش صح، ولا منطقي بالمرة، ولا فيه راجل في
الدنيا هي قبل إن الست بتاعته هي اللي تمشيه، الراجل الصح هو اللي
ياخد رأي مراته، يشاورها ويحاول يرضيها، والست العاقلة هي اللي
تحاول تنجج العلاقة بإنها تكبر جوزها وماتسمش إنها تخرب بيتها،
عشان كده الصح في وقت الخناقات والزعل، وعشان العلاقة تنجح
فعلاً، ماينفعش نبذل فطرة الحياة في تولي الراجل دفة القيادة بمشورة



الست اللي معاه، عشان الست الأصيلة هي اللي بتبقى عارفة إن استمرار
الحياة بشكل ناجح وبيت سوي هي دي السيطرة الحقيقية.

بمناسبة الفطرة بقى وعشان اللبش اللي حاصل اليومين دول في
الجو بسبب البسكِلَات، حايين نعرّف الناس بألوان الفطرة الطبيعية،
واللي هي (لبنى - بينك - أصفر)، واللي بيمثلوا (ذكر - أنثى - كتكوت).



مشهد 2

عشان الدنيا ماتخربش وعشان الجواز ماتبوظش، الناس اتدخلت في آخر ثانية لإنقاذ الموقف، وطبعاً ده بعد ما كتكوتة عملت إنها مغى عليها وراحت مشغلة قصيدة "تعبت فقومت كلمته، ما أنا بنته" بتاعة أميرة البيلي وسط نظرات مرببة من أبوها، اللي قرر يطنش هذا المحن اللا مقبول، وأهو الدنيا تعدي وخلص بدل ما يتقال إن البت اتطلقت ليلة فرحها.

وعلى ذكر الفرع بقى، وبما إننا في آخر الجزء الأول متخدناش راحتنا في وصف فرح الحاج أحما أبو كتكوت؛ فأحب أقولك إن الأفراح في مصر بتنقسم ل ٤ فقرات رئيسية، وهما (الصور - التعليقات - المفقودات - صغار المعازيم)، ومع وجود مؤثر خارجي اللي هو الدي جي، وعامل حفاز اللي هو طبعاً الأكل.. يصبح الفرع المصري أسطورة خالدة عبر التاريخ بقواعده وأساليبه الخاصة، تماماً كما هو الحال في فرح سنية بنت الحاج عبغفور البرعي.

الحقيقة إن الفرع كاد أن يمر بسلام وبلا أي مشاكل تذكر، إلا أن بنت خال عمة أخت صاحبة مرات ست عم العريس قررت تبيض عليهم دلوقتي، لا لا مش بالمعنى القذر اللي جه في دماغك يا محترم، هي الست حامل بقالها ٢١ يوم وجه ميعاد الطلق عادي!

و بين الانقسام الشديد حول حرمانية قدوم الأطفال للدنيا في فرح، وإنه عادي يعني ده فرح وحلال الله اكبر.

قرر الحاج أحما إنهاء هذا النزاع وحسم الجدل والاتصال بفقيه العالم وشيخها الجليل عبد الله رشدي، وفي مقولة أخرى عبده مجاني للحصول منه على فتوى بخصوص حالة المرأة دي، واللي رد عليهم وقال:



ادبحوا المرأة أصلاً؛ لأنها هي السبب، هي لو كانت ست محترمة ما كانتش سمحت لأي ديك إنه يلمسها، وبعدين هو عشان جوزها يبقى خلاص بقى من حقّه يتمرقع ويتفلّق معاها!

ثم السؤال الأهم، يعني إيه امرأة أصلاً يا جماعة!

طبعاً الست سمعت الكلام من هنا وقامت رَوّحت عادي قبل ما تصدُر فتوى تحق للراجل إنه يفرّتها لأنه أقوى، والفرح استمر عادي عشان الحكبة الدرامية ماتوقّش مني، وكانت الدنيا تمام لحد ما قبل الرقصة السلو الأخيرة، تحديداً في اللحظة اللي قررت فيها كتكوتة تروح تجيب المايك وتقول هذا الحديث الساخر اللي لا يمت للواقع بصلة "واحنا مش سارقينّه من فيديو الترنّد إياه".

- كتكوت، معلش عاوزاك.

- خير يا حبيبي؟

- أولاً، أنا بحمد ربنا إني اختارتك انت.. انت الأهل والسند والظهر والورك.

- وانتِ كمان والله يا قلبي.

- معلش بس اسمعني للآخر.

- طبعاً اتفضلي.

- ما عنديش شك لو للحظة إنك اختياري الصبح وأعظم انتصاراتي.

- وانتِ كمان والله يا حبيبي.

- عاوزه أطلب منك طلب واحد بس.

- اتفضلي.

- أهلي دول أنا ماليش غيرهم، اوعدني إنك تراعي ربنا فيّا وفيهم، وأمي

ثم أمي ثم أمي يا كتكوت.



- مالها أمك بقي؟

- لا مش عارفة، هي ماقالتش حاجة بعد أمي!

- يعني هي قالت أمك؟! يا شيخة أمك والله!

"الأنانية المفرطة بتضيع أي علاقة وللأبد".

النصيحة ال ١٧ بتقول إن العلاقات الأنانية بتفشل دايمًا، وعليها
فإن المفروض كل طرف يأخذ باله هو بيقول إيه وبيقوله امتي؟

يعني عشان مانأخدش الوضع لمكان أكبر، وعشان مانطوّلش في
النقطة الجدلية اللي الكلام فيها مش هيخلص ولا ينتهي؛ فموقف زي
اللي حصل ده أنا بعتبره منتهى الأنانية، مش لأن الست كان لها طلب
وحبت تقوله، بس لأنها باحتصار سلّطت الضوء على نفسها بس عشان
تقول اللي هي عاوزه، اعتمدت على وازع ديني بيمسّ قلوب الناس بحيث
محدش يعرف يغلّطها، وقامت متكلمة بطريقة مش مناسبة للأحداث
عشان تاخذ لقطة أو شو (والله أعلم بالنوايا).

هي ماراعتش خالص شكل الرجل اللي معاها هيكون عامل ازاي ولا
منظره إيه وسط أهله وكل الحضور، وهو تقريبًا بيعامل معاملة المتذبذب
في حصة فيزيا في المدرسة الثانوي!

هي كل اللي فكرت فيه هي وبس، هي عشان عاوزه تقول، هي عشان
عاوزه تبان عشان أي سبب أيًا كان.. في النهاية النوع ده من العلاقات
بيفشل فشل سريع، بيسقط من على منحدر كبير بسرعة الضوء، عشان
العلاقة اللي مانتقوش على احترام متبادل بين الطرفين غالبًا بتكون
نهايتها مأساوية -زي ما حصل مع البنت صاحبة الفيديو الأصلي في الآخر
واللي انتهت علاقتها بالطلاق-، جايز الناس تغلّطني في إني بضرب مثال
بحد مش من حقي أبقي حَكَم في مشكلته، جايز ماليش إني أبقي قاضي في



قضية محدش وِكلني أتكلم عنها، بس بما إن الموضوع اتحوّل لقضية رقم
عام فمن حقّي إني أستغل الجزء اللي يخدم حديثي فقط من باب التنبيه
لا الوعظ.

وعليها... يا جماعة خدوا بالكوا - وربوا عيالكووا.



مشهد 3

الفرح خلاص تم والعريس أهو اتلم، واللييلة عدت عليهم عسل كيفاً وكماً، وطبعاً مع بعض الفقرات الهلوانية اللي بتحصل من زيارات الأهل والطواف في جميع أركان الشقة ولا كأنهم في الصفا والمروة، وبعد الغمز واللمز بين كتكوتة ومامتها وكتكوت وأبوه، غادر الجميع عش الزوجية بعد الدعوات والمباركات والنقوطة والحلويات، بدأت كتكوتة تأكل كتكوت في بؤه من صينية الكفار اللي مالىانة بالفطار، وصممت إن محدش هياكل الفرخة الحلوة دي ويخلصها غير كتكوت عشان ترمّ عضمه وتعينه على شقاه، وبمجرد ما كتكوت كلّ وانبسّط وغسل إيدته، فاجئته كتكوتة إن الحلوة اللي لسه متزغطها دي كانت الفرخة اللي بترقص بكتفها امبارح في فرحهم، واللي كتكوت مانزلش عينه من عليها طول الليل، في رسالة خفية فحواها ان الحلوة اللي هتقرب من كتكوت حتماً ولا بدّ تموت.

وبعد حالة الصمت والصدمة اللي دخل فيها كتكوت من عدم الاستيعاب للجريمة اللي لسه حاصلة دي، كلم كتكوت فرخ صاحبه وطلب منه يحي ينقذه من الأزمة اللي هو فيها، واللي كان فاكرها في الأول "سيكو سيكو"، خصوصاً مع صوت كتكوت المكسور، وقعد يطمئنّه إن ده عادي بيحصل من التوتر وإنه يهدى وكل شيء هيبقى كويس، ولسه فرخ هيزود في الكلام كتكوت وقفه وقاله اللي حصل، مما دفع فرخ إلى القدوم سريعاً، وفي أقل من نص ساعة كان هو وممراته الحامل موجودين في قعدة ودّية ومذبحة جماعية للرجالة تحت مسمى "نقاش ودّي لطيف"!

- منوريا فرخ، منورة يا فرخة.. البيت نور والله.



- | 94 |



- النصيحة ال ٨ بتقول "ازدواجية المعايير، تعمل مشاكل كثير".

للأسف الستات في مصر مش فاهمة ولا عارفة الفرق بين النقاش والاعتراض، هو في ثقافتهم إن كل ما المرأة اعتراض على حاجة هي كده شخصية قوية وناجحة، حتى لو ده كان غلط ومش طبيعي؛ لأنه بيبقى أشبه طول الوقت بالقنبلة الموقوتة، أصل كون الفرد نفسه يوافق على حاجة وعكسها، أو إنه يرفض شيء ويتقبله في الوقت نفسه حسب



مزاجيته الخاصة ده بيؤدي في الآخر لخلل في العلاقة واضطراب بين أي اتنين، حتى لو قدرُوا يعدُّوا المركب أكثر من مرة، ففي الآخر خالص المركب دي هتتخرم وهتغرق بيهم هما الاتنين، وفي الآخر اللي بقوله ده ممكن يكون كلام غلط فيه شوية صح، أو صح جواه حبة غلط.. مش عارف، أقولك؟ خلي الستات هي اللي تحكم!



الفصل السابع

الحمد لله دلوقتي الملحمة خلصت، الجواز تمّ على خير، وكتكوت وكتكوتة بدؤوا مرحلة جديدة في حياتهم.

برضه اللي متابعني من الجزء الأول عارف إن عدد الفصول بيساوي عدد المراحل، يعني المرحلة الأولى فصل، الثانية فصلين، الثالثة ٣ فصول.. وحاليًا احنا في المرحلة الرابعة الختامية والتي بتكون من ٤ فصول.

المرحلة دي بدأت بدري قوي بظهور فرخ الأكثر خبرة والصديق المنقذ باليد المساعدة بصورة وشكل كبير جدًا في حياة كتكوت، إما عن طريق النصائح الزوجية باعتباره عريس قديم، وإما عن طريق الدعم النفسي والمادي بسبب فرق الخبرة، أو عن طريق التدخل المباشر في اللحظات العصيبة لمنع أي خلاف محتمل.

في البداية كانت نصيحة فرخ لكتكوت إن الست من دول مايمهّاش في الراجل غير حاجة واحدة، حاجة صغيرة طولها ٨ سم ولو مش موجودة الراجل بيتفضح.

وعشان كتكوت دماغه بايظة وكان مقصّي مراهقته على مواقع الجمهورية الرومانية بألوانها "الأحمر - الأزرق - الأصفر"، وكان لسه هيخش في فرخ شمال ويعرفه إنه كتكوت محترم وماينفعش يسكت ع الإهانة دي، قام فرخ بتوضيح الصورة بأن ال ٨ سم اللي يقصدهم بيعبروا عن طول كارت الفيزا، والتي من غيره الستات لا يمكن تهدأ ولا يرتاحلها بال، عشان كده لازم كتكوت يشتغل على نفسه طول الوقت لزيادة حسابه البنكي وتوفير رصيد سحب لا نهائي من أجل مراته.



ولأن التنوع مطلوب وأساسي لاستمرار الحياة بنمطها الرائع، نصَح فرخ كتكوت إنه يخلّي عنده أمانِي وأحلام عشان ينجح في حياته، وفي اللحظة دي صرخ كتكوت في وش فرخ وقاله إنه مش هينفع يجيب نسوان وكتكوتة مش في الشقة؛ عشان لو جات ممكن تطرّده، إنما لو أمانِي وأحلام عندهم مُكنة ممكن يبقى يرُوحلهم هو، لينظر فرخ إلى كتكوت نظرة احتفار دونيّة، ويلوي شفّتيه إلى أعلى متأثّرًا بتريند التيك توك، ثم يخبط كفًا على الآخر وهو يصيح في وجه كتكوت قائلاً "مفيش فايده".



مشهد 1

في نقاش عقلاي لطيف جداً دون الحاجة إلى الصوت والزعيق والعياط والشحفة، كان الحديث داير بين كتكوت وكتكوتة على اختيار مكان لتقضية شهر العسل، وبعد مشورة العيلة والأهل، الصحاب والجيران، وأنا وانت يا حبيبي ونجوم الليل وبس، وبعد عمل vote على انستجرام و poll على فيس بوك، تم الإجماع على اختيار هاسيندا باي لتقضية شهر العسل بعيداً عن الناس والكوكب والحياة بأجوائها المزدحمة بشكل عام، وبالفعل جهّزت كتكوتة شنطها وكيسة سمرا فيها هدموم جوزها، بينما قام كتكوت بإرسال official-mail إلى شركته وطلب أجازة وضع؛ لأن وضعه كعريس أصبح في غاية الخطورة، استألف بعدها عربية من واحد صاحبه، كارنيهات هاسيندا من واحد تاني، وفلوس السفر من التالت، والرابع سجّله أوريجي ☺!

المهم الرحلة بدأت من بزنينة إمارات مصر لتفويل العربية وحصولهم على كوب الكابتشينو الرائع، ومن ثم انطلقت السيارة مشغلة ألبوم عمرو دياب اللي مش هيعرفوا يسمعوه في الحفله اللي لا يمكن يروحوها، مش لأنها just for humans، إنما عشان ما عندهم مش تيشترتات بيضا بعد ما الغسالة الأوتوماتيك خرطت الهدوم البيضاء؛ نظراً لأن كتكوتة لسه مستجدة في أمور المنزل وما تعرفش إن الأبيض بيتغسل لوحده والألوان بيتغسل لوحده.

دلوقتي بقى واستكمالاً للرحلة في وسط الطريق والأجواء الهاديه الرايقة دي، صرحت كتكوتة إنها خلاص مش قادرة تستحمل، وإنها لازم تنصرف دلوقتي حالاً؛ لأنها كل ما تقول لكتكوت إنها مزنوقة يقولها هانت فاضل ع الحمام ٤٠ كيلو!



المهم، بعد لف ودوران من عند مارينا، وإحساس كنتكوت بالعجز لأول مرة أمام اللوح الاسترشادية الصماء؛ لأنه مش عارف المفروض يخش من أنهى اتجاه في الصينية اللي قدامه، يعني من السريع للسريع؟ ولا من السريع للبطيء؟ ولا من البطيء للبطيء العكسي؟ لأن أكيد المهندس اللي عمل الصينية دي أكيد كان حالف على مراته اللي سابته مرمي في الشمس وخذت العيال وطلعت الساحل ليدوّخها السبع دوخات.

وأخيرًا وبعد كل هذا العبث وصل كنتكوت وكنتكوتة للقرية، فضُّوا سنطهم واستعدوا كويس لليوم الأول من أيام الخناقات الجميلة والمعارك التي لا تنتهي في أيام الزواج الأولى..

- بقولك إيه.. تلعي أتوبيس كومبليه؟
- أتوبيس كومبليه!! يعني مش stop it is completed.
- لا، هي أتوبيس كومبليه ياختي.
- ياختي! يا ابني هوانت فاكرونا في بلطيم؟!
- مالها بلطيم يعني مش فاهم، هما عشان من بلد تانية يعني؟ ما كلنا اخوات في الإسلام، وبعدين لامؤاخدة يعني هما حاطين في القايمة الارضادية للساحل ممنوع نلعب أتوبيس كومبليه، ولا هو يا نشترى قول أميم يا بلاش.
- مالها قول أميم بقى؟! على فكرة بقى سارة أبو الخير دي بنت ناجحة جدًا وشاطرة قوي.

- يا ستي بلا سارة أبو الخير، بلا يارا أبو الغير، يلا نلعب.
- ماشي ماشي.. يلا.
- عاوز نبات بحرف ال (ب).
- بطيخة، هات نبات بحرف ال مميمم ال (ق).



- قاف؟ يبقى قلب بطيخة.
- انت بهزر؟! بقولك إيه.. أنا غلطانة إني سمعت كلامك، أنا نازلة البحر.
- كدة! هتنزلي كدة؟
- أيوه عادي يعني، احنا نازلين في هاسيندا.
- لا، باللبس ده احنا نازلين جهنم يا حبيبتي، امشي الله يباركك اقلعي البتاع ده واللبسي حاجة عدلة.
- هو إيه ده أصلاً؟! ما أنا بنزل كده مع أهلي على طول.
- يا ستي أهلك على راسي، بس هما حاجة وأنا حاجة تانية، أديني بطلب منك بهدوء أهو تغيري اللبس ده.
- طب ممكن أنزل اجيب مايوه عشان مش معايا غير الاستايلات دي؟
- ماشي، هنزل أجيبلك.
- وليه ما أنزلش أنا؟! طول عمري أنا اللي بجيب الحاجات دي لنفسني.
- أرجوكي يا كتكوتة.. اللي كان بيحصل زمان حاجة، وإني أوافق أنزلك بالبكيي دي حاجة تانية.
- أوف بقى، دي عيشة تطهق، ده الواحد كان عايش في بيت أهله ملك والله.

"جوزك على ما تعوّدته".

النصحية ال ١٩ قد تبدو ليكم حاجة حلوة، لكنها مش بالمعنى الحرفي، الطبيعي في أول الجواز إن كل واحد جاي من بيت معين بثقافة معينة، والموضوع ده احنا اتكلمنا فيه قبل كده وأكثر من مرة، عشان كده في الشهور الأولى من الجواز ماينتفعش الطرفين يتعاملوا بنفس



الطريقة اللي كل واحد جاي بيها من بيته بلانية أو استعداد لتقبّل كلام
أو رأي آخر! عشان غالبًا الاتنين هيصطدموا بالواقع وهتتحول الحياة
إلى برميل من سوء التعامل العنيف، اللي غالبًا بتكون نتيجته كارثية،
عشان كده يفضل الاتفاق على كل التفاصيل الصغيرة والكبيرة من الأول
خالص وطول فترة الخطوبة، ولوده ماحصلش وفي أي تفصيلة اتنسّت،
يبقى نتعامل مع الموضوع بحكمة أكبر من كده؛ لأن ولا جوزك نسخة
مصغرة من باباكي ولا مراتك جاية بنفس طباع مامتك؛ فيفضل إنه يتم
توضيح الصورة في كل الأمور الخاصة بكم وبشكل بيتكم وتصرفاتكم من
الأول، بداية من مواعيد الخلفة وشكل نظام البيت، مرورًا بالألوان
المفضّلة والطقوس البسيطة اللي كل واحد فيهم متعود يعملها؛ لأن معنى
النصيحة هو مش إنك تمشيّه على نظام مايلخبطوش، لا.. إنك تمشيّه
بالشكل العقلاني الوسط مع شوية ترخية للخيط عقبال ما يتعود
وتطبّعوا على بعض، يعني على ما تعودية انتي على طباعك.



مشهد 2

انتهى شهر العسل على خير ورجع الكتاكيت لبيتهم ثاني، صحيح هو ماكانش شهر قوي، وماكانش كله عسل يعني، إلا إنها عدت بسلام المرادي، وعشان الأجازة بتاعة كتكوت كانت لسه ماخلصتش، وبمناسبة اقتراب الكريسماس واحتفالات رأس السنة "ما هو طبيعي كانوا يتجوزوا في الشتا، دول كتاكيت حضرتك.. يموتوا لو اتجوزوا في الحرزينا".

عمومًا.. كتكوت كان شايف إنه عشان يمّتي أمورّه والدنيا تبقى كويسة؛ فلا مفرّ من إنه يخرج كتكوتة في راس السنة مع الغزالات الرايقة والناس الحلوة سايقة، وقبل ما تقوم خناقة لرب السما ما يعلم بها حد بسبب اعتقاد كتكوتة إن زوجها الخاين المدعو كتكوت عينه فارغة وبيعاكس غزالات الناس، أفصح كتكوت إن الغزالات دي هي غزالات الكريسماس، والناس الحلوة دي همّا بابا نويل ورجالته، وإن كتكوت أساسًا مقررّ إنهم يحتفلوا لوحدهم من غير حد خالص، وتحديدًا يعني فرخ اللي كتكوتة شايقة إنه مثال للصديق الضالّي الكداب، واللي كتكوت -على العكس منها- شايف إنه حرام نحكم على حد من غير سُلطة؛ لأن الكداب ده ممكن يكون عند ربنا أحسن مني ومنك، وعشان كده قرر كتكوت إن اليوم ده ه يكون بتاعهم لوحدهم، وهيروحو زد بارك ياكلوا موتشي باللوتس (واللي ميعرفش اللوتس ده هو كان بسكوت أهلاوي أبو ٢ جنيه وواحد أهبل جاب البواكي الكسر عمل منها صُوص بدل ما تترمي يعني، وعشان محدش يشمّ فيه ويقول إنه بواقي وكمان طعمه وحش، راح لاتنين زمايله في المطابع الأميرية عملوله غلافة محترمة، وقام مقدّمه في هيئة الاستثمار على إنه منتج مستورد، ورشة القرفة عشان سينس المصداقية، وهو في الآخر لا لون ولا شكل ولا طعم، والناس عاملة منه إسطورة ع الفاضي)، أما الموتشي بقى زي ما معروف لكل



الناس هو حلويات الرز اليابانية، وده ممكن نجيبه من كشك عم يونج اللي على أول الشارع عادي.

- بقولك يا كتكوتة.. تعالي نتصور مع النافورة صورة مجنونة من بتوعنا.

- لا مش عاوزه.

- ليه؟!

- حاسّة إننا كبرنا ع الحاجات دي.

- فعلاً؟!، طب تعرفي مصر اتبّنت ازاي؟

- لا معرفش.

- باللانшон، عشان اللي بنّى مصر كان في الأصل حلواني.

- ممم لطيفة، بس لو كنت قولت المقاولين العرب كانت هتبقى أوقع وأحلى.

- هو انتي فيه حاجة مضايقي؟

- لا عادي، بس كنت حابة أشوفك أعقل من كده.

- أعقل ازاي يعني؟! هو أنا مجنون قدامك؟

- لا، بس حركات الصبيان بتاعة الخطوبة دي مابقتش واكله دلوقتي.

- أوبا أوبا أوبا، شايقة الحنة الأوزي اللي معديّة قدامك دي؟

- انت بتعاكسها قدامي؟! انت اتجنّنت؟!

- كتكوتة أنا بهزر، وبعدين ما طول عمري بعاكس قدامك.

- ده كان زمان يا حبيبي، أيام ما كنا مخطوبين.. دلوقتي احنا

متجوزين.

- يا سلام! طيب.

- انت كمان بتديّرشك وتولع سجائر، مش قولتلك بطل حركات

المخطوبين دي؟



"لو بيتك من إزاز، يبقى هيتكسر بعد الجواز"

ليه؟! ليه بجد والله؟! يعني أفهم بس بالله عليكم، ايه الفرق والسبب لكل ده؟! ليه الجواز بيقتضي على كل التفاصيل الحلوة والعادات اللي كانت موجودة قبل الجواز؟ النصيحة ٢٠ بتقول إياكي تتعامل مع جوزك بعد الجواز عكس ما كنتي بتتعاملي قبله؛ لأن المزايا العادية وردود الأفعال اللي كانت بينكم قبل الجواز هي اللي ساعدت على استمرار العلاقة، ماينفعش بعد الجواز تخسروا صحوبيتكم الجميلة دي، الفرق اللي بيبان صغير في التفاصيل ده هو اللي بيعمل حواجز وفروقات كبيرة بعد كده بتؤدي إلى فشل العلاقة والارتطام بالقاع الأسود بلا تفكير، عشان كده العلاقات السوية والمتزنة هي اللي مابتتغيرش بعد الجواز، ولو حصل تغيير فيبقى للأحسن مش للأوحش، يعني الجواز المفروض يبقى ختم سماحية للطرفين إنهم يعملوا حاجات مجنونة أكثر يكسروا بيها روتين الحياة ويتخلوا عن صخب أزماتها، عشان كده نصيحتي لكل ست إنها تصاحب جوزها وماتتغيرش معاه بعد الجواز في النقاط الأساسية اللي كانت السبب الأساسي في جوازهم، مفيش مانع من التجديد في العلاقة بالاتفاق كل فترة عشان تشحن البطارية، ممكن سفر، خروجة، أكلة حلوة، مفاجأة بسيطة غير متوقعة، المهم إنها تحافظ على الروح المتجددة اللي بين الطرفين، والأهم إنها تبقى بين الاثنين الصحاب اللي عرفوا بعض وحبوا بعض قبل الجواز.



مشهد 3

الدنيا مش ألطف حاجة وكتكوت زعلان، كتكوتة مكتئبة ومصممة تنتحر والحياة سودا بالنسباليها، عشان عارفة إن هي السبب والدنيا بايظة خالص، وعشان كتكوت عارف إن الطبيعي هو اللي هيروح يصالحها، عشان ده العادي سواء كان مزعلها، هي اللي مزعلاه، أهلها مزعلينها، مديرها في الشغل مزعلها، زعلانة عشان ضافرها اتقطم، شعرها اتحرق، عشان مكبنة "دي بروين" في الفانتازي وهالاند" الله اكبر ماكينة تهديف متحركة، هو خلاص بقى راضي ومسليم إنه لازم يروح يصالحها، وبما إنه في الجزء الأول خاف وارتدد إنه يعمل الحركة دي، قال المرادي ببقى شجاع ويتوكل على الله ويروح يجيب قطعة يصالح بيها كتكوتة، ويادوب القطعة طلعت وشافت كتكوتة من هنا وراحت حالفة أيمانان مسلمين ما هي سايبه البتّ غير في رغيّف ريتش بيك وهي غرقانة جينة سايحة.

يا ستي اهدي، أبدًا! يا وليّة اهمّدي، برضه أبدًا! يا بنت القطط لو كتكوتة اتاكلت الرواية هتبوظ، ودي تقولك ماليش فيه.

المهم من هنا لهنّا وبطلوع الروح عرفوا يسلكوا البتّ من لسان القطة، وعشان كتكوت ناصح ومارماش الرئيسيت زي كل الناس، عرف يروح بقلب جامد لصاحب محل القطط ويهدّده إنه لو مارجعش القطة هيكلّمه جهاز حماية المستهلك؛ لأنه لسه في ال ١٤ يوم بتوع ضمان الاسترجاع.

المهم الدنيا ظبطت والأمور مشيت تمام، كتكوت لقي زنجر بيكلّمه (أصل مش طبيعي كل ما أنزق في شخصية أجيب فرخ، التنوع مطلوب برضه)، بدأ يشتمه ويتف عليه ويقولّه يا حمار.. بقى عمرك ما اتفرجت



ويقول كتكوت إن مفيش علاقة بين الحلقة بتاعة توم وجيري والموقف اللي لسه حاصل غير إن الموقفين خياليين وشخصياتهم متألّفة، أصل دي عصفورة ودي كتكوته يعني! فلم يجد زنجريدًا من توجيهه وابل من الشتائم إلى mbc 2 بترجمها كلها لـ "تبّا لك"، وقفل السكة في وش كتكوت الي كان شايف إن مفيش أي وجه مقارنة بين الحداثين الي لاتنين فيهم قطط عاوزه تأكل عصافير ، سبحان!!!!!!!!!!!!!!انه!

بالمُناسبة عارفين ليه العصفور أصلع والكتكوت مش أصلع؟

عشان العصفور بيخلق في السما، هوخي هو هو هو هو هو

لا لا، شتيمة لا، خلاص وحياة أمك.. خلااااااااا.

النصيحة ال ٢١ بتقول:

"سقف الطموحات والتصرفات تبادلي".

النصيحة دي طبعًا شارحة نفسها، يعني لو الرجل شاف الست ملكة وعاملها من المنطلق ده هي كمان هتعامله إنه ملك وتحاول طول الوقت تسترضيه والعكس، لو الست توقعت إن هيحصل الأسوأ مش هتلاقي غير إن الأسوأ فعلاً هو اللي بيحصل، أصل الإنسان منّا مجرد طاقة ماشية على رجلين، هالة دائرية بتحدّد حالتك المزاجية عاملة ازاي.

فلو الهالة بتاعتك بتقول إنك كويس هتلاقي الدنيا وردية والحياة سكر، أما لو شايف الحياة سودا والجو العام لا يُوحى بالتفاؤل "مش هتلاقي في وشك دايماً غير النكد"، وعليها بنقول النصيحة للطرفين الاتنين، خلّوا طموحاتكم مالهش سقف، وتوقعوا إن اللى هيحصل هو



| 108 |



- منين يعني إيه؟! أومال الفلوس اللي معاكي فين؟
- قصدك الباقي اللي معايا؟
- ياستي مفرقتش، الباقي اللي معاكي فين؟
- باقي! إيه! ازاي! تعرف عجائب الدنيا كام؟
- سبعة.
- من ألف!
- نعممممم! فاضل من الألف جنيهه اللي واخداها الصبح سبعة جنيهه؟! تصدقي ليكي حق تنتحري، بقولك إيه.. أنا هرمي نفسي من فوق الكنبه وأموت.
- حتى لو قولتلك إني أسفة وإني بحبك؟
- إنك إيه؟
- أسفة.
- لا الثانية.. قولتي بحبك؟
- طبعاً بحبك، بحبك وماليش غيرك يا كتكوت يا كل حاجة في حياتي.





الفصل الثامن

ااااا، هنا سأسكت قليلاً.

من أول ما بدأنا وأنا مستني الفصل ده على أحرّ من الجمر، مش عيب الواحد يبقي عنده شوية ميول للعنف، مفيش مشكلة لما الإنسان يتلذذ شوية بخوف الناس اللي قدامه، حبة استمتاع كده بالرعب في عيون الناس، وعشان أنا مجنون وسادي، لا شادي ده اسهي، سادي اللي جاي من السادية زي fifty shades of grey يعني، وعشان عادي الكوميديا تختلط بالجنان (ورامز جلال بيعملها كل سنة والناس بتشتري عادي يعني)، خلّوني أرفع معاكم الستار عن الفصل الأكثر متعة في الرواية، واللي اتكتّب بمنتهى الحب ومنتهى اللهفة.

اللي حاصل في مدينة الفراه اليومين دول مالوش تفسير ولا حل، كل يوم المدينة تصحى على حادث اختفاء عدد من صغار الكتاكيت بشكل دوري وبتزايد في الأعداد يوم بعد يوم، في الأول كانوا فاكرين إن الموضوع مجرد دعاية أو خطة دعائية للجزء الثالث من فيلم it، بس مع تكرار الحوادث بصورة أكبر، ومع ظهور جثث لبعض الكتاكيت في صورة هياكل عظمية، اتأكّدت الإشاعات اللي بتقول إن اللي بيحصل ده مش من "بيني وايز"، وإن أكيد وراه سفاح محترف، قاتل متسلسل، شيطان رجيم ماعندوش دم ولا قلب، وبالبحت وراء هذا الموضوع الخطير، تم تشكيل لجنة مكوّنة من أشهر محققين البلد وتوجيه الاتهام إلى الفنان محمد محي؛ لأنه "قاتل ويعملها"، وبعد حبسه ٤ أيام على ذمة التحقيق والجرائم لم تتوقف، تم الإفراج عنه من سرايا النيابة بعد غنائه أغنية "مظلوم".





مشهد 1

الترم جميع سكان مدينة الفراخ بالتعليمات، كل الناس فضلت جوّه بيوتها خوفاً من وقوع حادث مأساوي يمنح فرصة واحدة للسفاح إنه يقدر يستولي على أي فرد في البلدة، وبين اجتماعات في بيت كتكوت أو عند فرخ في المحل اللي اتقفل هو كمان، ومع الكثير من اللب والسوداني والعلف الأسباني، ومع كل الأكل المتاح وكيكه ال ١٠ دقائق، كانت جميع الاحتمالات متاحة وواردة من أجل الوصول للحقيقة، وكان من الاقتراحات المفيدة اللي اتقالت عمل نوبات حراسة على مداخل ومخارج البلد زي اللجان الشعبية أيام الثورة، بينما نادى جماعة (فراخ الغد) بتفعيل هاشتاج #اقبضوا_على_السفاح_وخلوا_البلد_ترتاح، وبدأت حملات التصوير اليومية في الشوارع وعلى أبواب المحلات للأوضاع الحالية أملاً في الوصول إلى حل، إلى أن توصّل أحد الحضور إن السفاح ده أكيد هو الأستاذ محمد رمضان للتأكيد على إنه "آخر ديك في مصر"؛ فأكيد دي خطة محكمة عشان يقضي على باقي الديوك، وعشان كده قرروا يروحوا بيته ويخطفوه ويعذبوه بأنهم يستمعوه أغاني ويغطوا صدره لحد ما يعترف، لكنهم سريعاً ما اكتشفوا إن عمرهم ما هيقدرُوا ههؤُوبُوا ناحية بيته؛ لأنه مافيا! مافيا مافيا! بس ممكن يستدرجوه بطريقة تانية؛ هي إنهم بيدؤوا حملة (مدينة الفراخ لا تُرحّب بمحمد رمضان).

وفي الجانب الآخر كان كتكوت وكتكوتة قاعدين تقريباً طول اليوم في وش بعض، مفيش شغل، مفيش خروجات، مفيش نزول حتى للسوبر ماركت، مفيش أي حاجة خالص، هوبيت.. وتليفزيون.. وبس!

- كتكوتة، ما تقومي تعملي لنا أكلة حلوة من إيدك اللي عاوزين يتباسوا دول.



- الأكل عندك جوّه خُش سَخْنُه.
- لا، أنا عاوز حاجة من إيديكي الحلوة، مش عاوز أكل من جوّه.
- طالما مش عاوز من جوّه اطلب من برّه، أهو حتى تنفّع بتوع الديلفري.
- طب سيبك من الأكل، الجوده مش جاي معاكي بأي حاجة تانية؟
- حاجة زي إيه يعني؟!
- حاجة يا عم، خليك لمّاح، ده أنا بقول עליكي أم المفهومية.
- عاوز إيه؟
- يعني النهاردة الخميس فهاه؟!
- عاوز إيه يعني؟
- ماتشين بيس كده ولّا حاجة.
- لا مش عاوزة.
- طب تروحي للكو افير.
- ماليش مزاج.
- طب جلسة spa وطّئي مغربي.
- لا.
- طب نرقص، نشغل فيلم.. أي حاجة والنبي.
- لا.
- أوف بقى، دي بقت عيشة تقرف، بُصّي لنفسك في المرايا كده، فين كتكوتة بتاعة زمان اللي حبيتها من قلبي ها؟ فين البنّوتة الرقيقة اللي كان الحماس واكلها وشغفها مابنتيّش؟! فين البنّت اللي خطفت قلبي من أول يوم شوفتها فيه، فين كتكوتة قوليلي فين؟
- طبعا عارفين أنا عاوز أقول إيه، صح؟



النصيحة ٢٢ بتقول: "إهمال الست في نفسها هو أحد الكوارث الكونية اللي بتخرب أي بيت".

مفيش شك إن الإنسان يحب يشوف كل حاجة حواليه حلوة، ومفيش شك برضه إن ربنا خلق الإنسان في أحسن تقويم، عشان كده بستغرب الستات اللي تبدأ بعد الجواز تهمل في نفسها، خصوصاً في أول العلاقة قبل ما يبقى فيه أطفال.

يا ست الناس ده ربنا جميل يحب الجمال، والراجل كمان والله يحب الجمال ويقدره، فليه الست بقى أول ما تطمئن إن العلاقة استقرت تبدأ تهمل في نفسها؟! الإهمال هنا مش بس مقصود بيه الإهمال الشخصي في الشكل والمظهر العام بس، لا، فيه نوع من الإهمال كمان بيكون إهمال نفسي، زي إنك تسيبي الراجل لوحده فترات طويلة، تبدأي تزهدى وجوده وترفضي بالتدريج تشاركه مشاكل الحياة.. إزاحة التفاصيل، انعدام الرومانسية في لحظاتكم الخاصة وفقدان الشغف، قلة الانبهار بنفس الحاجات اللي كانت مهيرة جداً في أول العلاقة، كل دي أشكال مختلفة للإهمال اللي بيتعرض ليه الراجل مع الست اللي بيعمها، مع التأكيد تاني إننا بنتكلم عن الفترات الزمنية العادية، الأوقات اللي الست بتكون فيها في حالة نفسية ومزاجية كويسة؛ لأن لو نمط الحياة ده بقى هو اللي غالب الكفة طول الوقت، مابيكونش فيه أي حل في العلاقة غير الفشل والانهيار، إما بالانفصال بين الزوجين كحل وذي محترم، أو الخيانة كحل مش محترم، والأسوأ بقى هو كَمّ المهازل وخراب البيوت في محاولة كل طرف للانتصار، والاتنين بينسوا إن الناتج بشع والخسارة أكيدة ومضاعفة للطرفين، والمستفيد الوحيد بتكون محكمة الأسرة في الآخر.



مشهد 2

تم ارتفاع حالات الاختطاف والوصول إلى أقصى حد مسموح به، وبالتالي لا يمكن الخطف إلا بعد مرور ٢٤ ساعة مع التنشيط من أقرب فرع، وعشان الأمر وصل لقمّة ذروته والبوليس مش لاقى حل ولا طريقة عشان يقبض على السفاح، بالذات إن منحى الجريمة فاق توقعاتهم في عيد الأضحى بالرغم من إنه موسم مواشي، وفي نفس الوقت أعياد المسيحيين خلصت من فترة بعيدة؛ فلذلك ماكانش فيه أي حل قدام الشعب الكتكوتي غير تحصين المنازل للعائلات المقتدرة، وذلك بالتعاون مع شركة اللواء نشأت أبو الليل ابن عم كتكوت أبو الليل، المدير السابق في جهاز كشف الجريمة ونائب في مجلس الأمة منذ تأسيسه، والحارس الخاص لبرج القاهرة اللي في شارع أسوان ميدان الكوربة بعد بطاطس أند زلابية بشوية كده، والمكون من ٨ طوابق و٢ أسانسير، أما العائلات الباقية ماكانش قدامهم غير الهجرة للي معاه جنسية ثانية إلى أراضي ديزني لاند، أو العمل بالسخرة في شبكة قنوات cartoon network، مما دعا اللواء نشأت إلى اجتماع عاجل وجّه فيه المهمة إلى صاحب سلسلة مطاعم "لبش" باعتبارها أكثر أماكن بتدعم المازوخية عن طريق تقديم الأكل على أسياخ خازوقية تحت شعار "المشرمة الجماعية"، وهو ما اعتبره نشأت متساوي في الضرر مع تعذيب الجنرال حسين فهبي للست نادية الجندي.

وبالبحث عن مصادر تمويل الفراخ في تلاجات لبش، اكتشفوا إنه بريء؛ لأنه بيعتمد على فراخ مجمدة وحاصلة على شهادة الصحة Iso 5200.

- امتى حوار السفاح يخلص بقى؟! الواحد تعب من الرعب ده.



- ومين سمعك يا كتكوتة والله! عمومًا هانت.
- أنا متفائلة قوي بالجدع اللي اسمه نشأت ده، شكله راجل ماجابتوش ولادة "مش زي ناس كده".
- هو حدّ كان قالك إني المحقق كوناّن ولّا المفتش كرومبو؟! أنا أعمل إيه يعني؟!
- بقى يا راجل مش عارف تخش على كاميرات المراقبة وتخرقها عشان تعرف مين السفاح؟ ولا هو هكرع الفاضي!
- ومين قالك إني مش عامل كده! ده أنا سايب أحسن كاميرا مراقبة في مصر تسجّل كل اللي بيحصل.
- فبن دي؟!
- أم محمد اللي على أول الشارع، أجدع من ١٠٠ رادار وما كينة رصد.
- أهو انت عارف أم محمد دي؟ جوزها جابلها self defence و electric عشان لو حد قربلها تعرف تاخذ حقها منه، مش انت حتى اللي ماجبتليش دبوس طرحة.
- يا ستي حاضر هجيبك بكرة.
- هتجيبلي إيه ولا إيه بقى؟ لبس زيّ زينات ولا دهب زي عدلات؟ ولا واحدة تخدمني في البيت وتحسّسني إني ست الستات؟!
- صلاح جاهين! بالمنظر ده انتي عاوزاني أجيبك صلاح جاهين!
- ويطلع مين صلاح شاهين ده كمان يا أخويا؟!
- شاهين! يا ولي الصابرين!
- مش تجيبلي فارس زي صلاح الدين ولا مارد يخدمني زي علاء الدين، إن شالله حتى لقّة تحلية زي قمر الدين، ولّا هو الناس تجيب وتجيب والحاجة تيجي عند كتكوتة وتخيب!



النصيحة ال ٢٣ بتقول "من يفتح باب المقارنة أولاً يُغلق باب العلاقة أولاً".

أظن إن النصيحة المرادي واضحة وشارحة نفسها، مفيش ست أيّا كانت مكانتها أو ظروفها مابتبصش دايماً للستات اللي زيّها بعين الغيرة، طبع الستات من يوم ما اتولدنا ومش هتتغير، وأنا مش جاي عشان أقول ده صح وده غلط؛ لأن وقت النصايح دي خلاص فات، أنا دلوقتي جاي أتكلّم في حاجة واحدة ألا وهي المقارنة..

الست اللي طول الوقت حاطة نفسها في كفة ميزان مع الناس الثانية، وطول الوقت بتقارن اللي في إيديها بإيد غيرها دي ست لا تصلح تماماً لأنها تعمربيت، محدش قال إن عيب الواحد يبص على الأمثلة الناجحة ويغير منها، بالعكس دي غير بناة ومشروعة! إنما اللي أنا بتكلم فيه هو المقارنة، التقليل من وضع الست الحالي بالنسبة لأوضاع الستات التانيين، شوف مين جاب، شوف مين عمل، شوف مين اشترى!

النوع ده بيخرب على نفسه حياته ويبوّط عيشته لسبيين، الأول هو إن الطمّع مالوش آخر والمقارنات دؤامة مالهاش نهاية، هتوصل لحد هتلاقي فيه أحسن.. هتوصل للأحسن هتلاقي الأحسن قوي وهكذا، مع إنها في الآخر متقسّمة ٢٤ قيراط، يعني اللي واخذ حاجة زيادة في مكان هو فعلاً ناقص عنك في مكان تاني، واللي خير القدر جالّه في شيء هو بالفعل محروم من شيء تاني.

أما السبب الثاني اللي بيخرب على الست في الحالة دي هو الزوج، الرجل اللي جايز بقصد منك أو بدون بتحسّسيه بعجزه، مع إنه لو يملك كان جابلك نجوم الدنيا على كفة، وأمام ضغطك الرهيب ومقارناتك لو طول الوقت هيضطرّ للجّوء لأعمال غير مشروعة عشان يوفّي طلباتك لو



كان غير سوي، وده في أغلب الحالات بيَقُود لنهاية دراميتيكية سودا
تمامًا، أما لو كان ابن ناس ومترَبّي هِيختار ينفصل عَنكَ بكل هدوء
ويشوف طريقة مع طرف جديد يكون واقعي ومَتَزَن أَكْثَر منك، وفي الحالة
دي هتكوني انتي اللي خسرتي كل حاجة بس عشان ما حَسَبْتِهاش صح.



مشهد 3

أثناء سير الكتكوت وحيداً في الشوارع وبأله مشغول زيه زي الكل بمشكلة السفاح اللي لسه محدش عارف يمسكه لحد دلوقتي، لقى نفسه فجأة قدام حاجة ماكانش يتخيّل إنه هيلاقمها، فعلى ناصية أحد الشوارع العشوائيه ذات اللا اسم محدد، اكتشف كتكوت وجود كلب بلدي أجرب قاعد يعيط قدام مدخنة كبيره تعود إلى أحد المطاعم الشهيرة في المنطقة، وعشان كتكوت مبرمج محترف وخبرة قديم استطاع عمل شفرة من خصائصها خلق ترجمة فورية بينه وبين الكلب مكّنّه من اكتشاف الحقيقة، وهي إن الكلب بيعيط على أخوه اللي اتدبح قدام عينه بواسطة الجزار المفتري صاحب المحل ده، وفضل يراقبه لحد ما تعمل الحواوشي السخن اللي بيتقدم للزباين ده.

وبالرغم من مأساوية الحدث وصعوبة وقعّه على قلب الكلب، إلا إنه نورّفي عقل الكتكوت لمبة ونط من مكانه وقال: وجدتها!

وكلم كتكوت زنجروفرخ واللو نشأت بالإضافة للكلب رعد وباقي أفراد الجماعة، وكشف لهم عن خطّة للإيقاع بالسفاح عن طريق البحث في كافة مطاعم الفراخ في المنطقة والقبض على المشتبه فيهم حتى ينتهي التحقيق.

بالفعل الخطة نجحت وقدروا يوصلوا للسفاح، وقبضوا على صاحب سلسلة مطاعم فراخ المهندس اللي اكتشفوا إن هو هو السفاح نفسه، وبعد الضغط عليه ومواجهته بالحقيقة اعترف إنه خريج هندسة وعاطل عن العمل بسبب كثرة المعاهد الخاصة وقلة فرص العمل، وده اللي كان الدافع ليه كحلّ أخير إنه يفتح محل فراخ زي كل البلد ما عملت، وإنه عشان مهووس بالسينما والفنانين قرر يسيّ المطعم فراخ



المهندس على وزن فؤاد المهندس، وأهو منها برضه تبقى لمست إقيه مع الناس عشان هو مهندس وكده.

"ملحوظة.. احنا كمهندسين بنحب كل خمس دقائق نقول إننا مهندسين وكده، أظن واضح يعني".

واضح ولا لا؟!

النصيحة ال ٢٤ بتقول "الاستماع للطرف الآخر أساس لبناء العلاقة".

برضه على قدّ ما النصيحة تبان من برّه سهلة وتقليدية خالص، إلا إن محتواها مختلف جدّا عن اللي في بالكم، طبعي إن أي علاقة اجتماعية بين أكثر من كائن حي بتكون مبنية على الكلام، وطالما فيه طرف بيتكلّم يبقى فيه طرف بيسمع، بس أنا مش جاي أقول كده خالص، أنا جاي أتكلّم تحديدًا عن استماع الست للراجل.

الراجل زي ما هو واضح وزى ما اتكلمنا قبل كده بيميل للهدوء والانعزال أحيانًا، عشان كده لما بيحي الوقت ويحب يتكلّم يفضلّ إنه يلاقيكي مهتمة باللي بيقوله، حتى لو الكلام مش مترتب أو مش مفهوم إلى حد كبير، حتى لو الكلام ده تقني بشكل كبير، لكن اهتمامك بالكلام وتعبيرك عن الفرح استجابة لفرحه أو مواساته في حالة الحزن بيتولد بينكم نوع من كباري التواصل الحقيقية، ومرة بعد مرة وموقف بعد موقف الكوبري ده بيبقى مدينة كاملة، عالم رابط اتبنى بينكم انتوا الاتنين بدون ما تشعروا، وعلما تتحول علاقتكم لشكل أقوى وأكثر استقرارًا، وإلا لو مالقاش الراجل الاستجابة دي ولقى كل أبوابك مقفولة في وشه هيتجه للاكتئاب أو البحث عن طرف تاني يشاركه



التفاصيل، ودي زي ما قولنا قبل كده إيه؟ بداية خراب وفشل وانهيار أي علاقة من الأساس.

- كتكوتي أشطركتكوت في الدنيا، مش هتحكيلى بقى اكتشفت حوار السفاح ازاي؟

- يا عم ماتكسفنناش بقى، مش عاوزين نتكلم عن نفسنا.

- والنبي يا كتكوت والنبي، الواحد مش مصدق إن الحوار خلص.. لا وإيه؟ الكتكوت الجميل بتاعه هو السبب كمان.

- الحمد لله والله، بصي هو الأمر ماكانش صعب قوي، وأغلبه توفيق وحظ من ربنا.

- ونعم بالله، بس ازاي؟

- أنا بعد ما قابلت الكلب ونور الفكرة في عقلي، قُولت الحل إنّي أدور في مخازن جميع مطاعم الفراخ القريبة مننا، ومع البحث على أبلِكيشن طلبات عن الفروع اللي عامله عروض لقيت أكثر من واحد ومنهم فُراخ المهندس، بدأنا ندور في كل المخازن فُراخ ده مكتوب عليه MG، في الأول أنا افكرته واحد بيحاول يسرق التوكيل من منصور شيفورليه، بس بعد كده عرفت الحقيقة، وإن ده مش اختصار العربيات ده اسم صاحب المحل.

- وعرفتها ازاي دي؟

- لا عادي، ده كان واحد معدّي وقالّه ازيك يا محمد يا جمال!

- وهو أي حد اسمه محمد جمال تشكّ فيه كده؟

- لا طبعًا، بس ده اسمه محمد جمال عبد الناصر.

- لا كده عندك حق، طب وatakدت ازاي؟

- اتأكدت بقى أول ما لقيته مشغل مُنير في المخزن، عرفت إن هو على طول.



- طب و ايه علاقة منير بالموضوع؟!
- ازاي بقى؟! مش منير بيقول "بننديج، كل يوم لكن!"
- بننديج! ماشي ماشي نمشيها بننديج عشان خاطر عيونك يا جميل، المهم إنك أنقذتنا يا كتكوت يا بطل، صحيح كل اللي بتقوله ده صُدَف والموضوع جه معاك كده، بس الحمد لله إننا خلصنا من الكابوس ده.
- الحمد لله يا حبيبي.
- انت بطلي يا كتكوت، دا أنا فخورة بيك دلوقتي وبعدين، وهفضل فخورة بيك دايمًا ولآخر العمر.





الفصل التاسع

في الفترة الأخيرة وبسبب ضيق الحال على كتكوت وكتكوتة قرروا إنهم يقضوا أسبوعين في الشهر عند أهلهم، أهو منها توفير للنفقات ومنها راحة لهم من شغل البيت اللي بيتعهم هما الاتنين.

وعشان القعدات العائلية دي بتبقى متوهجة دايمًا ولا تخلو من المشاكل؛ فالأيام الأولى ماعدتش بسلام على كتكوتة في بيت أهل جوزها، وذلك بعد اتهاهما من قبل حماتها بسرقة البيض اللي جاي من الفراخ اللي بيرئوها على السطوح عندهم، وإن البيض أصلاً بيتساب مخصوص عشان خاطر الحلوف كوتكوت أخو كتكوت واللي بيشتغل كابتن جيم في أحد صالات تكبير العضلات؛ لأنه لو معملناش كده وسيبناه من غير تغذية ممكن ياكل البيت كله حرفيًا.

وبعد عدة اتهامات وأيام من الهجوم والدفاع، اكتشفت أم كتكوت إن الفراخ بقت تبيض أكثر من الأول، وأرجعت السبب لده هو شطارتها في اختيار نوع علف نضيف، وإن أكيد ده السبب وهو اللي عمل كده، بينما قالت كتكوتة إن وشها هو اللي كان وش الخير عليهم؛ عشان كده الإنتاج زاد، وفي حديث مطول بين كتكوت وكوتكوت أخوه للبحث في أسباب زيادة إنتاج الفراخ صرح كوتكوت قائلًا:

- يا كتكوت يا أخويا بلاش هبل وحياة أبوك، فراخ إيه يا اسطى اللي بتبيض أكثر؟! يا اسطى اللي ع السطوح دي أصلا ديوك مهاجرة بس بسكلتات، عشان كده حالقين رؤسهم وناتفين ريشهم زي الفراخ.

وعشان كتكوت كان محترم لا بيتفرج على نتفليكس ولا بياكل "إم أند إمز" ماكانش عارف يعني إيه بسكلتات دي، بس أمّا سأل كوتكوت وعرف الحقيقة حلف إنه لا يمكن يقعد ديوك غريبة زي دي مع أهل بيته.



وقبل ما كتكوت يتحرك عشان يطرد الديوك دي جه في باله سؤال
طبيعي يجي في دماغ أي حد، لو اللي ع السطوح دي ديوك أو مال أخوه
ساينهم ليه؟! عشان ينفجر كوتكوت من شدة الضحك ويقولُه إن دي
خطة عشان يشغل حريم البيت في مشاكل صغيرة بحيث
ما يصدعوهمش بمشاكل كبيرة، ودي الاستراتيجية اللي بتتبعها بعض
كواكب البط المجاورة وتُدعى الإلهاء، ولما سأل كتكوت طالما دول ديوك
يبقى البيض بيعي منين؟ ليرد كوتكوت مستهجنًا:

- لاده من ولاد رجب عادي.



مشهد 1

بعد اللي حصل في بيت العيلة قرر كتكوت إنه لازم يشتغل شغلانة تانية عشان يحسّن الدخل وما يضطرش يروح بيت أهله أو أهل كتكوتة تاني، وكعادة أي واحد مش لاقى حاجة يعملها يقرر يبقى انفلونسر أو بلوجر، والخيار الأسهل إنه يبقى فوود ريفيوير، وكل اللي هو محتاجه ٣ كلمات بس، كوزي - چوسي - أوفرريتيد، وعشان كتكوتة أصلاً بلوجر مشهورة، فسهل جداً إنه يستخدم المعدات بتاعتها أو يستخدمها هي شخصياً في محتوى حقيقي بعيد عن العك اللي هي بتعمله؛ لأنها أساساً ماتعرفش الألف من كوز الدرة، ولو طلبت منها تحكي قصة نجاح بدأت بـ ٨٠ جنيه وخلصت برانچ روفرهتقوئي مرة واحد خرج من مول وماكانش معاه غير الـ ٨٠ جنيه دفعهم للباركينج وأدوله عربيتة الرانچ روفر، وبكده ممكن يعملوا فيديوهات ترفهية زي "ريم وبربري".

على ذكرى بربري بقى أغنية مروان بابلو، ممكن كتكوت يخش مجال السين ويكتب أغاني راب؛ لأن حلم حياته كان إنه يطلع شاعر غنائي، وهي كلها كلمة من هنا ويعمل تراك رايق يلّم بيه فيوهات زي الرز، يعني مثلاً يقول:

"مش أوكيه، صاحبي لا مش أوكيه، اوعى تفكرني بانيه"، أو مثلاً "ع الماستر بقول السليم، كتكوت الفشيخ، كتكوت القديم"، وكل ما يتزق في الكلام يروح قايل "هعديها لك المرادي"، وطبعاً عشان احنا عارفين من الجزء الأول العركة القديمة اللي بين مكس والكتاكيت؛ عشان كده كتكوت قرر ما يتعاملش معاه نهائياً، وقام قايل لكتكوتة خدي الفيزا العبي بها بس قلبي مش هتاخديه، ردت قالتله قشطة هاتها مصلحة.

- ها بقى، قولتي إيه؟



- في إيه؟

- اللي أنا قولتهولك؟

- مش فاهمة برضه، يعني خلاص مش لاقى حاجة تعملها غير موضوع
الراب ده؟

- تخيلي بقى نبقى أول كابل عملها في مصر، تجيب مشاهدات أكثر من
حمدي ووفاء، ومش بعيد خلال سنتين نفتح احنا كمان مطعم في
التجمع.

- مش عارفة، أنا شايفة وضعنا دلوقتي كويس، بناكل ونشرب
والعيشة كويسة.

- الحمد لله طبعًا أنا ماقولتش حاجة، بس الواحد عاوز الأحسن
للنهاردة وبكرة، للمستقبل البعيد، ولا نضطر نروح عند أهلي تاني.

- مش عارفة يا كتكوت، أنا كان اقصى طموحي إني أتجوز، مش
عارفة إيه الخطوة اللي المفروضأعملها بعد كده، طول عمري نفسي
أستقل بنفسي بعيد وأخرج من بيت أهلي وخلاص، بعد كده بقى
مافكرتش.

النصيحة ٢٥ بتقول: "الجواز مش آخر الدنيا، ولا عمره

هيكون وسيلة هرب".

غلطة كبيرة بيغلطها معظم بنات الجيل ده وهو الاعتقاد بتاع إن
الجواز هي الخطوة الضرورية والأساسية للخروج من بين العيلة، إما
للاستقلال بالنفس وإحساس الخروج من تحت سيطرة الأهل، وإما
للهرب من مشاكل أو بيئة غير صالحة للمعيشة، أو حتى لو الدنيا تمام
ومفيش أي شيء سيء في حياة البنات بيكون الجواز ساعات على سبيل
التجديد وتجربة شيء مختلف عن روتين الحياة اليومي.



الحقيقة إن الجواز مش ولا سبب من دول، ولا حتى هو سنة الحياة زي ما الناس بتقول، الجواز يعني وصول شخصين ناضجين إلى آخر منحنيات التطور في المرحلة اللي هما فيها، والقدرة على الانتقال لمرحلة جديدة مليانه أحلام وطموحات محتاجة تتحقق، عشان كده ماينفَعش الواحد يتجاوز وهو مش مستعد، ماينفَعش البنات تتجاوز لمجرد رغبتها في أي حاجة من اللي قولنا عليهم؛ لأن الجواز لو ماكانش من الشخص المناسب وفي إطار خطة معينة لتطوير الإنسان لنفسه وتحقيق جزء من أحلامه، يبقى الجواز ده فاشل بكل المقاييس، ولذلك فأنجح العلاقات هي اللي بتعتبر إن الجواز هو الخطوة الأولى في المرحلة اللي بييجي فيها، مش المحطة الأخيرة في الحياة زي ما ناس كتير بتفتكر!



مشهد 2

بعد الفشل الرهيب الي حققه كتكوت في حياته كصانع محتوى ومُغنيّ، قرر كالعادة عدم الاستسلام، واللجوء إلى خطة روتينية قديمة زي إنه يرجع ثاني يدي كورسات تنمية بشرية ومبيعات، باعتبار إن دي الحاجة الوحيدة السهلة الي تجيب فلوس في البلد "طبعًا بعد فشله سابقًا في التنقيب عن الآثار".

وبالفعل اتعلم كتكوت من غلطة المرة الي فاتت وعمل خطة تسويقية مضبوطة، وأعاد صياغة البرنامج الزمني بتاعه وخد كورس إنجلش عشان حبة المصطلحات الي هيهر بها العيال، وتعب وشقي واتمرمط في إحضار المادة العلمية، لا ماكتيهاش ولا حاجه هو تعب لحد ما سرق واي فاي من القهوة عشان يكمل فيديوهات صلاح أبو المجد عادي! وقرر الذهاب لإعطاء أول كورس..

في البداية اتكلم كتكوت عن الحاجات التقليدية بتاعة انتَ تقدر، كُن فعّال، خليك إيجابي، خليك طموح، خليك فولاذي وده مش تعبير مجازي، عاوزاك الدنيا جامد ومفيش وقت التعازي "زي ما قال تامر حسني"، ثم انتقل بعد كده للخطابات السريالية ذات المعنى المزودج، زي مثلاً "انت مش محتاج فوتوشوب عشان تلون حياتك"، أو "لازم تكون إيجابي وتستخدم أثر الفراشة".. "اشتغل على نفسك لحد ما تبقى من الناس الي على قائمة شركات الاستثمار العقاري ذات الوحدات أم ملايين".. وهكذا.

وبالفعل كان كتكوت ناجح جدًّا في الكلام النظري، والناس كلها كانت متأثرة بيه، لحد ما جه وقت الاختبار العملي ونزول كتكوت إلى أرض الميدان ومنها إلى منحدر الفشل.



بدأ الحوار لما كتكوت لقي طفل صغير بيعيط ويقول جعان، كتكوت اتأثر، عيط، اتشحتف جامد والدمعة فرت من عينه، والحماسة خدته وراح شارى للولد أكل عشان يفرّحه، وبدأ يطلب من الناس كلها تبقى إيجابيين زيّه عشان حياتهم تبقى أحسن، وفعلًا كانت الأمور هتعدّي بسلام وكان اليوم هيعدي لولا إن أهل الولد اللي كانوا تاهوا وهما بيجيبيو مايه من الكُشك اللي على أول البلد عشان هما مش من هنا وصلوا فجأة وعرفوا اللي حصل، ومن ساعتها الجنونة مسكتهم، وقفشوا في رقبة كتكوت وهاتك يا ضرب، وحلفوا ما يسيبوه لحد ما بيأثله صاحب، عشان كتكوت ماشافش البريسليت اللي في إيد الولد وبتقول إن محدش يأكله عشان عنده تحليل صايم وهما ما صدقوا يخلّوه ماياكلش، وطبعًا اليوم باظ والكورس باظ والشغلانة ضاعت من كتكوت الفقرا اللي رجع لكتكوتة وهوشايل خيبته على إيده.

- عليه العوض ومنه العوض فيك.
- فيه إيه يا كتكوتة مالك؟
- مفيش، أنا من الأول كان لازم أسمع كلام أمي.
- وإيه علاقة أمك بالموضوع؟!
- ما هي قالتلي إنك ملبوس وأنا ماصدّقْتهاش.
- ملبوس؟!
- آه، عليك عمل يعني، حد رابطلك الفشل في رجل أرنب مكسورة.
- آه، وإيه كمان؟
- والست نبوية جارتنا.
- ناوية تسبب حِتّتنا؟
- لا، قالتلي إن مخك محتاج يتوزن تاني!
- هتبيعه بالردّة عند الشرقاوي؟



- ما حي قالتلي إنك مش هتقبل الكلام.
- ما حي كمان؟ مميمم طب وعم حسني البواب رأيته إيه؟
- شايف إنك راجل عاقل، بس تبطل تشغل دماغك.
- وأملك شايفة إنك لازم تسيبيني، ها؟
- لا، قالت بس إنك ملبوس، وإن كله من البوكسرات البوليستر اللي بتلبسها.
- هي وصلت للبوكسرات؟ لا ده أنا كده أسيهالك وأمشي.

النصيحة ٢٦ بتقول: "دخول المعارف بلا حدود يخلي أساس العلاقة مش موجود".

مش عيب إن الواحد يشور أهله وأصدقائه المقربين في نصايح ليه أو لأهل بيته، خصوصاً لو الشخص اللي بنستشير ده أمين وأكثر مننا خبرة، إنما العيب بقى إنك تلاقي الأهل جزء من كل مشكلة في البيت وكأنهم جزء من البيت نفسه! لأن علاقة الرجل ومراته عاملة زي كورة الاسكواش كده، مهما كانت بتبان شفاقة للناس إلا إنها لازم ماتطلعش من الأوضة اللي مقفولة عليها.

وحتى لو اضطررنا يوم نحكي أونقول حاجة، لازم نمزج بين الحاجة اللي تفهم والحاجة اللي تفضح، يعني ماينفعش نخلي واحدة بتحكي كل تفاصيل جوزها وبيتها لصديقة مقربة تحت مسمي الـ"بيست فريند"؛ لأنه حتى لو افترضنا حسن نية الطرف ده وإخلاصه ليك؛ فانت مش ضامن رد فعل شريك حياتك وهو حاسس بالعري فجأة قدام طرف ثالث، حتى لو كان الطرف ده هو أهلك نفسهم؛ لأن حتى أهلك دول انتي مسموح ليكي تشاركهم تفاصيلك لوحدك وحكاويكي الخاصة، إنما حياتك مع شريكك وتفاصيلها السرية هي مش ملكك لوحدك عشان تشاركها، وإلا يُعتبر



الموضوع انتهاك خصوصية بدون إذن، وإعطاء سماح وسلطة لأهلك أو للطرف الثالث ده بالدخول بمساحة معينة في الكلام ماكانش المفروض يكون فيها من الأساس.



مشهد 3

بعد فشل كتكوت في كل المشاريع الي عملها، ما اتبقّاش قُدّامه غير حل واحد يرجّع بيه ثقته لنفسه.. وهو إنه يستثمر في موهبته الي ربنا زرعها فيه بالفطرة. وهو الفكاهة والجسّ الكوميدي الفطيع الي عنده، واللي كان بيخّلّي أي حد يقع من الضحك كل ما يشوفه، وبالتالي قرر كتكوت إنه يتخلّى عن الوظيفة التقليدية ويغامر بكل حاجة عرفها في حياته عملاً بمبدأ "رزق no risk، no"، وطبّق شهرين يتفرج على شركاء النجاح بتوعه، وهم " peace cake بيرامجها المختلفة.. طحالب - أحمد رمزي - بودي حمدي" والعديد من اسكتشات الكُتّاب الساخرين في البلد زي الي قولنا عليهم في الجزء الأول "ما هي مش هيصة بقى"، وبالفعل طلع على المسرح لأول مرة في حياته بدون ما يبقى بيتحقّل عليه، واستحضر روح كل الكوميديانات الي عارفهم زي "طه الدسوقي"، وحكى الموقف بتاع صاحبه فرخ الي كلّمه في التليفون وطلب منه يروح جري عشان ابن أخته الي لا بيتكلم ولا بيتحرك، وفي الآخر طلع لسه مولود!

حكى عن مدينة الملاهي الي كان بيحلم يفتحها هو وشريك من على النت، وبعدين اكتشف إن الشريك ده طفل عنده ١٠ سنين.

والأهم بقى إنه اتكلم عن أول مرة سقط في حياة وجاب F في مادة وقال لأهله إن المدرسة بتاعته لدغة زي إيبي سمير غانم وال F دي معناها Fery good.

وفي الآخر ختم كتكوت كلامه بعد التصفيق الحار وهو بيقول إن الإنسان لازم يجرب ويتعلم، ولازم مايبتلّش سعي كل مرة لحد ما يوصل، وفي الآخر بعد ما وصل البيت لقي كتكوتة مستتياه وهي بتضحك عشان فخورة بيه، وبتقول إن النصيحة ٢٧ بتقول:



"خليكي دايماً نامبر وان في حياة شريكك".

دي بقى بجد نصيحة واضحة وباينة ومش هنقول فيها حاجة، الرجالة عمرهم ما كانوا نمبر وان، الرجالة مش أقوى، مش أفضل، مش أذكى، ولا حتى الأكثر تفرّداً وتميّزاً في الحياة، وعشان العلاقة تنجح بين أي اتنين لازم كل طرف يخصّص جزء من وقته للطرف الثاني، وقت الحكي والكلام والسفر، كلنا مشغولين طول الوقت وكلنا ورانا التزامات مابتخلصش، وعشان الدنيا بقت أصعب كثير من زمان، أصبحت فرصة إننا نلاقي وقت يجمعنا أقل ما يمكن بسبب الضغوطات والمشاكل وروتين الحياة القاسي، عشان كده مهم جداً إن الست تبقى نمبر وان في حياة شريكها في وقت نجاحه وفشله؛ لأن في اللحظات المهمة دي بتكون فرص الانهيار ساعة الفشل والاستجابة ساعة النجاح في أعلى حالتها، وعليها المفروض يبقى فيه وقت مشترك دايماً لتفريغ الطرفين أفكارهم والسماح بمشاركة الشعور الحالي من غير حماقة، يعني ندعم في وقت الأزمة ونشجّع في وقت النجاح، عشان يوصل الطرفين لتحقيق السعادة والحصول على علاقة هادية، خصوصاً إن الاهتمام في الأوقات دي بيبقى هو ورقة الحظ اللي يا تكسبك الليانصيب، يا تخسرك اللي معاك، عشان كده بنقول وبدون أي شك إن الستات هما الحياة، هما الكمال، هما نمبر وان.

- كتكوت، أنا فخورة بيك جداً.

- أنا كمان فخوريكي يا حبيبي والله لحد السما.

- كنت رهيب وكسّرت المسرح، والله انت ماشوفتش الناس مابطلتش ضحك.

- يعني كنت كويس بجد؟



- جَدًّا والله فوق ما تتخيل، بُكْرَة الفيديوها تيجي وهتشوف انت كنت عامل ازاي.

- أنا نفسي مش مصدق اللي حصل ده، وكل ده ماكانش هيحصل لو ماكُنْتِيش جنبي وفي حياتي.

- يعني بجد أنا مأثرة في حياتك؟

- ومفيش حد مأثر فيها قَدِّك ولا زَنِّك.

- طيب ممكن أطلب منك طلب بقي؟

- عنيا الاتنين يا حبيبي.

- ممكن تعمل معايا فيديوها أنزلها على قناتي؟

- وإيه المقابل؟

- بوسة كبيرة ماشي؟

- ثواني أفكر كده، ممممممممممم، خلاص مو افق.

- بجد! والله العظيم انت أحلى كتكوت، أشطركتكتوت شافته عيني والله.



الفصل العاشر

عملتها فيكونا ثاني؟ شربتها يا كروديا!

طبعًا بعد العياط والرومانسية والشقلبة دي فكّرتوا إننا خلصنا، لا يا حبيبي - قولتها لكم قبل كده في الجزء الأول، يا جدعان وربنا دي ما طباعي، أنا راجل بعشق النكد، قريتوا ليا أي رواية قبل كدة؟ لا؟ يبقى ماتعرفوش النكد اللي على حق.

الفصل الأخير في روايتنا واللي هننهي بيه الأحداث بدأ بإن الحج أحما وصل لقمة تعبها الجسماني، وبعد لفّ كتير على الدكاترة هنا وهناك، وبعد العلاج والأدوية والمحاليل، والوقوف طوايري في مستشفيات الصرف الصحي، وصلت حالة الحج أحما إلى قمة السوء واللي في السوء بييجيب برقوق ☺!

أسف خلاص مش ههزرتاني، المهم الراجل خلاص بقى طرح الفراش، وقبل ما يموت جمع ولاده عشان يديهم درس وكلمة في أهمية التعاون والترابط عن طريق القصة الكيليشيه بتاعة عيدان القصب، وبعد ما العيال قليلة الرباية قالوله إنهم عارفين القصة قالهم خلاص مالوش لازمة الكلام معاكم، وإنه مش فاضل حاجة محتاجها دلوقتي غير الوصية، وبمجرد ما كتكوت اذّاله ورقة وقلم وهو عينيه بتتغرغر بالدموع، قام الحج أحما باصصله بصّة كلها شر وفارد جناحه ع الآخر ولسّع كل عيل من عياله كف مخبرين، وقالهم أنا بتكلم عن مسلسل الوصية بتاع أكرم حسني، انتوا صدقتوا إني هموت يا ولاد الكلب!

"أصل يا جماعة ده عمل كوميدي برضه، ومش حلوة في حقي لو خليت الموضوع دراما أكثر من كده".





مشهد 1

القاعدة في العائلات بتنصّ إن العروسة بعد الجواز بتعزم أهلها وأهل جوزها كلهم على غدا من عمائل إيديها، يعني حاجة كده زي عزومة أول يوم رمضان بس على خفيف.

وعشان احنا كنا مشغولين في المصايب اللي كانت ورانا من سفاح لشيفت كارير وخلافه، نسينا نتكلم عن الحدث المهم ده اللي للأسف اتأخر معانا شوية، ما هو برضه ماينفعش نختم العمل العظيم ده من غير ما نتكلم عن اليوم ده؛ لأن اللي حصل فيه ماكانش طبيعي خالص..

الحكاية بدأت بدري شوية لما أخت كنتكوتة بعثت على جروب "العيلة الصفرا" إنها عاوزة تطلّق، وطبعاً الجروب اسمه العيلة الصفرا عشان هما كتاكيت مش عشان عاوزين يشربوا بيبس، المهم إن أخت كنتكوتة مسكت تليفون جوزها بالصدفة وقرّرت تكلم صحابه عشان تعملهُ مفاجأة في عيد ميلاده، عشان تتفاجئ إن كل الأرقام اللي مسجلها هي أرقام بنات أصلاً وهو مغير أسمائهم عشان مايتقفش، ولما بدأت تركّز في الموضوع أكثر اكتشفت إن كل يوم بيجيله مكالمة تليفون الساعة ٢ بالليل ويقولها ده شغل، أصل مديري عاوزني! وفي الآخر طلع مديره هو الحب كله اللي متسجل في قائمة المكالمات.

"آه، كلهم لديهم كنتكوتة يسهرها معاها إلا ابنك يا أمي.. قولتلكم يا رجالة خليكم ناصحين وهاتوا شريحة ثانية للحاجات دي".

المهم كلمة من هنا وكلمة من هنا وخرنقة من هنا على زعيق من هنا، قررنا إن مفيش حل غير الطلاق، وإن عش الزوجية المبني على الخداع لازم يتهد حالاً "ملحوظة برضه.. هو عشّ زوجية حرفياً عشان إيه؟ برافو عليك عشان هما فراخ، أحب أفكر كل شوية لا تنسى بس".



- يا كتاكيتو خلاص، يا حبيبتي هو غلطان ومش هيعمل كده ثاني.
- لا يمكن يعني لا يمكن، انتي ماشُوفْتِيش يا كتكوتة هو كان بيقولها إيه!

- دي كلها أوهام في دماغك يا كتاكيتو، انتي عارفة إني بعترك زي أختي ولا لا؟

- لا يا كتكوت مش كل الناس متربّية زيك، انت بس عشان كتكوت محترم.

- وعنتر كمان والله كتكوت محترم، ودي والله العظيم كانت ساعة شيطان.

- أهو شوفت الخيبة، من وسط كوكب الفراخ كله أختار واحد اسمه عنتر.

- دلوقتي مش الراجل حلفك إن دي كانت أرقام ولاد أصحابه بس شركة الاتصالات باعتهم لناس تانية؟
- مش مصدّقة.

- بلاش دي، هو مش قالك إنه مسجّل مديره الحب كله كنوع من أنواع التطبيل، وانتي نفسك اتّصلتي بالرقم وطلع المدير فعلاً.

- ولو.. ولو، طالما أنا شكّيت في حاجة يبقى أكيد شكّي في محله،
وبعدين ده مش عاتق يا راجل.. في السوبر ماركت يقول للكاشيرة صباح الخير، في الكافيه يقول للووتر عاوز مايك، يا راجل ده في شغلّه بيتكلم مع سكرتيرته عادي كده من غير ما يبقى معاهم حد!

"الغيرة تقتل أحياناً"

النصيحة ٢٨ بتقول إن الغيرة دي هي أصعب حاجة ممكن يواجهها أي اتنين في حياتهم، شيطان لودخل في أي علاقة بيبوظها فوراً.



طبعاً أنا مش بدافع عن الخيانة ولا بيّرر حدوثها، إنما أنا بتكلم في نقطة الشك المستمر بسبب أو بدون على حاجات وارد جداً تكون فعلاً ماحصلتش، أو سيناريوهات حصلت فعلاً في دماغ الست بس!

معروف إن الست لما بتخط حاجة في دماغها بتتحول للمحقق كونان، حرفياً بتربط حاجات مالهاش أي علاقة ببعض وتوصل بيها لاستنتاجات، يعني ممكن تطلع محمد صلاح ماسوني عشان غمز مرة بعينه والعين رمز الجاسوسية، تطلع الأخطبوط حرامي عشان إيدته طويلة، تقتنع إن السجاير أثرية عشان اسمها كليوباترا!

وزي ما الفنان وائل جسار قال إنك لو عاوز تقتل حُب بجدا! اقتله بالشك.

عشان كده الست العاقلة هي اللي ماتسببش نفسها للهلاوس والشياطين تسرح بيها وب عقلها؛ لأن الموضوع فعلاً خطير وقاتل، وبيوت كثير قوي وقفت ع الطلاق بسبب الغيرة.

احنا أه بنقول إن الراجل لازم يحترم الست اللي معاه ومايقاش sweet talker مع كل الناس اللي يعرفها واللي مايعرفهاش، لكننا بنصح كل الستات برضه إنها تتأني في أي قرار وما تستعجلش؛ لأن خراب البيوت برضه مش سهل.



مشهد 2

الحمد لله الأوضاع دلوقتي بقت أحسن بين عنتر وكتاكيكو بعد ما خطفناهم من على باب المأذون، وبقي عنتر يقول كتاكيكو في الراحية والجاية يا حلوانت يا شمعدان، وكتكوت وكتكوتة خلاص الدنيا برضه بقت كويسة معاهم نوعاً ما والأمور بقت أكثر استقرار، فهل تفتكروا بقى إن الوضع ده مناسب لخطتي وطريقي في كتابة الأحداث؟! والله أبداً.

المصيبة الكبيرة الجاية حصلت لما فرخ بلغ كتكوت إن البنك المركزي هيبداً يحقق مع أي حد ثروته تتعدى المليار جنيه، وعشان كل واحد فيهم كان معاه ٢٠ مليار في كاندي كراش قرروا سريعاً التخلص من اللعبة ومسح أي بيانات خوفاً من المسائلة القانونية، في نفس الوقت كانت كتكوتة بتاخذ كورسات زومبا في إتيكيت في التجمع الخامس، وده كان بيعتاج عربية تروح وتيجي بيها، وطبعاً كتكوت كأي زوج محترم قرر إنه يحط كل السيولة اللي معاه وتحويشة العمر في عربية محترمة آخر موديل، لكن بسبب رفع الدولار الجمركي وكل العربيات بقت أوفربرايزد، قرر بعد تفكير عميق ومشورة أكبر إنه يتجه لأحد معارض السيارات القريبة ويختار من الكتالوجات عربية "كسر زيرو" سعرها حنين جداً؛ ليصاب بصدمه عصبية لحظة استلام العربية اللي لقاهها متدغدغة ومنتدشمة، وبسؤال صاحب المعرض وضّح قائلاً إنها كانت عربية زيرو فعلاً بس اتكسرت من كل حطة عشان كده بتتباع بسعر رخيص؛ مما أصاب كتكوت بجلطة مضاعفة وانسداد مجرى الدم مع دخوله في نوبة شديدة من الاكتئاب الحاد.

النصيحة ٢٩ بتقول "إيد لوحدها ماتسقفش".



زي ما الست بتبص طول الوقت على الراجل بعين التحدي، بتركز على سقطاته ولحظات فشله أكثر من أي حاجة في الدنيا، وبالرغم من مزاجية الستات دايمًا ورغبتهم في عمل أشياء متناقضة في آن واحد.. لازم وحتماً الست تفهم إن إيد لوحدها ماتعرفش تسقف، يعني زي ما قولنا المشاركة في اللحظات العصبية، الاهتمام بالتفاصيل والدعم المعنوي.. لابد كمان يبقى فيه نصيب للدعم المادي في الأوقات الصعبة.

محدث قال إن الراجل عاوز فلوس من الست اللي معاه، مفيش راجل بجد هيحب إنه يخلي مراته تدفعأو تجيب حاجة في البيت.. بس في الوقت نفسه قولنا إن الراجل مش ماكنة atm، يعني مفيش أي عيب ولا مانع إن في وقت الأزمة الست تقف جنب الراجل عشان يقدر يعدي الأزمة عملاً بعبداً إن المليون يكب على الفاضي، وبرضه ننوه إن العملية دي لو تمت لازم تتم من غير أي نوع من أنواع المعاييرة المستقبلية، وإلا يبقى مالوش لازمة من الأول، أصل المفروض إن واقفة جنب الراجل ده لأنه جوزك وشريك حياتك؛ لأن هو نفسه بيقدملك كل اللي يقدر عليه بدون ما يستنى منك أي مقابل، فلو الموضوع ده ماكانش نابع من نوايا سليمة وفطرة عاوزه تساعد بحب عشان الأزمة تعدي، عمر المركب ما هتتحرك خطوة واحدة لقدام.

- كتكوت، مالك يا حبيبي؟

- رجعنا للصفر تاني يا كتكوتة.

- وإيه المشكلة؟ هو الإنسان اللي بيعمل الفلوس ولا الفلوس اللي

بتعمل الإنسان؟ قصدي الكتكوت!

- قصدك إيه يعني؟!

- قصدني إن احنا لسه بصحتنا، لسه سوا، لسه قادرين نشتغل

ولسه فينا حيل، ويا دنيا اللي يقدر عليها أنا كمان أقدر عليه.



- بس المرآدي الخطبة كانت جامدة قوي.
- إيه المشكلة برضه؟! هو الواحد كل ما يكبر تكبر مشاكله.
- طب والحل؟
- يا جبل ما يهزك ريح، هنقوم تاني ونشتغل، وهتفتح شركة البرمجة اللي في نفسك.
- ازاي ده؟
- كلام في شرك كده، أنا كنت بسرّب منك فلوس أول كل شهر لوقت زنقة، وأظن مفيش وقت أزلق من اللي احنا فيه.. وكمان عندي شوية ذهب هبيعه، ده الجرام معدّي الألف ونص دلوقتي.
- انتي بتكلمي جد؟
- آه والله، هو الذهب أغلى عندي منك يا كتكوت! هو فيه حاجة في الدنيا دي أغلى عندي منك يا حبيبي! "يا كتكوت يا حبيبي الكنز لا في الرحلة ولا في الوصول، الكنز الحقيقي في الصُّحبة، وانت صُحبتِي، عزوتي وجوزي وراس مالي الحقيقي، صاحبي الأقرب وحبيبي الوحيد اللي ماليش غيره في الدنيا".
- ربنا يخليكي ليّا يا كتكوتة، ربنا يخليكي ليّا ومابحرمنيش منك يا نور عيني.



مشهد 3

الرحلة خلاص بتخلص، وكتكوت خلاص فتح شركته بمساعدة وحب من كتكوتة شريكة عمره، أي نعم بعض المشاريع باظت بسبب الانترنت المحدود في مصر، وبعض العملاء امتنعوا عن دفع الأقساط بعد ما خدوا الأنظمة بتاعتهم وشغلوها، لكن كتكوت المرادي كان قادر ياخذ كل خبطة وهو واقف على رجله عشان معاه ونس عمره ورفيقة مشواره، حبيبته اللي بمناسبة عيد ميلادها قرر يروح مخصوص لحد فرن عم سيد ويشترى أجود أنواع العيش التوست، يضحك على ذكرياته في المكان ده، ويفتكر أول علقه خدها من أبوه لما روج من غير عيش عشان اكتشف إن عم سيد صاحب الفرن ميت من زمان وكل ده كان فاكر إنه مش بيلاقيه لأنه خرج يلقط أكل عيشه، ومع نشوة الذكريات اللي اجتاحتها وهو مروّح، ماخّش باله إنه وصل البيت بسرعة جدّا رغم طول الطريق، ولما وصل ولقى كتكوتة مش في البيت توقع إنها ربما عند الكوافير أو بتجيب حاجة لعيد ميلادها اللي هو عامل ناسيه عشان يعرف يفاجئها، في اللحظة دي اكتشف كتكوت إن كان ليه ميعاد مع صديقّه القديم اللي كاتب أشطرت كتكوت، واللي ليه الفضل في خلق شخصيته بكل جوانبها والعوالم بتاعتها ع الورق، واللي بمجرد ما كلمه لقاها بيقوله إن النصيحة ال ٣٠ بتقول:

"الجواز مش بالفلوس، الجواز شكة دبوس".

النصيحة المرادي مش للرجالة ولا للسيدات، هي نصيحة عامة لكل الناس عشان تعرف تتعامل مع بعضها، الرجالة من غير ستات يعني عالم من غير بشر، جسم من غير روح، والجواز هو الفطرة السليمة الوحيدة بين أي اثنين من جنس مختلف، أحمر وأزرق زي ما الفطرة دي



بتقول، عشان كده الرجالة لازم تعترف إنه بالرغم من كل اللي بيعرفوا يعملوه في حياتهم ودورهم اللي لا يُمكن حد ينكره، إلا إنهم ماينفَعُش يكملوا حياتهم في عالم كله رجالة، بعيدًا عن الانقراض و انتهاء السلالات، إلا إن الست في حياة الرجل مش وسيلة بس للتناسل، الست حملت وشالت وخلفت وربت وعملت الرجاله أنفسهم، و اللي يقولك الست اتعملت من ضلع أعوج قولُه بكل ثقة إنه حمار، الست اتخلقت من الرجل عشان تفهمُه وتكمل نقصُه، والرجل اتخلق أقوى عشان يحتوي الست، والكون لا يمكن يستمر من غير وجود أي طرف من الاتنين، عشان كده بنقول إن موضوع الجواز ده عمره ما كان بالفلوس، مش كل حد ربنا كرمُه يقدر يتجوّز، الجواز مسؤوليّة كبيرة، خطوة لازم تبقى مستعد لها نفسيًا قبل مادّيًا بكتير قوي، والجواز بالنسبة للست برضه مش مجرد خروج من واقع معين لواقع مختلف، مش استقلال وحرية لا مشروطة، الجواز طول الوقت خطوة شائكة، دورة حياة كبيرة قوي محتاجة اللي يفهمها، حد يبقى قادر يتكيّف مع ظروفه وظروف الطرف اللي معاه، ويفكر كويس قبل ما ياخذ الخطوة، عشان الجواز في الآخر عامل زي شكة الدبوس، لو كنت مستعد لها كويس مش هتجسّ بها، أما لو الشكة كانت عشوائية، ممكن تخرب حياتك كلها.

- كنتي فين يا كتكوتة قلقيتيني؟
- مفيش يا حبيبي، تعبّت شويّة وقولت أروح للدكتور.
- دكتور إيه؟! حصل إيه؟!!
- ماتقلقش قوي كده، ده بيبقى عادي في الأول.
- أول إيه وتاني إيه؟ لو الموضوع خطر كده كنتي استنيتي آجي معاك.
- لا خطر ولا حاجة يا حبيبي، ده شويّة تعب خفيف كده.
- طب الحمد لله وربنا يطمنا عليكي، كل سنة و انتي طيبة يا حبيبي.



- إيه ده؟! بهزّر صح؟! مش دي اللي شوفناها سوا من فترة وقولتلك نفسي فيها، بس دي غالية قوي قوي.
- مفيش حاجة في الدنيا تغلى عليكي يا حبيبتي، أنا لو أطول أجيبلك الكون هجيهمولك.
- مممممممم بتحبيني قوي كده؟
- طبعا قوي قوي.
- حتى لو قولتلك إني.. الحقيقة يعني ماكنتش عند الدكتور لوحدي؟
- ماكنتيش لوحديك ازاى يعني؟ أومال كنتي مع مين؟
- كنت معاك، أو للأمانة يعني كنت مع جزء منك، جزء في بطني لازم تكتبه باسمك؛ لأنه مايعرفش يكتب لوحده.. "كتكوت، أنا حامل".

